

Tyípínì

N yúnpyé, yépi nónó-á sébéy mènè kàrpulè, mé wèkì yé tyí.

Tyípínì sébéy mènè, Likyi sébéy wárkínó ní-ò ye kéle.

Wǎh nê wǎrkì gbennè, té n yǐnnè ké yǒ pè n ye Likyi sébéynè, képah Yesu min pì òkù tyí óle n yo á tyí, gbí nê-á sò à me sétáh yǒ. Ntè n sébéy ní-ò mè wòle, nê-á pè n ye Tyípínì sébéynè, kè Yesu yǐnyǒ dókónsòkòno tyíle n yo á tyí; ànê képah náh, Liyel Mirki-á pò Yesu tò sǎhpú tókò, té Yesu yǒ sǎpú ònkìnó tyah òkù nènè.

Yesu yǒ sǎpú ònkì nòpi sò tyah Pyerì ànê Nsyǒ gbò yǒ Nsyifunò wró, Yerusalemì kwil ànê Nsyifunò kwlo tókù sòkò. Té ònkì nòpi tókù me we Pole gbò yǒ kwlo yísyó sòkò, nónó náh pì Nsyifunò kwlole, sǒ-á Antyosyì kwil, ànê Korènti kwil, ànê Filipi kwille. Képah náh, Likyi me Pole Liyel tò pínkònkòno òkù yo wah ànê yótyí nónó-á à we ké sòkò. Pole-á tǔ we yótyí nòpi yah wah òkù nènè, Likyi ké tò yah yo wah.

Likyi n sébéy mè sòkò tyi kèòkù yah yo á tyí, ké 1.8:

- Liyel yǒ sǎpú ònkì tyàhnóle Yerusalemì kwil sòkò (1.1 - 8.3),

- Liyel wey yónkõnõle Yerusalemu kwil, ànê Nsyude, ànê Samari gběnyah (8.4 - 12.25),
- ànê kèkõyó tãntã pól soko (13.1 - 28.31).

Wâh Yesu tẽntõ névyè Liyel wey yo dùkùle n yah, ò n nùkú fě n pĩ kwónó nê-á sò pè Yesu yõ sěpùle n kō. Kéne Liyel wey yónó mè ye Nìvìnì tirlè. Képah tō Yesu dùkùle ále n wěki, òmò nê-á Liyel ney yáhntòkòkòle. Nmo ye pò tẽ kèkõyó mè soko, à pwáhnmonòle névyè kō, nónó pól-á fě syi sě ò yõ.

Liyel yé yah tẽ ké kárnó soko.

Amina!

Liyel vyãh kǝnóle ò Mirki pónó tyí soko

¹ N dí Tewofil, máh lésò sébéy gben nê tekú mò á tyí, képah soko ye mé wãrki Yesu tyípínì ànê ò névyè kwónónò pólle. Mé sè wãrki à toko ò tō tyàhnó tyí,*

² pópó à pò nò sò nê-á Liyel à yõ dokò soko yínyõ. Té Yesu-á pópó n yõ n dokò n soko, à tãn kwãh sah ò tẽntõ syínyopu kō Liyel Mirki gbò yõ, pépi nónó-á lésò à yah wilki sah.

³ Yesu-á yèvyãhrú pú à ku, képah náh tẽntõ névyè nópí tyí ye à ò gblõy wěki duke duke náhnáhle ne, páh me vile. Sèpìn tikinini soko ye sò à ò gblõyne péle n wěki, té péle n kwò Liyel tǝrí tyí yõ.

* **1:1** 1.1 - Liyel wey sébéy fí nê-á pè n ye Likyile, képah tyí ye Likyì n yo Tewofil tyí ne pé sébéy gben-á.

4-5 Képah sòkò, sǒ yóle pè me yòke yónó sòkò, té Yesu gbáhdýâh yó di pé tyí ne: «Yé káh n gbe n mo Yerusalemi kwille. Ngbòle, Nsyǒ lésǒ névyè wel wilki ni sòkò, nte núkúnúkú, kàh pópó n nò sèpìn yísyó tyí, Liyel kí yé tǒ sah n Mirkile kí yé pí yályál. Képah ye, yé káh gbe mo Yerusalemine. Yé Liyel Mirki syúki n tǐ nǐnpó, képah nê-á Sú Liyel vyâh kǒnóle, nê tyí-á mé yo sah yé tyí.»

Yesu yǎndòkònsòkònsòle yǎnyǎ

6 Té Yesu tǐntǎ névyè-á sǒ me tükènmònsòle n tñô, pè píkinyahno yó pí n tyí ne, pé Tǐ nǐgbǐ, núkúnúkú se à kí tǒrí tǒ dahbi Yisrayel gbǐnyah tǎn gbǐ sòkò ni?

7 À me yo pé tyí ne: «Yépi tyí náh ké lésǒ ànê ké gbí pínóle. Sú Liyel nê ó-á tǒrí nétǐne, nmo ye wilki sah légbíne.

8 Nte yé kí pò tǐnweno yó we, Liyel Mirki-à pò tiki yé yǎ gbí nǐne. Képah sòkò, yé kí pí nmo tyí yónwàhpu kègbòle à tòkò Yerusalemi kwil, ànê Nsyude gbǐnyah pól sòkò, à tahlí Samari gbǐnyah tyí, fǒó à kí kyí syí kèkòyǒ pól yǐn tyí.»

9 Yesu-á fyò kéne welo yo te, à núkú yǎ doko n sòkò yǎnyǎ pé pól yí yah. Té nýírki yó pò à foko tǔ, pè náh tǒ à we.

10 Té pǎh me kéne yǎnyǎ yáhnó sòkò díkidíki sǐ, pè núkú díbí nǐpí ními yísyó we pé tñô fwòpikino sòkò,

11 pè me n yo pé tyí ne níké: «Kalile gběnyah tãn, kwâh nê me, té yé yĩn tẽ ásô, à yĩnyõle n yah sê? Sõ-á yé we Yesu mènne, à yõ ðokò sokò yĩnyõ yò, sěntě ó ye à kɪ tõ ñ syɪ n pɔ n pi.»

Yesu těntõ névyé syínɔnɔle Yerusalemɪ kwil

12 Képah náh, Yesu těntõ névyé yal Wolivi yèh yõli yõ, à pé syɪ n pi Yerusalemɪ sokò. Kéne yõli náh sò me fíí kah Yerusalemɪne, kè me lérí tóní kénkõ kó-ńsahle.

13 Pãh pò de, pè ðokò yuku yĩnyõ wòkò sokò, pãh níkéne wěne n tuke n mɔ ńyãh sokò. Pyeri sò me, ànê Nsyõne, ànê Nsyakule, ànê Andrele, à tahlɪ Filipi tyí, ànê Tomale, ànê Bartelemine, ànê Matyele, ànê Alfe pídí Nsyakule, ànê Simole nê-á sò pè n ye sú fõ vyãh syí-òle, ànê Nsyaki pídí Nsyudele.

14 Pé pól sò me pé sɔnɔ pɪ núkúle, à n tuke n mɔ wě tyí gbímegbí, à níríle n pɪ. Syó yísyó tɔ sò me péle, à tahlɪ Yesu yú Mari tyí, ànê Yesu yúnpyéle.†

Matyasɪ sàhnóle Nsyudasɪ swo

15 Kéne sèp̃in sokò, sò yóle, Yesu yõ sěpú sò me tuke mɔ nɛp̃i tikinúkò (120) kénkõle. Té Pyeri me yuku yĩn pé nyó, té yo pé tyí ne,

† **1:14 1.14** - Yesu yúnpyé nónó tyí-á n yo ásô sokò yò, tókú sɔnɔ sokò, ñ kèkùrkí núkú gbãm ye à n ye. Té tókú sɔnɔ sokò mó, ñ kèkùrkí núkú gbãm náh à n ye.

16 pé yúnpyé, Liyel wey soko Liyel Mirki-á lésõ Davidi kõ, à nê yo sah Nsyudası tyı soko, kãh sò yĩne kè pi ó pi. Kéne Nsyudası-á lésõ Yesule n tẽpú wẽki.

17 Té pépi tĩnkĩ soko ney yó-á mó tõ sò ñne, tòle dáhbínóle n gbò pépi tyı kõle.

18 Nte wãh pò nê we n tyítukù pínó yõrele, képah-á dwe swãhle. Té à me po syki n foko so, n dyo pól wil karkı.

19 Képah soko, Yerusalemı tãn pól me kè noh, pè kõ pè kéne swãhle n ye pé wey soko Akeldamale, nê kór-á tó swãhle.

20 Képah tyı-á sò wárkínsàhnóle Gbálnó sébéy soko ne nkẽ:

«Ñ kéte ki pi kéntikínine,
ànê ney náh tõ n tẽ n pi ké soko.»‡

Té tõ yo ké fı yó soko ne nkẽ:

«Ñnî ki n pi pi tò tãko n pi.»§

21 Képah-á, névyé nónó-á sò me péle Yesu me gbı dükùle,

22 à tãko Nsyõ-á à wel wilki ni soko gbı nêne, fóó à kyı syı n yõ n dokò n soko sò tyı yĩnyõ. Pépi soko nénúkù yó-á yĩne à tahlı pé tyı, pé n tyıle n yo n wah ne, wãh ku té yilki mɔ.

23 Wãh yo sã, pè me népî nímı wẽki. Núkú yĩn ye Nsyosefulé, nê-á pè n ye Barsabasıle, té tõ ñne n ye Nsyusitusıle. Nı-ò yĩn me Matyasıle.

‡ 1:20 1.20 - Yah n te Gbálnó 69.26. § 1:20 1.20 - Yah n te Gbálnó 109.8.

24 Képah sɔkɔ, pè me Liyel ni ne, Tě ñgbě Liyel, ñmɔ nê-á no pól fókósõnɔle n pne, wăh nê yah wilki népî ní mí nópí sɔkɔ, à tẽnɛ pé wěki.

25 Tě wɔ-á kɪ Nsyudasɪ swɔ tɔkɔ Yesu těntò névye tò mè sɔkɔ, wăh nê milki té yuku fí yó, nýāh-á yĩne ñne.*

26 Képah tẽnɛ, pè sáhntɔkɔnɔ pɪ, kéné sáhntɔkɔnɔ me pɔ yĩne Matyasɪle. Nmɔ núkú kwɔ mɔ Yesu těntò névye népî gbõnúkú sɔkɔ.

2

Liyel Mirki pónóle

1 Syáh sɔ-á pɔ nɔ, nê-á pè n ye Pãntekɔti syáhle, Yesu yõ sěpú pól sò me tükènmɔnɔle fí núkú sɔkɔ.

2 Dõ, yĩnpõ yó núkú n wil liyel sɔkɔ á kɪ ne yáhpeké yó sõ kõ, à pé mé-ńsah wòkò pól yuku.

3 Té kwâh yó núkú wil mɔ á kɪ ne nyàh lépõ sõ, té kõlɪ tẽ tẽ kõ pé nénúkù núkú pól yõ.

4 Liyel Mirki me pé pól tɔkɔ. Pè tyah wénsnóle n wɛkɪ Liyel Mirki-á nónó dahbɪ pé vyěy.

5 Té légbĩne, Nsyifunɔ nónó-á pé Liyel wěkì tẽnó ple, pè sò me wil kèkõyó kwlo kwlo pól sɔkɔ, à pɔ twah Yerusalemɪ kwil.

6 Yĩnpõ mè-á wil sě, pé pól tuke mɔ tówûle. Té pé pól yáh-ńsah sò me tyɛ, pé nénúkù núkú

* **1:25** 1.25 - Fí nê tyí-á n yo ásô yò, yèvyāhrɪ tẽ-ńsah ye nénpóle, nê-á pɪ nyàh mé-ńsahle. Nsyudasɪ ye ku sɔkɔ nénpó.

pól-á sǝnpíle pé kwlo welo wékínóle n nohnu Yesu yǝ sǝpú tyí.

⁷ Kǎh pí sǝ, pé gbǎn du, pé lékám fǝkí, pé me tyah n yo wǝ tyí ne: «Nónó pól-á n wekí yò, pé pólle Kalile gbǝnyah tǎn nǎh di?

⁸ Nte kè pí sǝ té ápi nénúkù núkú pól á kwlo welo wékínóle n nohnu pé tyí,

⁹ ápi nónó-á n wil gbǝnyah nópi sǝkǝ, nónó-á pí: Partesele, ànê Medile, ànê Yelamne, ànê Mesopotami tǝle, ànê Nsyudele, ànê Kapadǝsile, ànê Pǝtele, ànê Asile,

¹⁰ ànê Frisyile, ànê Pǎnfilile, ànê Yesyiptile, à tǎhli Sireni kwil tǎn tyí, Libi sǝkǝ, ànê Wrome kwil tǎn nónó-á me tǝnóle ásò,

¹¹ ànê Kreti tǎnne, ànê Arabunine. Ápi túkù sò dubi Nsyifunǝ Liyel nínó wǝkì sǝkǝ, té túkù mó vi mo de ále ké sǝkǝ. Té á pól me Liyel tyí-ngbno pínó tyí yónóle n nohnu pé tyí á kwlo welo sǝkǝ.»

¹² Képah sò me pé pól yáh-ńsah tye, té gbǝndùnì tǝ tyí, pé me tyah n yo wǝ tyí ne, tir nê se képah n wǝkí ní?

¹³ Té pé túkù mó sò me kóle Yesu yǝ sǝpúle n ko ne, ðivǝ pènèkì-á tǝ péle.

Pyeri Liyel wey yónóle tówù tyí

¹⁴ Képah sǝkǝ, Pyeri yuku yǝn pé no tǝntò névye népì gbǝnúkú téló nuyó, té tyah n yo yǝnpǝ ngbǝne tówù tyí ne: «Ápi Nsyifunǝ pólle ànê nónó pól-á me tǝnóle Yerusalemi kwil, yé yé

ní kwɔ noh palle ní tyí, yè mó ní wey syíkí-ńsah pĩ.

15 Mé pĩ ne yáh me n sǒ ne, sètě̀nì sɔkɔ-á no nópìle, té sě́ náh dé! Pǒy tǒ gbí ó sɔkɔ náh ále yò di?*

16 Nte Liyel tě̀ntǒ syínyo-ò Nsyowelɛ-á nê yo sah, képah ye pi yò.†

17 A lésǒ ne, Liyel-á ne ńkě:

«Kèkǒyó-à pópó n tyɛ,

mé kɪ ní Mirki tiki mɔ no pól yǒ.

Yé dínpi ànê yé syónpi kɪ ní tě̀ntǒnène n syi n yo.

Mé kɪ wě́kínóle yé kětě̀npìle n wě́kɪ,

té yé yèwàhnì kɪ dléyɛ n dɔ.

18 Gbɪ yǒ, kéné sèpìn sɔkɔ,

mé kɪ ní Mirki tiki mɔ ní tǒnpɔbɪ díbí ànê syó yǒ.

Té pè kɪ ní tě̀ntǒnène n syi n yo.

19 Mé kɪ gbíl tyi pi yínyǒ,

té kɪ gbíl tyi pi sétáh yǒ,

nê-á kɪ pi tǒ, ànê nyàh, ànê gbìsyikile,

20 gbí kɪ vi mɔ pi fě̀ntǔne, té ńwǒ kɪ syǎh tǒ sǒ,

té Tě́ ñgbě́ tukey tùkènó yòh ñgbě́ kɪ pyé pɔ,

kéné tǒrí yòh ñgbě́ne.

21 Képah sɔkɔ, nónó pól-à Tě́ ñgbě́ ye gbo, pépi wɔ kɪ pwah.»»

22 Pyerɛ-á Nsyowelɛ welɔ nópì yo te, à tǒ ñ syi yo pé tyí ne ńkě: «Yisrayel tǎn, yé noh ní tyí, máh kɪ nê yo n pi: Nasaretɪ Yesule, ñmɔ ye pi

* **2:15** 2.15 - Yáh we Pyerɛ pǒy tǒ gbí tyíle n yo, Nsyifunɔ náh sǒ tǒle n wɔ, pǒy tǒ gbí nírí sǒkó-ńkě sɔkɔ. † **2:16** 2.17-21 - Yah n te Nsyowelɛ 2.28-30.

névi yóle, nê-á Liyel syõ òn tyí, à òn gblõy tǒrúle yé wěki òn gbìl ànê òn gběndùnì tyi pínó soko yé wró. Yépi ntě ye kè pí ó!

23 Liyel-á òn tyi yah tóko sah sǒ, sè pí sě. A kéné dí gbàh de mo yé kǒ, yé me ònne Liyel dèl pípú kǒ pè à syi dahni yǒ, à à ko mo.

24 Nte kǔ náh sǒ fě à tē n sah n pi. Képah ye, Liyel me tǒ òn lékó yilki mo, à à wilki kǔ yèvyāhri soko.

25 Nmo tyí ye lésǒ yǒtě dí Davidi yo ne nkě:‡
«Péwo Tě òngbě Liyel náh me ké tyí ne pé tē n kwlo.

Képah-á, à me péle gbímegbí pé yohni mo yinne.

26 Páh tǒ me ònìvìni soko, ànê ònìvìni welo ó-á pè n ne n weki.

Pé gbò sàhnó-á me ké yǒ ne, páh pǒ ku, pé min-á ki me tē yèvuni soko.

27 A náh pé lékó sah kǔ kǒ n pi, ànê à náh n ye pé lékó kǒ kè n pyāh n pi, péwo nê-á òn tǒnpi pèpeyne.

28 Wāh min wǎlle pé wěki. Té ki pé kǒ, pé ki me ònìvìni soko kúmm òn yah.»

29 Képah yóntenó náh, Pyeri tǒ yo pé tyí ne: «Á no, yé ye mè á náh ney Davidi tyi yo n wah yé syah. A lésǒ ku pè yĩ. Té kwey mè soko, òn diki ntě me ápi kwil.

30 Nte Liyel tǔntǔ syínyo-ò ye sǒ ònne. N gbò sàhnó sǒ me Liyel vyāh kǒnó mè yǒ, Liyel-á òn

‡ 2:25 2.25-28 - Yah n te Gbálnó 16.8-10.

wo nê sòkò nɛ, n̄ pètóbé sòkò yó-á kɪ pɔ pɪ
yòt̄ɛnɛ n̄ swɔ.

³¹ Tě wɔ ye pɔ pɪ Kristalɛ, nê kór-á Liyel nɛy
yáhntòkònlɛ. Té wǎh nɛ n yilki n mɔ n pi n̄
kúntɛnɔ náh, kɛpah ye Davidi kwǎh t̄ɛ wɛ, à k̄ɔ
à nɛ ník̄ɛ: <A náh n wũ n pi lékókwíl, ànê n̄ lékó
náh n pyǎh n pi.>

³² Núkúnúkú Yesu mènɛ, á pól ye kè wɛ yíne
nɛ wǎh ku, té Liyel mɛ n̄ lékó yilki mɔ.

³³ A yǔ dɔkò sòkò yínyǔ, mɛ kyɪ t̄ɛ Liyel gbòyǔ
sòlɛ. Té Sú Liyel-á n̄ vyǎh k̄ɔ n̄ Mirki nê tyí
sòkò, à mɛ kɛlɛ Yesu k̄ɔ à tiki mɔ á yǔ. Kɛpah ye
á n yah, té n nohnɪ yò.

³⁴ Ntɛ Davidi náh dɔkò yuku yínyǔ, té wǎh kè
yo nɛ ník̄ɛ:

<Tě n̄gbɛ̄ Liyel kè yo n̄mɔ yòt̄ɛ dí tyí nɛ,
pɔ n k̄ɔ n t̄ɛ ní gbòyǔ sòlɛ,

³⁵ fók̄ kè pɔ nɔ gbí nê-á mé kɪ á sɛpébí pɪ á
gbáhkì súnsàh-̀nsahlɛ.>»§

³⁶ Kɛpah yóntɛnɔ náh, Pyɛɪ t̄ɔ pè syah nɛ:
«Yisrayel tǎn pól yíne yè kè p̄ɪ gbɪ yǔ nɛ, Yesu
nê-á yépi t̄ɛ syɪ dahɪ yǔ, n̄mɔ-á Liyel pɪ Tě
NGBɛ̄Nɛ té t̄ɔ à pɪ Kristalɛ, nê kór-á Liyel nɛy
yáhntòkònlɛ.»

*Népî kèyǔ núkú kyɛgbǎm (3 000) dòhnìnólɛ Yesu
yǔ s̄ɛpú yǔ*

§ 2:35 2.34-35 - Yah n tɛ Gbálnó 110.1.

37 Pyerì-á wey mè yo pɔ tyɛ sɛ̃, kè névye ni kah tɛ̃, pè me Pyerì ànê Yesu tɛ̃ntò névye téló piki yah nɛ, pé no, sɔ̃ se pé yĩne pé pɪ nɪ?

38 Képah sɔkɔ, Pyerì me yo pé tyí nɛ: «Yé yé nno vi mɔ, yé nénúkù núkú pól mó wèlnwìlkinó we ni sɔkɔ Yesu Krista yĩn yõ, yé tyípèl yõnmɔnɔ yĩnne. Képah sɔkɔ, Liyel Mirki kɪ yé kõ.

39 Liyel-á ù vyãh kõ ù Mirki tyí sɔkɔ nónó yĩnne, yépi ye, ànê yé wɛ̃npìlɛ, à tahlɪ nónó pól-á me kwlo fífí sɔkɔ, ànê nónó pól-á Tɛ̃ ùgbɛ̃ Liyel kɪ n ye n pi.»

40 Tɛ̃ Pyerì tɔ̃ sò me welo náhnáhle n gbah n yo pé tyí, à sòréle n mɔ pé sɔkɔ. A sò me n yo pé tyí nɛ: «Yé Liyel pwáhnɔnɔ fɛ̃ syi, yé mó wil kwey gbì névye népèl wró.»

41 Képah sɔkɔ, nónó-á Pyerì welo fɛ̃ syi, pè wèlnwìlkinó we ni sɔkɔ. Ké lésòlɛ, népì kèyõ núkú kyegbã̃m (3 000) kénkõ dohnɪ Yesu yõ sɛ̃pú yõ.

Yesu yõ sɛ̃pú négbro tɛ̃nóle wɛ̃ tyí

42 Képah tɛ̃nɛ, Yesu tɛ̃ntò névye-á kwónóle nónónɛ n kõ, pé pól sò me pé gblɔy kõ, me n nohnɪ pé tyí, té me kwɔ̃ mɔ pé sɔkɔ, à pɪ péle núkúle. Pè sò me yòkele n yõ péle wɛ̃ tyí, té me nírilɛ n pɪ péle.

43 Liyel sò me n syõ Yesu tɛ̃ntò névye tyí, à gbìl tyi náhnáhle n pɪ. Kãh pɪ sɛ̃, kè tíkíle no pól tɛ̃.

44 Nónó pól-á sò vi mo pi Yesu yõ sěpúle, pè sò me kwrɔ mo tẽ wẽ tyí, té me pé gbàn yí pólle n sah wẽ yõ.

45 Pè sò me pé swěy ànê pé gbàn yíle n yãm. Té me sé yàmno pónóle n dibi wẽ wró, à yĩne pé nénúkù núkú pól fyàhnónole.

46 Té pè sò me pé sɔno pi núkúle, à wěne n tuke n mo sòmésó Liyel ní-nsah gbô soko. Pè sò pé foko dal wěne, à yòkenole n yõ wẽ yõ nìvìnìne, pé gbéngbèn soko.

47 Pè sò me Liyelle n gbilki, té no pól me péle n sò. Té Tě ñgbě sò me névyele n pwah n mo n dohni pé yõ sòmésó.

3

Gbáhkì núkú dí yó dénmɔnole

1 Képah soko, sò yóle Pyeri ànê Nsyõ sò me n yuku gbèkãm gbí Liyel ní-nsah, Liyel ní-nsah gbô soko.

2 Té dí yó sò me gbáhkì núkúle n dubi gbí dùkùle. Sòmésó, pè sò nkěne à twah n po n sah Liyel ní-nsah gbô dé-nsah yah soko, nê-á pè n ye dé-nsah Kětärle, à kō ă póle n ni n syi ké soko dépú tyí.

3 Wǎh Pyeri ànê Nsyõ we pè n tyah dénóle ké soko, à pó ni pé tyí.

4 Képah soko, pè à gbah yah, té Pyeri me yo n tyí ne, à pé yah yíí.

⁵ Wǎh yo sě, dí sò wε ne, páh kɪ kwâh yó wε n syi n pi pé tyí, té tyah péle n gbah n yah.

⁶ Képah tǝne, Pyeri me yo ò tyí ne, pò ànê sǎn náh me pé tyí, òte kwâh nê-á me pé tyí, páh kɪ kéle à kǝ. Té ne: «Nasareti Yesu Krista yin yǝ, yuku ne n kǝ!»

⁷ Té me ò gbòyǝ sǝkǝ tǝ, à à yilki sah. Nénpǝ swǝ, sèkùkù dí gbyèh ànê ò létóhnì sǝ.

⁸ Á núkú yǝkǝ syɪkɪ ò gbyèh yǝ, à tyah n kǝ, té de péle Liyel ní-ńsah gbó sǝkǝ, me n kǝ, té n yǝkǝ n syɪkɪ, à Liyelle n gbilki.

⁹ No pól à wε à me n kǝ, me Liyelle n gbilki.

¹⁰ Pè me à yah pǐ ne, òmǝ-á ńkǝne n tǝ ò ne n ni n syi Liyel ní-ńsah gbó dé-ńsah sǝkǝ, nê-á pè n ye dé-ńsah Kètǎrlɛ. Té tir nê-á pɪ ò tyí, képah sò me kah pɪ yáh-ńsah tyénó ànê gbǝndùnne no pól tyí.

Pyeri Liyel wey yónóle tówù tyí

¹¹ Képah sǝkǝ, sèkùkù dí náh tǝ sò me ò syi Pyeri ànê Nsyǝ náh. Té gbǝndùnǐ kǎhnmǝnǝ tǝ tyí, névyɛ to pǝ pè mǝ gbǐ Liyel ní-ńsah gbó párn yó sò, nê-á pè n ye Salomo párnne.

¹² Pyeri-á képah we sě, à yo tówù tyí ne: «Yisrayel tǎn, kwâh nê pɪ, té tir mè pínó yé gbǎn du wé? Kwâh nê pɪ té yé ále n gbah n yah sě? Yé káh we ne ápi yǝngbǝ tǝnwɛnǝ, képah náh pɪ, á Liyel wǝkì tǝnó pèpɛy-á pɪ dí mènɛ à kǝ à kǝ dé?»

¹³ Á náh tǎn nónó-á pɪ Abrahmɪ, ànê Yisakɪ, ànê Nsyakobɪ, ànê pé no télóle, pépi Liyel ye

gbílkinó sah n̄ tònpi Yesu yõ, ñm̄o nê-á yé dahbu yõtãm gbò, té à yahle gběnyah yah tẽ-ò dí Pilati yí yah. Té Pilati mó t̄o s̄ò kè yah t̄ok̄o ne, pé à fin m̄o.

¹⁴ Nte ñm̄o nê-á me Liyel tyí yõ, té me négbíle Liyel yah, yé ñm̄o yahle, té pyè nékókè mó-ò w̄o f̄inm̄on̄o yah k̄o.

¹⁵ Té min nétẽ Yesu nê-á yé ko m̄o, yépi ntẽ ye kè we yíne, Liyel me n̄ lékó yilki m̄o.

¹⁶ Dí nê-á yé n yah yò, yé ñne n pne. Yesu yĩn yõ s̄énó gbò yõ sok̄o ye n̄ gbyêh me sũ. Yé pól yí yah ye Yesu yõ s̄énó dí mè de m̄o pnépné yò dé!

¹⁷ Nte núkúnúkú, á no, mé pĩ ne ñp̄-ñk̄ẽ sok̄o-á yépi ànê yé yõtãm ko m̄o Yesule.

¹⁸ Té Liyel-á lésõ n̄ t̄éntò syínyopu pól k̄o, pé nê yo sah di mónóle ne, Krista-á k̄i yèvyãhr̄i pi, képah ye à pi yò.

¹⁹ Káh pi s̄ẽ, yé yé nno vi m̄o, yè mó Liyel w̄èk̄i t̄ẽ, à k̄o à yé tyípêl yõ m̄o yé k̄o.

²⁰ Képah sok̄o, Tẽ ñgbẽ Liyel k̄i yèv̄ini gb̄ine yé k̄o, té k̄i Yesu Krista tek̄i m̄o yé k̄o, wãh s̄ò nê yah wilki sah yépi yinne.

²¹ Nte núkúnúkú, à yĩne à t̄ẽ yĩnyõ, f̄ó kè k̄ȳi syi tyi pól t̄õnsàhnó tyí, sépi nónó-á Liyel n̄ t̄éntò syínyopu k̄o pé sè yo sah ñgbò òk̄ùle, pépi nónó-á me n̄ tyí yõ.

²² Moyisi kè yo sah ñgbòle ne nk̄ẽ: <Yé Tẽ ñgbẽ Liyel k̄i yé sok̄o ney yó wilki m̄o yé k̄o n pi, à k̄i p̄o pi Liyel t̄éntò syínyo-òle ñm̄o tyí k̄õle.

Yé nε n nohnì n̄ tyí n̄ welo pól soko.

²³ Té nê-à yahle sàhnóle n̄ tyí yõ, tẽ tyí kɪ yɪkɪ, à kɪ ku to Liyel wẽnp̄i wró.*

²⁴ Nte gbĩ nê-á yé n wne yò,† képah tyí ye Liyel tẽntò syínyo-ò Samuyeli yo sah n̄ me gbĩ dùkùle, à tahlì Liyel tẽntò syínyopu téló tyí, nónó pól-á pɔ ñmɔ tyí náh.

²⁵ Yé yah, Liyel-á tyi nónó pól yo n̄ tẽntò syínyopu tyí, yépi yĩn ye à yo séle, à tahlì wáh lésò yégbékè kwrónmɔnɔ nê pi yé náh tãn tyí, nê-á à yo Abrahmì tyí nε níké: <Áwɔ pétóbé gbõ yõ, kèkõyó névye pól kɪ n̄ pèpɔri we.>‡ Kéne yégbékè kwrónmɔnɔ nê-á à pi yé náh tãnne yò, yépi tɔ vyãh me ké soko dò!

²⁶ Yépi ñgbò tyí ye Liyel tekɪ mɔ n̄ tònpi Yesule pèpɔri pi yinne yé tyí nε, à yé pól nénúkù núkú yohnì n mɔ yé kō yé tyítúkùnì pínó yal n mɔ.»

4

Yõtãm-á Pyeri ànê Nsyõ tuke sõ

¹ Képah tẽne, Pyeri ànê Nsyõ-á sò me wékínó soko tówù tyí sẽ, nósýó pɔ wil mɔ pé yõ. Sárká syínwilkipu yísýó ye sò, ànê Liyel ní-ńsah gbô syíkípú yõtẽne, à tahlì Sadusẽ névye yísýó tyí.

² Té kéne no foko sò me kah vyãh Pyeri ànê Nsyõne, pãh sõnpíle névyele n kwɔ nε, Yesu-á

* **3:23** 3.22-23 - Yah n te Tõnyonɔ 18.15,18. † **3:24** 3.24 - Gbĩ nê wnénó tyí-á n yo yò, Yesu me gbĩ tyí ye kè n yo. ‡ **3:25** 3.25 - Yah n te Yenesi 22.18.

ku té yilki mo, ànê lékyî to-á kú pò n yilki n mo n pi.

³ Képah sokò, pè pè tẽ. Té lékâh-á sò me mo n te sẽ, képah ye pè pè dah mo wòkònpèkè sokò, pópó à pò syi dīndal tyí.

⁴ Nte nónó-á Yesu tẽntò névyè kwónó noh, pé náhnáh Liyel wěkì tẽ. Káh pi sẽ, Yesu yõ sěpú no nẹpî kẹyõ nínó kyegbãm (5 000) kénkõle.

⁵ Képah sokò, ké dīndalle, Nsyifunò yõtãm, ànê kwil yèwàhnì, ànê Liyel tyi kònsàhnó kwópú wě tuke Yerusalemì sokò.

⁶ Sárká syínwìlkìpu yõtẽ ògbě An sò me ànê ò gbò tãn pólle. Pépi túkù ye sò pi Kayifile, ànê Nsyõne, ànê Alekisãdrele.

⁷ Képah tẽne, pè Pyeri ànê Nsyõ tẽ pò pé niyó, à pò pè piki yah ne, tẽnweno nê gbò yõ se, képah náh pi, nê yĩn yõ se pè pi dénmonò mènè ni?

⁸ Képah sokò, Liyel Mirki gbò yõ, Pyeri pè syah ne:

⁹ «Kwil yõtãm ànê yèwàhnì, áyáh pèpòri pi sèkùkù dí yó tyí, képah yõ sokò náh yé n piki n yah ále kweyne ne, sò se á pi, té à de mo di?

¹⁰ Yépi pól ànê Yisrayel tãn pól yĩne yè kè pĩ ne, Nasareti Yesu Krista yĩn yõ-á dí mènè yĩntěńóle yé yah sokò lènòle yò. Yépi ye syi Yesule dahnì yõ, té Liyel me ò lékó yilki mo.

¹¹ Nmò Yesu tyí ye yónóle Liyel wey sokò ne nkẽ: «Wòkò mópú-á yahle dáhkì nê mónkòńóle,

képah ye pɔ pi wòkò dáhgbíle.»*

12 Képah náh, Pyeri tǒ ne: «Yesu ó yǐn kɪ fě névye pwah mɔ. Né ñmɔ ó yǐn náh, yǐn yó ntě náh ñnî yó ntě kǒ kèkǒyó, nê-á kɪ fě névye min pwah mɔ.»

13 Tukey tükèpu sǒ pǐ ne Pyeri ànê Nsyǒ náh Nsyifunɔ kǎrn ñgbě pi, ànê pè náh me n mɔ n kǒ nénpó ùnne. Té pǎh n wɛkɪ nìsǎh ànê lékámne sě, képah me pé gbǎn du. Nte pè mó tǒ sǒ pǐ ne, pépi-á lésǒ Yesu kómûne.

14 Té pé yí-á mó tǒ sǒ me dí mè yǒ nê-á dénmonɔ we, tyiyóné náh tǒ we pé tyí.

15 Kǎh pi sě, pè Pyeripi kǒ pè wil tukey tükèpu ùnkɪ wró, té pépi me wě we pé yahle

16 té ne, sǒ se pé kɪ pi no nópile ni? Nkě, kǒli kǒli tě náh se mó tǒ kéle té. Yerusalemɪ tǎn pól-á pǐ ne, Pyeripi-á pi gbil mène.

17 Kǎh pi sě, pé ye kè yahle pé tyí dírí sǎko ne, pè káh tǒ Yesu yǐnne n yo ñnî yó ntě tyí. Képah-à pi, yǐ mè náh n tǒ n mɔ n yuku n pi yahle.

18 Képah tǎne, pè tǒ pè ye, té kè yahle pé tyí gbógbó ne, pé káh tǒ Yesu yǐn noh n yah pé vyěy yah, ànê pè káh tǒ kwónó pi ñ yǐn yǒ.

19 Nte Pyeripi pè syah ne: «Yépi ntě kè sǒ n yah kè: Kè se me yínénóle Liyel tyí, áyâh ñmɔ tyí ye, té yépi yóré fě syi?

20 Ápi tě wǎle, áyâh nê we, té nê noh, á náh fě n ye n pi sé yáhnóle.»

* 4:11 4.11 - Yah n te Gbálnó 118.22.

21 Képah tẽne, tukey tũkèpu tũ dírí gbah wo pé tyí, té pè fin mo. Pè náh sò me v̄-nsah we pé we fõh fõh tẽne, no pól-á sõnpíle Liyel yinne n gbilki Pyeripi tyípíkì mè yinne.

22 Té dí nê dénmõnõ-á sò pi gbille, à kah ye tikininíne.

Yesu yõ sěpú níríle

23 Páh fyò Pyerì ànê Nsyõ fin mo, sárká syínwìlkìpu yõtãm ànê yèwàhni-á nê yo pé tyí, pè kyì sè pól yãh pé kómú tyí.

24 Pé welo nóhntenõ náh, pé pól pé sõnõ pi núkúle, à Liyelle n ni ne nkẽ: «Tẽ ñgbẽ, áwo ye mo ȳinyõle, ànê sétáhle, ànê pne yole, à tahlì sé sokõ yiyìn pól tyí.

25 Api náh ney Davidi nê-á á tõnpule, áwo ye à kõ à kè yo á Mirki gbõ yõ ne nkẽ:

«Kwâh nê yúkúnyahlenõ me kwlo kwlo tyí?
Kwâh nê tyíkwê sõnõ me névye sokõ!

26 Kèkõyó yõtãm wẽ tyí mo,
té yah tãm to tuke mo, à pi núkúle,
pè Tẽ ñgbẽ Liyelle n fwo ànê ñ ney
yáhntõkõnõle.»†

27 Gbì yõ, kwil mè ntẽ sokõ, yõtẽ dí Yerõdì ànê gběnyah yah tẽ-ò dí Põse Pilati ye wẽ tyí mo, à tahlì Yisrayel tãh ànê kwlo kwlo téló tyí, pè á tõnpi Yesule n fwo, ñmo nê-á á ney yáhntõkõnõle.

† 4:26 4.25-26 - Yah n tẽ Gbálnó 2.1-2.

28 Yah, wáh lésõ á tẽnwenɔ sɔkɔ tyi nónó yah tɔkɔ sah á dɔɔ dɔɔ tẽnɛ, sépi ye pè pi.

29 Nte núkúnúkú, yah pè ápile n kyĩ n kǒ kè! Nìsǎh ñgbẽɛ á kǒ, à á weyne n yah n yo, ápi nónó-á á tǔnpɪɪɪɪ.

30 Tẽnwenɔɪɪ á kǒ, à yámpúɪɪ n de n mɔ, à mó gbɪɪ tyɪɪ n pi, á tǔnpɪ Yesu yĩn yǒ.»

31 Té fí nê sɔkɔ-á sǒ péle tükènmɔnɔɪɪ, nírí-á fyò n tyɛ, nénpó núkú yike. Képah tẽnɛ, Liyel Mirki pé pól tɔkɔ, pè tyah Liyel weyne n yah n yo n kǒ nìsǎhle.

Yesu yǒ sǎpú négbro me òúkùɪɪ wǎ tyí

32 Yesu yǒ sǎpú pól sǒ me n sǒ òúkù núkúɪɪ, té me ké tyí ne pé ne n pi òúkù núkúɪɪ. Pé sɔkɔ yó n̄tẽ náh sǒ me n yo ne, pé gbǎn yíɪɪ, pé gblǒy núkúní tyí-á séɪɪ. Té pé wǎ wró, pé pól gbǎn yí sǒ pi tówû tyíɪɪ.

33 Té tẽnwenɔ ñgbẽ sɔkɔ ye sǒ Tẽ ñgbẽ Yesu tẽn̄tǒ névyɪ pi ñ tyí yónwàhpu kègbɔɔɪɪ, à ñ tyíɪɪ n yo n kǒ ne, wáh ku té yilki mɔ. Té Liyel pèpɔɔɪ ñgbẽ sǒ me pé pól yǒ.

34-35 Swěy, képah náh pi, gbên-à sǒ me nónó tyí, pè séɪɪ n yǎm, ñ té sé pólɪ Yesu tẽn̄tǒ névyɪɪɪ n kǒ. Pépi n mó séɪɪ n dibi, à yĩne pé nénúkù núkú pól fyǎhnónɔɪɪ. Képah ye, yǎm pí-ò náh sǒ me pé sɔkɔ.

36 Té légbíne, Nsyosefu yó sǒ me, nê-á dubi Syipri gběnyah. Levi yĩkĩ ney ye sǒ ñne. Té Yesu

těntò névye me yĩn dyi à kǒ Barnabasile, nê kór-á sóré mǒ-òle.

³⁷ Nmo me ñ swāh yām, té me pǒ ké pǒle Yesu těntò névye gbò dahbi.

5

Ananiyasi ànê ñ kyí Safirale

¹ Nte dí yó lésǒ me pè n ye Ananiyasile. Nmo ànê ñ kyí Safira me pé sétáh yó yām, té yo sah núkú yǒ,

² à ké pǒ tǔkù kām sah. Képah náh, Ananiyasi me kyí ké pǒ téyne Yesu těntò névye kǒ.

³ Képah sǒkǒ, Pyeri me yo ñ tyí ne, Ananiyasi, sétàn yǒtě se pi sǒ té we de yíí ñ ni sǒkǒ sě, fǒó à pǒ mìnì yo Liyel Mirki tyí, té sétáh yǎmnó pǒ tǔkù kām sah ni?

⁴ Sétáh mè yām-ñkě gbíne, ñ yěngbě tyí kó sǒ kéle ni? Wǎh tǒ pǒ kè yām, ké pǒ kó pi ñmo tyíle ni? Nte yí mè dùkù pínó sǒno se pi sǒ, té de ñ ni sǒkǒ ni? Nkě, névye ó tyí náh à yo mìnìne dé, Liyel tǒ tyí-á.

⁵ Ananiyasi-á fyò kéne welo noh, à núkú syúku ku. Kǎh pi sě, nónó pól-á yí mè noh, tíkí pè kah tě.

⁶ Wǎh ku sě, kètēnpì me pǒ ñ lékó fǒkǒ, té à tǒkǒ kyí yí.

⁷ Képah náh, lérínó tǒnó kénkǒ sókónteno náh, ñ kyí pǒ de nénpó, té tir nê-á pi sǒkǒ, à náh sǒ me kè pĩ.

⁸ Pyerì me à syah ne, à yo pé syah, dan m̀e se ntyĩ̀nò p̀e yã̀m p̀e s̀etã̀h m̀ene ni? A me ne, àwe, k̀ene dan-á.

⁹ K̀epah soko, Pyerì me yo ǹ tyí ne, p̀e se pi s̀õ, té yo sah núkú yõ ǹ pele, à pò Tẽ̀ ñgbẽ̀ Mirki vyã̀h sòle n noh ni? A yah, nónó-á kyí yĩ̀ ǹ pe lékòle, pã̀h me pò n de yò. Té pã̀h ki ǹ to lékò toko n soko n pi.

¹⁰ Pyerì-á yo sẽ̀, nénpó swò, pi núkú syiki ǹ yah ùnne, à ku. K̀etẽ̀npì-á de kyí, p̀e kyí à we kúnòle. P̀e me à toko kyí yĩ̀ ǹ pe tnô.

¹¹ K̀epah soko, tíkí Yesu yõ s̀ẽpú ùnkĩ̀ pól kah tẽ̀, à tahl̀ tyi nópi nóhpú pól tyí.

Yesu tẽ̀ntò névye gbìl tyi náhnáh pínòle

¹² Liyel sò me n syõ Yesu tẽ̀ntò névye tyí, à gbìl tyi náhnáhle n pi névye niyó. P̀e sò me p̀e sònò pi núkúle ànê Yesu yõ s̀ẽpú téló pólle, té wẽ̀ne n tuke n m̀o Liyel ní-ńsah gbô párn yó sò, nê-á p̀e n ye Salomo párnne.

¹³ Nte no téló soko ney yó nítẽ̀ náh sò me ǹ niye n syã̀h n kwrò n m̀o pé soko. Té no pól mó tõ me p̀ele n kah n sò.

¹⁴ K̀epah soko, díbí ànê syó náhnáh sò me n s̀ẽ Tẽ̀ ñgbẽ̀ Yesu yõ, dòhnìnò kò k̀e n pi n yuku ǹ yõ s̀ẽpú yõ.

¹⁵ Kã̀h pi s̀ẽ, névye tyah n wil pé yámpúle, à p̀ele n sah n pò pàl yõ, k̀epah náh pi, s̀ẽ s̀ẽ yĩ̀ yõ wã̀l yey soko, ne Pyerì-à pò n soko, té ǹ mírkí we m̀o pé soko ney nê yõ, tẽ̀ we de.

¹⁶ Yerusalemì gbòplo kwlo névyè náhnáh nítě to sò me pé yámpúle n tẽ n pɔ n pɔ, à tahl névyè tyí, sétàn-á sò me nónónè n kwlo. Té pé pól sò me dénmonòle n wè.

Yesu tẽntò névyè fòhnóle

¹⁷ Képah tẽne, sárká syínwìlkìpu yòtě ògbě ànê ò náh névyè pólle nónó-á Sadusě névyèle, pé tyah dyóyókìle n pì Yesu tẽntò névyèle,

¹⁸ té pé tẽ kyì dah mɔ wòkònpèkè sòkɔ.

¹⁹ Nte lékâh-á pɔ mɔ, Tẽ ògbě yínyò tònpi yó pɔ wòkònpèkè mè yah yíkì mɔ ànê ké sòkɔ táh vî yeyne, à Yesu tẽntò névyè wilki, té yo pé tyí nɛ:

²⁰ «Yé kyì Liyel ní-ńsah gbô sòkɔ, yè kyì min sán tyi nópi pól yo névyè tyí.»

²¹ Wey mè-á yo pé noh sě, séngbɔ púpúle, pé me yuku kyì Liyel ní-ńsah gbô sòkɔ, à kyì tyah kwónóle n pì.

Légbíne, sárká syínwìlkìpu yòtě ògbě ànê ò náh névyè me kyì tukey tükèpu tìnkì ye ànê Yisrayel gběnyah yèwàhni pólle. Té me sràsyíbì tó nɛ, pé kyì Yesu tẽntò névyè wilki n pɔ wòkònpèkè sòkɔ.

²² Nte páh kyì yíni tẽ, pé náh pé wè wòkònpèkè sòkɔ. Pé me pé syì pɔ ké yah yo pé yòtám tyí nɛ níkě,

²³ páh kyì wòkònpèkè yah wè tẽnmonòle palle ànê ké sòkɔ táh vî yey tole, sé syíkípúle tẽnóle

pé tẽ-ntàn sòkò. Nte páh se mó tǒ sè yúkì mọ de, pé náh ney we sé sòkò.

24 Páh yo sě, yĩ mè nóhnó Liyel ní-ńsah gbô syíkípú yòtẽ dí ànê sárká syínwìlkipu yòtãm fòkò fil. Pè me wěne n piki n yah Yesu tẽntò névye tyí-á pì òkù nêne.

25 Páh me képah sòkò, nnî yó pọ yo pé tyí ne, névye nónó-á pé dah mọ wòkònpèkè sòkò, páh me névyele n kwò Liyel ní-ńsah gbô sòkò.

26 Képah tẽne, Liyel ní-ńsah gbô syíkípú yòtẽ dí n no tẽ, à pé nyáh sǒ. Páh kyì, tíkí pé tẽ ne páh kì ne pé pé tẽ gbùgbù, névye káh pọ pé minkì ko dyèhle. Káh pì sě, pé pé ye yárr, à sòkò.

27 Páh kyì yĩni tẽ péle tukey tükèpu tĩnkì tyí, sárká syínwìlkipu yòtẽ ògbě me pé syah ne,

28 pé kó lésǒ kè tũ pé tyí ne, pé káh tǒ kwónó pì n yah dí mè yĩn yǒ nì? Té pé yah, páh pé kwónó tǒ mọ Yerusalemì kwil pól sòkò, té tǒ me n kũ plòle n twah pépi yǒ kè!

29 Nte Pyerì ànê Yesu tẽntò névye tǐlọ me yo pé tyí ne: «Á kì Liyel dyọ yǐ tẽ ye sǒ, té kì névye tyíle n pì?

30 Yesu nê-á yé ko mọ dahni yǒ, á náh tǎn Liyel ye n lékó yilki mọ,

31 té à yǒ òkò sòkò, à kyì à sah n gbòyò sǒle. Té à pì yòtẽne, ànê pwáhnmo-òle ne ríkě, òmọ gbò yǒ Yisrayel tǎn fě pé nno vi mọ, pé mó pé tyípèl yǒnmọne we.

32 Kéne tyi nónó-á Liyel pì, ápi ànê Liyel Mirki

ye sé yónwàhpu kègblole, wǎh képah nêne névye kǒ, nónó-á sah ò tyí yǒ.»

³³ Képah tǎne, tukey tükèpu ònkì-á welo nópi noh sǎ, pé foko kah vyǎh, fókò pé sǒ me ké tyí ne, pé Yesu tǎntò névye ko mo.

³⁴ Nte Farisiyǎ ney yó sǒ me pé soko pé n ye Kamalyelile. Liyel tyi kònsàhnó kwó-ò yó ye sǒ òne, nê-á névye pól me yòyénne n sah ò yǒ. Nmo me yuku yin tukey tükèpu ònkì niyó té ne, pé Yesu tǎntò névye wilki mo kégbó kwéy átre.

³⁵ Pǎh wil, à ò syi yo pé no tyí ne: «Á no Yisrayel tǎn, yé yé gblǒy kyomì yǎ yé tyípínó soko, à yuku díbí nópi òinne dé!

³⁶ Ké nǎh tǒnì pi di mónóle kah, gbí nê-á Tedaṣi me yuku ò gblǒy pi ne, né-ògbǎ-á péwole, té díbí nǎpí kyeyéh (400) sǒno vi mo pé kǒ pé ò sǒ tǎ. Nte wǎh po ko mo, ò sǒ tǎpú pól nǎh karkì di? Ney se tǒ wǎ?

³⁷ Nmo tyí sókóntenó nǎh, Kalile gbǎnyah dí Nsyudaṣi me tǒ yuku kéne gbǎnyah névye yǎh gbíne, à pé nǎhnǎh yó yiki pé kǒ pé ò sǒ tǎ. Nte ò tǒ nǎh po ko mo, té ò sǒ tǎpú me karkì di?

³⁸ Képah ye núkúnúkú tǎne, mé kéle n yo yé tyí, yé yé vyǎy de no nópi tyí soko, yé mó pé fin mo pé ne n yuku. Pé tir yáhnatokono, képah nǎh pi, pé tyípínì mè-à ki me wil névye tǎ tyí, kè ki tye ké gblǒy.

³⁹ Nte kǎh ki me wil Liyel tǎ wo tyí tótó, yépi nǎh fǎ kè yiki n pi. Yé kyòmínó pi, yé kǎh po

tyah Liyel wole n fwo dé!»

Kamalyeli-á yo sě, pé no sah ò tyí yõ.

⁴⁰ Pè me tǝ Yesu tǝntǝ névye ye de, à po pé ko yéfõhle. Té kè yahle pé tyí ne, pé káh tǝ Yesu tyíle n yãh, té pé fin mo.

⁴¹ Nte Yesu tǝntǝ névye sǝ me òvìvì soko kègbule, pãh n yal tukey tükèpu tǝnkǝ wró gbí nêne, pãh sǝnpúle kè kyomì we ne, pãh yĩne fǝhnóle Yesu yĩnne.

⁴² Képah soko, sǝmesó pé n ne n me Liyel ní-ńsah gbô ànê kétlo soko, ò névyele n kwô, ò té Òvìvì tirlè n yo pé tyí Yesu Krista tyí yõ.

6

Yõke tǝnsàhndibipu yáhnwìlkìnóle

¹ Légbíne, wãh sǝ me n mo Yesu tǝ sáhpú nédán yõ. Képah soko, Kreki wey wékípú tyah n weki ne, sǝmesó pé no Yebre wey wékípú-á me n syki pépi pékúsyô yõ yõke dibi gbíne.

² Káh pi sě, Yesu tǝntǝ névye népǝ gbõnimí me Yesu tǝ sáhpú tówú pól ye tuke, té yo pé tyí ne, kè náh yĩne pépi Liyel wey yónó yal n mo, pé mó de tǝ yõke díbínó soko.

³ Képah-á, pé yúnpyé, pé díbì népǝ kwãrnimi yah n wilki pé soko, nónó yĩngbí-á me n yo, té Liyel Mirki me pé tǝko, ànê lékám me pé soko. Páh ki tǝ mè dahbi pépi gbõ.

⁴ Káh ki pi sě, pépi-á ki mó yõ soko nírí pínó ànê Liyel wey yónó tǝle.

⁵ Képah soko, pãh nê yo, tówû pól kè fẽ syi. Pè me Yetyẽni yah wilki, òmò nê Liyel yõ sɛnó-á sò me gblò, té Liyel Mirki me à tókò. A tahlí Filipi tyí, ànê Prokòrile, ànê Nikanòrile, ànê Timole, ànê Parmenasile, ànê Antyosyi kwil Nikolasile, òmò nê-á lésò vi mò de Nsyifunò Liyel nínó wěkì soko.

⁶ Té me pépile Yesu tɛntò névyè wěki. Pépi me pé gbãn sah pé yõ nírí pínó soko, à sãm mò pé soko.

⁷ Képah tɛne, Liyel wey sò me n tɔ n mò n yuku, té wãn me n mò n yuku náhnáh Yesu tò sáhpú nédán yõ Yerusalemi kwil. Sárká syínwìkìpu tò náhnáh sò me fẽ syi sɛ Yesu yõ.

Yetyẽni tɛnóle

⁸ Yetyẽni sò Liyel pèpòri náhnáh we ànê n tɛnwenòle. A sò me à tókò à gbíl tyile n pí névyè nuyó.

⁹ Képah tɛne, Nsyifunò tyah yékâble n pí Yetyẽnne. Pé tókùle, Liyel ní-nsah wòkò nê-á pè n ye yòri soko wìlpu wòkòle, képah névyè ye. Pè n wìl Sirenì kwil ànê Alékisádri kwil. Pé tókù me n wìl Silisi gběnyah ànê Asi gběnyah soko.

¹⁰ Té Liyel Mirki gbò yõ, Yetyẽni sò me n wèkì lékámne. Képah ye, no nópi náh me tɛ we n wèlòle n kòlì.

¹¹ Képah tɛne, pè kyì nòsyó tókò pòle ne pè pò yo ne, páh à we à me Moyisi ànê Liyel tyíle n yo n yiki.

¹² Pè képah pi, à tówû, ànê yèwàhnì, ànê Liyel tyi kònsàhnó kwópú mɔ Yetyěni yõ, pè kõ pè à fyãh tẽ yuku ñne tukey tükèpu tĩnkĩ tyí.

¹³ Té tõ tàrfyò mìnnyobe yísyó yah, à yuku péle ne pè kyı yo ne, dí mè náh me n yal n mɔ Liyel ní-ńsah gbô ànê Moyisi tyi kònsàhnó tyí yónyıkınɔle.

¹⁴ Páh kè noh ñ vyãh yah à me n yo ñtẽne ne, kéne Nasareti Yesu mē-á kı pɔ Liyel ní-ńsah gbô sɔ n pi, té Moyisi-á pé kwɔ wãl nónónne, wãh kı sé tɔ vi mɔ.

¹⁵ Képah sɔkɔ, tukey tükèpu tĩnkĩ pól tyah Yetyěni ne n yah díkídíkí, té ñ yah we kè me yĩnyõ tõnpı tyí kõle.

7

Yetyěni Liyel tyi yah yónóle

¹ Képah sɔkɔ, sárká syínwĩlkĩpu yõtẽ ñgbẽ me Yetyěni piki yah ne, no-á nêne n yo ñ tyí sɔkɔ, gbı se kéle ni?

² Yetyěni me yo ñ tyí ne: «Ñ súbí ànê ní yúnpyé, yé noh ní tyí. Gbí nê-á lésõ á náh ney Abrahamı náh tõnı me yal yuku Yarã kwil sɔkɔ, tõrí nétẽ Liyel ye lésõ wil ñ yah Mesopotami gběnyah,

³ té me yo ñ tyí ne: <Yal á gběnyah ànê á kéte tãn wró, ñ yuku gběnyah yó sɔkɔ, nê-á mé kı ñ wẽkı n pi.>^{*}

* **7:3** 7.3 - Yah n te Yenesı 12.1.

⁴ Képah sɔkɔ, Abrahmɩ yal Kalde tãn gběnyah sɔkɔ, à kyɩ tẽ Yarã kwil.† Képah náh, n̄ sú-á pɔ ku tɛ, Liyel mɛ à kɔ̄ à yal Yarã kwil, à pɔ tẽ gběnyah m̀è sɔkɔ, n̄ê sɔkɔ-á yépile núkúnúkú yò.

⁵ Té Liyel náh sò sètáh yó òtẽne à kɔ̄ n̄ tyíle ásò. Gbáhsúkí kénkɔ̄ fyé tyahle, à náh kéle à kɔ̄. Nte à n̄ vyãhle à kɔ̄ nɛ, páh kɩ pɔ gběnyah m̀è pólle à kɔ̄. Té kãh kɩ tɔ̄ pɩ n̄ pètóbé tɔ tyíle, òmɔ k̄é náh òtẽ sɔkɔ. Té légbíne, pi òtẽ náh sò mɛ Abrahmɩ tyí.

⁶ Liyel mɛ tɔ̄ yo n̄ tyí nɛ: <Á pètóbé kɩ pɔ wil kɩ kyɩ n̄ tẽ n̄ pi gběnyah káhkí sɔkɔ. Nénpó sɔkɔ pè kɩ n̄ pɩ n̄ pi yòbɩle, té kɩ fóhnó wɛ, pópó ye kyeyéh (400).>

⁷ Nte gběnyah káhkí n̄ê sɔkɔ-á péle yòrɩ sɔkɔ, òmɔ Liyel tukey kɩ n̄ syɩkɩ n̄ pi kéne gběnyah tãn yò. Té képah náh, pè kɩ wil yòrɩ sɔkɔ n̄énpó, kɩ pé syɩ pɔ òmɔ ȳin gbilki ásò.>

⁸ Képah yóntenɔ náh, Liyel mɛ yégbékè kwɔɔ mɔ Abrahmɩnɛ, képah n̄ê-á kɩ sò n̄ w̄ɛkɩ n̄ pi kòkè kònó sɔkɔ. Képah ye, Abrahmɩ-á pɔ Yisakɩ dubi, à mɛ à kɔ̄ n̄ dúbínó sèp̄in kwártɔ-ò sòle. Yisakɩ tɔ mɛ pɔ n̄ pídí Nsyakɔbɩ kɔ̄. Nsyakɔbɩ tɔ mɛ pɔ n̄ d̄inpi n̄épi gbõnimí kɔ̄, pépi nónó-á ápi yìkìni gbõninó náh tãne.

⁹ Képah náh, á náh tãn pɔ tyah pé gběndí Nsyosefu dyɔle n̄ yo. Té à tẽ yãm yòle, pè kɔ̄ pè

† 7:4 7.4 - Abrahmɩ lésò mɛ Kalde gběnyah sɔkɔ, Mesopotami sètáh yò.

sokɔ̀ n̄ne Yesyipti gběnyah. Nte Liyel sò me Nsyosefulẹ.

¹⁰ A n̄ yò wilki yènvyãhnpèl nópi sokɔ̀, té lékámne à kò yíí, té Yesyipti yòt̃ě dí Farawò yí kò kè yuku n̄ne. Képah sokɔ̀, à me à pɪ n̄ gběnyah àn̄ê n̄ t̃órí kéte pól yah t̃ě-òlẹ.

¹¹ Tě kwénpèkè yó pɔ de Yesyipti gběnyah àn̄ê Kanah gběnyah pól sokɔ̀, à pɪ yèvyáhrɪ n̄gběne pé tyí. Ké pékénkàhn̄m̄on̄o t̃ě tyí, á náh t̄an náh t̃ó sò me kwáh yó r̄t̄ēne n we n yò.‡

¹² Tě Nsyakɔ̀bɪ-á pɔ kè we noh ne, yòke-á me Yesyipti sokɔ̀, ké gbenne, à á náh t̄an tekɪ mɔ nénpó, pè kyɪ yòke yah pɔ, pépi nónó-á n̄ w̄ēnp̄ilẹ.§

¹³ P̄ah t̃ó pɔ pé syɪ yuku ke ní-òlẹ, Nsyosefu me n̄ gbl̄oy tyí yo wah n̄ nénkyíbí tyí. K̄ah pɪ s̄ě, Farawò me Nsyosefu duku w̄il-n̄sah p̄í.

¹⁴ Képah sokɔ̀, Nsyosefu t̄ěnt̄ò mɔ ne, pè kyɪ pé sú Nsyakɔ̀bɪ àn̄ê n̄ no pól t̃ě n pɔ. Pè sò me n̄ép̄i tikit̄óní pó gb̄am pó kwlólẹ.

¹⁵ S̄ě ye Nsyakɔ̀bɪ me yuku pɔ t̃ě Yesyipti gběnyah sokɔ̀. A syɪ pɔ ku nénpó àn̄ê á náh t̄an tɔ pólẹ.

¹⁶ Pé lékyî me twah kyɪ yí Sisyemɪ kwil diki yó sokɔ̀, n̄é-á lésò Abrahmɪ dwe Yemɔrɪ w̄ēnp̄i tyí.

‡ **7:11** 7.11 - Kanah gběnyah me ye pè n ye Yisrayel gběnyahle núkúnúkú. § **7:12** 7.12 - Yáh we pè ne kwekɪ-á de Yesyipti gběnyah sokɔ̀, té t̃ó ne Nsyakɔ̀bɪ-á yòke tyí noh nénpó, Liyel lésò lékámne Nsyosefu kò à yòkele n koh n sah, yòke pekɪ gb̄ine. Képah ye yòke kò kè pɔ we nénpó.

17 Liyel-á lésõ ò vyãhle Abrahamı kã nê yĩnne, ké pı gbí-á pɔ n nɔ, ápi no kwel náhnáh Yesyipti sɔkɔ.

18 Té yòtẽ késán yó-á pɔ dɔkɔ Yesyipti yõ, òmò náh sò Nsyosefulɛ n pɛ.

19 A me vi syıki á no yõ. N népékè kàhnmonɔ tẽ tyí, à á náh tãn kyĩ mɔ, pè kã pè pé wẽnpĩ yrɔ milki sah kégbó pé ku yĩnne.

20 Légbí mè ó sɔkɔ ye Moyisi dubi. A kah ple yíí, ànê ò tyí nɔ Liyel tyí. Pè à pu òwǒlɔ tǒnó ò sú gbô.

21 Képah náh, pè à tɔkɔ kyı milki.* Farawõ písê me à we tɔkɔ. A pɔ à pu ò yẽngbẽ pídí sǒ.

22 Kãh pı sǐ, lékám tyi nónó pól-á sò me Yesyipti sɔkɔ, Moyisi kwónó we sé pól yõ. Képah ye, à pı wèntãhnì wékí-òlɛ ànê tyítãhnì pí-òlɛ.

23 Té wãh pɔ nɔ ye tikininine gbí nêne, à kè sò we nɛ, páh kı kyı yah pé yúnpyé Yisrayel tãn tyí.

24 Wãh kyı, à kyı yĩne ò tyí névi yóle, Yesyipti nɛy yó me n fõh. Moyisi tyí névi fõhnó yrɔ tẽ tyí, à ò vyãh syi, à Yesyipti nɛy mè ko mɔ.

25 Moyisi sò me n sò nɛ, pé no Yisrayel tãn-á kı n pĩ n pi nɛ, Liyel-á kı péwɔ tɔkɔ, kı pè wilki n pi pé yõrı sɔkɔ. Nte pè náh tẽ we kè pĩ ò tyí.

26 Ké dındalle, à tǒ kyı Yisrayel tãn népĩ ními yısyó we, pè me n fwo. A nɛ pé pè syi mɔ, té yo pé tyí nɛ, pé no, pépi ó-á pé yahle. Té kwãh nê se pè wẽne n fõh nı?

* 7:21 7.21 Yah n te Yálnó 1.22 - 2.10.

27 Nte nê-á sò n fõh n ní-òle, òmɔ Moyisi syah ne òkě, nê se sah òne pépi yòtẽne ànê pé tùkè-òle ni?

28 Péwɔ kònmɔ-ńsah káh kɪ nê, á n yah n kò, wǎh òníníne Yesyipti ney mè ko mɔ sɔ́ dé?

29 Wǎh fyò képah yo, Moyisi to, té kyɪ tẽ Madyã gběnyah sɔkɔ, à syi pɔ dínpi nérí ní mí we nénpó.†

30 A tẽ nénpó, pópó à ye tikinini pi. Képah náh, sò yóle, à sò me gběnnɪ sɔkɔ, Syinayi yòlɪ gbòpɔ, té yĩnyò tònpi yó wil n yah nyàh lépɔ sɔkɔ, nê-á sò me n kò dukuni yó sɔkɔ.

31 Yí mè wénó pi gběndùnìne Moyisi tyí. Té wǎh me n nɔ n de ne, pé kè we yah yíí, à Tẽ ògbě yónmɔnɔ noh ne òkě:

32 <Á náh tǎn Liyel ye òmɔle, Abrahmɪ, ànê Yisakɪ, ànê Nsyakobɪpi Liyelle.> Képah tẽne, tíkí Moyisi tẽ, fósò n wil n syah. A náh tǔ n ni syǎh n yah yó yah.

33 Képah sɔkɔ, Tẽ ògbě me yo n tyí ne: <Tyah nê sɔkɔ-á ále yò, nénpó me òmɔ tyí yò. Képah ye, á lékyèh de.

34 Mé ní no kwɔlò dùkù we yíne Yesyipti gběnyah sɔkɔ, té pé gbìnó yínpɔ́ noh. Mé pɔ pé wìlkì-ńsah pé yòrɪ sɔkɔ. Képah ye, sɔkɔ! Mé ále n tækɪ mɔ ké tyí sɔkɔ núkúnúkú Yesyipti sɔkɔ.>‡

35 Té kéne Moyisi nê-á lésò Yisrayel tǎn yahle, té à syah ne òkě, nê se sah òne pépi yòtẽne ànê

† 7:29 7.27 - 29 - Yah n te Yálnó 2.11 - 15.21 - 22. ‡ 7:34 7.30-34 - Yah n te Yálnó 3.1-10.

pépi tükè-òlè nı? Nmo ó ye tǒ Liyel tekı mo
yòtǔne ànê pwáhnmo-òlè yínyò tǒnpi gbò yò,
nê-á lésò wil n yah dukuni soko.

³⁶ Moyisi ye wilki Yisrayel tǎnne Yesyipti
gběnyah soko, té pne yónsyâh kah péle, té tǔ
péle gběnnı soko pópó ye tikininı. Liyel gbò yò
ye à pi sépi pólle gbıl soko.

³⁷ Té nmo ye tǒ yo Yisrayel tǎn tyı ne: <Liyel
kı ye soko ney yó tekı n mo n pi. Á kı po pi
Liyel tǔntò syınyo-òlè nmo tyı kòle.>§

³⁸ Gbí nê-á sò Yisrayel tǎn me tükènmònlè
gběnnı soko, nmo ye tǒ sò we syi yínyò tǒnpi
tǔntòlè Syinayi yòli yò, à po yo á náh tǎn tyı. Sǔ
ye à we syi min welòlè Liyel tyı, à yo á tyı.*

³⁹ Nte á náh tǎn náh fǔ syi sah n tyı yò. Pè à
yahle, té sò me n sò ne, pé pé syi yuku Yesyipti
soko,

⁴⁰ té me yo Arǒ† tyı ne: <Moyisi nê-á tǔ wil
ápilè Yesyipti soko, á náh tǒ me pı, kéne Moyisi
tyı-á me pi sǔ dé! Képah ye, yı yısyó pi á kǒ
líyelnlè, sè á yahle n tǔ.>‡

⁴¹ Kéne sèpìn soko, pé me tǒ yó mo náhpír
kètòlè, té sárká wilki ké yò, à nìvìnì syáh syah,
à pé gběnpını gbilki.§

⁴² Képah tǔ soko, Liyel n náh vi pé kǒ, té pé
fin mo sah nǔwǒ kèpye gbılkinó soko, sǔ-á Liyel n

§ **7:37** 7.37 - Yah n te Tǒnyono 18.15,18. * **7:38** 7.38 - Yah n te
Tǒnyono 5.1-33, ànê Yálnó 19.1 - 20.17. † **7:40** 7.40 - Arǒ mène,
Moyisi nénkyı dí ye sǔ nne. ‡ **7:40** 7.40 - Yah n te Yálnó 32.1.

§ **7:41** 7.41 - Yah n te Yálnó 32.2-6.

těntò syínyopu kǒ pè kè wārki sah pé sébéy
sokò nɛ nkě:

‹Yisrayel tǎn, yáh yípêy nónó ko sárkále
pópó ye tikinini gběnni sokò,
yé se me n sǒ nɛ, ñmò tyí-á yé ko sélé?

⁴³ ǾǾ dé! Yé tò nê yĩn-á Molokule, képah yèpir ye
yé twah,

à tahl yé ñwǒ kèpil tò tyí tyí, nê-á yé n ye
Wrefanne.*

Kéne tǎn ye yé pi sah yé gblǒy tyí, té sélé n
gbilki.

Képah ye, mé ki yé tǔ sokò, fǒó Babilonu kwil
náhle.>»†

⁴⁴ Képah yóntenò náh, Yetyěni tǒ yǒ sokò yo
pé tyí nɛ: «Á náh tǎn-á sǒ me gběnni sokò gbí
nêne, yèpir yó sǒ me pé tyí, nê-á n wěki nɛ,
Liyel-á me péle. Liyel sǒ kè yah kǒ Moyisi tyí
nɛ, à yèpir mè pi sǒ-á pé à wěki ké pínóle
gbrámgbám.

⁴⁵ Képah náh, á náh tǎn pò yèpir mène pé
wěnpǐ kǒ. Nsyosye ye sǒ pi pé yah tǔ-òle, pè
yuku kéne yèpirle à kyi nékáhbí gběnyahnó syi,
Liyel-á nónó yĩni yal. Képah sokò, yèpir mè me
tǔ nénpó, pópó à pò syi yǒtǔ dí Davidi gbí tyí.

⁴⁶ Té Davidi tyí sǒ kah nò Liyel tyí. Képah
sokò, ñ tò mó Liyel ni nɛ, à ye pé wòkò yó mò à
kǒ, ñmò nê-á Nsyakòbi Liyelle.

* **7:43** 7.43 - Molokú ànê Wrefanne, Nsyifunò tnhò tǔpu tǎn yísyó
ye sǒ sélé. † **7:43** 7.42-43 - Yah n te Amosí 5.25-27.

47 Té ò pídí Salomo ye pɔ pɪ kéne wòkò mɔ̀-òle Liyel tyí.

48 Nte Yòtah Liyel náh mó tǒ n tẽ névi gbò wòkònmonɪ sɔkɔ, sǒ-á Liyel tẽntò syínyo-ò yo kéle ne,

49 Tẽ ògbě-á ne nkě: <Yínyõ ye pɪ ní tǒrí kǒle, sétáh me pɪ kòpírle, ní gbáhkì súnsàh-̀nsahle. Té wòkò nê dukù me yé kɪ fẽ mɔ̀ òmɔ̀ kǒ wé? Nmɔ̀ se kɪ fẽ tẽ yépi wòkònmonɪ sɔkɔ?

50 Nmɔ̀ gběnpɪnɔ náh yíyìn pólle di?>»‡

51 Képah náh, Yetyẽnɪ tǒ yo tukey tükèpu tyí ne: «Nikisekókó névyé nópi, yé yé nno ànê yé ní tah tũ, à yahle Liyel wey nóhnóle, té me Liyel Mirki yahle pɔ kwey nɔ. Yé me yé náh tǎn tyí kǒle.

52 Liyel tẽntò syínyo-ò yó ntẽ se me, nê-á yé náh tǎn náh à fõh yah? Négbí nê-á Liyel tyí, nónó-á ò pónó tyí yo sah kèkõyó, pè náh pépi tɔ ko mɔ̀ di? Nte núkúnúkú, kéne négbí náh yépi vi ò náh, té à ko mɔ̀ di?

53 Yínyõ tǒnpɪbɪ ye Liyel tǒ, pè pɔ Liyel tyi kònsàhnó yo yé tyí. Té yé yahle kólóle sé wǎl yǒ.»

Yetyẽnɪ kònmonɔle, ànê kǎh yĩne Sole tyí sǒ

54 Yetyẽnɪ-á welɔ nópi yo sě, kè tukey tükèpu kah yo kah mɔ̀, fóó pè pé yníne n tah yro tẽ tyí.

55 Nte Liyel Mirki tẽ-á me Yetyẽnɪ tɔkɔ sě, à tyah yínyõle n yah díkídíkí, té Liyel tǒrí we ànê Yesule yúkúnýĩnntě́nóle Liyel gbòyò sòle.

‡ 7:50 7.49-50 - Yah n te Yesayi 66.1-2.

56 Képah tẽ sɔkɔ, à ne: «Yé yah, mé me yínyõle n yah yíkinmɔnɔle, té Névi Pídí me yúkúnyĩnnɔle Liyel gbòyò sòle.»

57 Névyé-á képah noh sɛ, pè gbo mɔ wòhòh, té pé ní sni tũ, té to tuke pé pólle ò yõ.

58 Té à yorɪ wil kwil náhle. Képah sɔkɔ, nónó-á sò pè ye pɔ pɪ tàrfyòle, pépi me pé fwòmò-̀ngbɔ de sah kètɛnpikĩ yó tyí, nê-á pè n ye Solele. Té pè tyah Yetyɛnɪne n minki dyêhle, ò ku ku tẽ yõ.

59 Nte pãh me Yetyɛnɪ mínkínó sɔkɔ dyêhle sɛ, à sò me nírilɛ n pɪ ne nkɛ: «Tẽ ògbɛ Yesu, ní min yohnɪ n syi.»

60 Té me ò gbètukunɔ di, à yo yĩnpɔ ògbɛne ne: «Tẽ ògbɛ, káh pé tyípekè mè mɔ n kò.» Képah yóntenɔ òsò, à ku.

8

1 Té pãh à ko mɔ sɛ, képah nɔ Sole tyí.

Sole-á Yesu yõ sɛpú fõh òkù nêne

Képah sɔkɔ, Yesu yõ sɛpú tĩnkĩ kàhnfõhnɔ núkú tyah Yerusalemɪ sɔkɔ lésòle. Kãh pɪ sɛ, à wil Yesu tẽntò névyé tyí sɔkɔ, Yesu yõ sɛpú téló pól to karkɪ de kwlo sɔkɔ, nónó-á me Nsyude gbɛnyah ànê Samari gbɛnyah sɔkɔ.

2 Nte névyé nónó-á sò me Liyel wɛkì tɛnó ple, pé yísýó me Yetyɛnɪ lékó tɔkɔ yĩ, té ò kũ pò kah gbo.

3 Nte Sole tẽ wɔ sò me n yah n kò Yesu yõ sɛpú tĩnkĩ duku tó-̀nsahle pnépné. A sò me n de n kò

gbên sòkò, à Yesu yǒ sěpú díbí ànê syóle n tẽ n yorù n wilki n dah n mọ n pọ wòkònpèkè sòkò.

Filipi Liyel wey yónóle Samari gběnyah sòkò

⁴ Képah sòkò, Yesu yǒ sěpú nónó-á sò karkù kǒ, pépi mó me Nìvìnì tirlè n yo n kǒ tǎntǎn pól sòkò.

⁵ Té pé sòkò ney nê-á pè n ye Filipile, òmọ me kyì kwil yó, Samari gběnyah sòkò, à kyì tyah Krista tyíle n yo nénpó.

⁶⁻⁷ Képah tẽne, sétǎn kwĩnki nónó-á sò me déntěnóle névyè sòkò me péle n kwìl, sè sò me n kah n de n syi, té n wil pé sòkò, té wil kúnó névyè ànê gbáhkì nùkú névyè náhnáh tọ sò me dénmọnole n we. Képah sòkò, tówù-á Filipi gbìl pínó tyí yónó noh, té kyì sè we sě, pé pól pé sòno pí nùkúle, à n wèlọle n tǒ n sah n nohnì.

⁸ Kǎh pí sě, nìvìnì ògbě we kéne kwil.

⁹ Té légbíne, dí yó lésò me pè n ye Simole. A sò me tẽnóle kéne kwil mè ó sòkò di mónóle. Nmọ sò me snèy tyile n pí, nónó-á me Samari gběnyah tǎn gbǎn du kègbule, té me n gblọy pí né-ògběne.

¹⁰ No pól sò me mọ òne, à tọkọ wěnpì tyí, à kyì sah yèwàhnì tyí. Té me yo tũ ne òkě, Liyel tẽnwenọ nê-á pè n ye Ngběne, képah-á dí mènè.

¹¹ Té dí mè sò me gběndùnìne n pí pé tyí n snèy sòkò di mónóle, képah ye pè kǒ pè mọ òne.

¹² Nte Filipi-á pọ Liyel tǒrí Nìvìnì tir ànê Yesu Krista tyí yo pé tyí sě, pè sě ké yó. Té díbí ànê syó me à kǒ à pè wèl wilki ni sòkò.

13 Képah sɔkɔ, Simo ntě to sě Yesu yõ, té Filipi kɔ à à wel wilki ni sɔkɔ. A náh tɔ sò me ké tyí ne pé yal Filipi tnô. Té gbíl tyi ñgbnɔ nónó-á sò me n pɪ à n yah, sè sò me pɪ gběndùnñe ñ tyí.

14 Képah tēne, Yesu tēntò névyé-á tē Yerusalemɪ kwil, té noh ne Samari gběnyah tăn-á Liyel wey fě syi sě, pè Pyeri ànê Nsyõ tekɪ mɔ pè kɔ.

15-16 Páh kyɪ de Samari sɔkɔ, té Yesu yõ sěpú nónó we nénpó, Liyel Mirki náh tñnì sò me tiki pé sɔkɔ yó ntě yõ. Pè sò me wèlnwìlkìnó we ni sɔkɔ Tě ñgbě Yesu wɔ yĩn yõ. Káh pɪ sě, Pyeri ànê Nsyõ me tyah nírìle n pɪ pé tyí, ne pè Liyel Mirki we.

17 Pè sò me pé gbàn sah no nópi yõ à nírìle n pɪ pé tyí. Képah sɔkɔ, pè me Liyel Mirki we.

18 Képah tēne, Simo-á kè we Yesu tēntò névyé pé gbàñne n sah pé yõ, pè kɔ pè Liyel Mirkile n we sě, à pɔ póle Pyeripi tyí,

19 té ne, pè péwɔ to kɔ kéné tãhkìle. Képah sɔkɔ, páh fyò pé gbàn sah nê yõ, tē Liyel Mirki we.

20 Wáh yo sě, Pyeri me à syah ne, ñ tyí ykɪ n to ànê ñ pó tɔle, wáh sɔnpíle n sò ne, páh kɪ fě Liyel y'ñkɔnɔ kwáh dwe póle.

21 N ni-á me kètúkùyô Liyel yah. Képah-á, we we tē náh me ñ tyí yĩ mè sɔkɔ. A náh yĩne kéle pòlle.

22-23 Páh kè we ne, dyóyókì kèpékè-á yuku sah ñ nule, ànê wáh me tyípékè yõri sɔkɔ. Képah-á,

à n nɪ vi mɔ, à mó Tě ñgbě Liyel ni à kǒ à ñ fókósõno pèkè mè yǒ mɔ à kǒ, kàh kɪ fě n pɪ n pi.

²⁴ Képah sɔkɔ, Simo me yo Pyeri ànê Nsyõ tyí ne, pépi Tě ñgbě Liyel ni pé tyí pé gblǒy. Kàh kɪ pɪ sě, tyi nónó-á pè yo pé tyí, sé sɔkɔ yó ñtě nàh pé nɔ n pi.

²⁵ Képah nàh, Pyeri ànê Nsyõ-á tyi nónó pĩ Yesu tyí sɔkɔ, pàh sè yãh te névye tyí, té Tě ñgbě wey yo te pé tyí gbí nêne, pè pé syɪ n yuku Yerusalemɪ kwil, té me Nìvìnì tirlɛ n yo n yuku kwìlpì nàhnàh sɔkɔ wěkì yah, nónó-á me Samari gběnyah.

Filipi Liyel wey yah yónóle Yetyopi gběnyah né-ñgbě yó tyí

²⁶ Sõ yóle, Tě ñgbě yinyõ tǒnpi yó pɔ yo Filipi tyí ne ñkě, à ñ gblǒy vi, à mó ñ yah mɔ gbǐngboke gbǒyò sǒle, à wěkì tě, nê-á wil Yerusalemɪ, à n tiki n yuku Kasa kwil. Kéne wěkì mè yǒ kópú nàh me fwóo.

²⁷ Képah sɔkɔ, Filipi núkú yuku kéne wěkì tě. Wãh n yuku, dǒ, à Yetyopi gběnyah né-ñgbě yó we.* Nmɔ ye sǒ Yetyopi yǒtě pi Kãdasɪ toko sah ñ tahrɪ yǒtêne. A sǒ kyɪ Liyel ni Yerusalemɪ sɔkɔ.

* **8:27** 8.27 - Dìbì nónó pól-á sǒ tǒle n pɪ yǒtãm fné sɔkɔ, pè pè wǒ, ne pè káh pɔ pé yí wil syó tyí. Képah ye, Yetyopi gběnyah né-ñgbě mè tɔ sǒ me wǒnóle.

28 Tě wăh ñ syi n yuku ñ tĩnne, à sò me kǒntěńóle ñ wòtoro sòkò, me Liyel těntò syínyo-ò Yesayi sébéyne n kar.

29 Képah sòkò, Liyel Mirki me yo Filipi tyí ne, à kò n tel wòtoro mề tyí.

30 Filipi me to tel ké tyí, té dí kàrnó noh. A sò me fí yóle n kar Liyel těntò syínyo-ò Yesayi sébéy sòkò. Filipi me à piki yah ne, fí nê-á à n kar yò, à se me ké kórle n pne ni?

31 Dí me yo ñ tyí ne, sǒ se pé ki pĩ ké kórle, né ney náh ké yah yo pé syah ni? Tě me kè yah kǒ Filipi tyí ne, à pò n dokò n kǒ n tề pé tnô wòtoro sòkò.

32 Tě fí nê-á sò dí me n kar, kè me yónóle nénpó sòkò ne nkě:

«À sò pi kępó sǒ, nê-á pè tề n yuku kò-nsah; kępah náh pi, nê yè-á pè n kǒ, té à náh ñ vyăh fyò.

33 Pè à yilò, té lékàhle à kǒ, té à ko mò, ñ duku to kèkǒyó. Nê ki tǒ n yăh ñ no tyíle?»†

34 Dí-á kar te, à me yo Filipi tyí ne, à kékwe, à yo pé syah, nê tyí se Liyel těntò syínyo-ò Yesayi n yo sě yò ni? N gblǒy tyí se à n yo, fí ñnî tyí se à n yo?

35 Képah sòkò, Filipi syǒ kéne Liyel wey mề tyí, à Nìvìnì tir yo à syah Yesu tyí sòkò.

36 Păh me wěkì yò, pè kyi syi yo yó tyí. Dí me yo Filipi tyí ne nkě, yo-á yò, tir yó tề-à ki

† 8:33 8.32-33 - Yah n te Yesayi 53.7-8.

mé-ńkēne, páh me ké tyí ne, à pé wel wilki ni soko. [

³⁷ A me yo ò tyí ne, wàh kɪ me sē Yesu yō ò nu pólle, páh kɪ fē à wel wilki ni soko. Dí me yo ò tyí ne, páh sē ké yō ne, Liyel Pídí-á Yesu Křistale.]

³⁸ Té me ne, pè wòtoro yīn mo. Kǎh yīn, à tiki ànê Filipile à kyɪ de yo, té Filipi me à wel wilki ni soko.

³⁹ Pǎh fyò wil yo soko, Tē ñgbē Liyel Mirki núkú Filipi toko soko. Yetyopi gběnyah né-ñgbē mē nǎh tō à we. Nte à yō soko ò kólóle òvìvì soko.

⁴⁰ Té Filipi tē wò mó kyɪ ò gblōy we Asotɪ kwil. A me yō soko, à Òvìvì tirlé n yo n yuku kwlo kwlo pól soko, wǎh n kah nónó soko, pópó à kyɪ de Sesarɪ kwil.

9

Yesu yónmòwle Sole tyí

¹ Té légbíne, Sole mó sò me yō soko díríle n pu Tē ñgbē Yesu tò sáhpúle, me n yah n kō pé kònmò-ńsahle. Képah soko, à kyɪ wil sárká syínwilkipu yòtē ñgbē tyí.

² Té yo ò tyí ne, à sébéynóle pé kō, pé kyɪ Damasɪ kwil Nsyifunò Liyel ní-ńtǎn vè yòtǎm kō. Képah soko, páh kɪ kyɪ díbí ànê syó nónó we nénpó, té pè me Tē ñgbē Yesu wēkùle n kò, pé pè tē n pukubi n pò Yerusalemɪ kwil.

³ Wǎh sè wε syi, à wěkì tě n yuku Daması kwil. Wǎh με yúkey kéle, kyòo yó núkú wil yínyō à kwe n̄ yō pěrr, à à mō gbĩ.

⁴ Képah sɔkɔ, à yō syiki sétáh, té yínpǔ yó noh, nê-á με n yo n̄ tyí ne: «Sole, Sole, kwáh nê pi té á n̄ne n fõh?»

⁵ Sole με piki yah ne, nê se ñmɔle ni, pé Tě ñgbě? Kéne yínpǔ tǔ yo n̄ tyí ne: «Yesu ye ñmɔle, nê-á á n fõh.

⁶ Nte yuku n de kwil sɔkɔ, té wáh yĩne n̄ nê pi, pé ki kè yo n̄ syah.»

⁷ Té Sole-á sǔ με wěkì yō ànê nónóne, pé to sǔ με yínpǔ mène n nohni, té pé náh με ney wε. Kǎh pi sě, pé gbǎn du, pé yĩn tě syísyí, pé náh με fě tirlε n yo.

⁸ Képah sɔkɔ, Sole-á yuku yĩn, à n̄ yí yiki mō, té à náh tǔ με fě n yah. Pé με n̄ gbǔ sɔkɔ tě, à de ñne Daması kwil.

⁹ A sèp̄n tǔn̄ pi nénpó yítũri sɔkɔ, yōke yó-ńkēne ànê ni wó-ńkēne.

¹⁰ Té légbĩne, Yesu tǔ sáh-ò yó sǔ με nénpó pé n ye Ananiasile. Tě ñgbě Yesu wil n̄ yah, té ne: «Ananiasi!» Ananiasi με syi, té ne páh yò, Tě ñgbě!

¹¹ Tě ñgbě με yo n̄ tyí ne: «Yuku n̄ wěkì tě, wěkì nê-á pé n ye wěkì Tómmne. Wáh ki kyi Nsyudası gbô sɔkɔ, n̄ dí yó tyí piki n yah. Kéne dí n wil Tarsı kwil, pé ñne n ye Solele. A με Liyel nínó sɔkɔ núkúnúkú.

¹² Té n̄ níri pínó sɔkɔ, à dí yó wε pé n ye

Ananiasile.* A me de pò n gbàñ sah n yõ ne, à fẽ ne n yah ñtõ.»

13 Képah sòkò, Ananiasi ne, ú, Tě ñgbě, névye náhnáh-á dí mè tyí yãh pé noh, ànê wãh me Yesu yõ sěpúle n fõh sõ Yerusalemı kwil, páh ké to noh.

14 Té wãh tõ sébéy we syi sárká syínwilkipu yõtãm tyí, à pò ásô sòkò ne, pé pò ñmò yéngbopu pól tẽ pukubi n sòkò.

15 Nte Tě ñgbě me tõ yo Ananiasi tyí ne: «Ñmò ye yah tókò pı dí mène ní tònpule ne, à ní tyíle n yo n kõ névye tyí, nónó náh pı Nsyifunole, à tahlı pé yõtãm tyí, ànê Yisrayel tãñ tó tyí. Képah ye, kyı n tyí!

16 Wãh kı kwlónó nê pı n pi ñmò yinne, mé kı kéle à wěkı n gblõy.»

17 Képah sòkò, Ananiasi yuku sòkò. Wãh kyı de Nsyudası gbô sòkò, à n gbàñ sah Sole yõ, té yo n tyí ne ñkě, pé yúnpi Sole, Tě ñgbě Yesu nê-á wil n yah wěkì yõ wãh n pi gbí nêne, ñmò-á tõ péle n tyí ne, á fẽ ne n yah ñtõ, ànê Liyel Mirki mó à tókò.

18 Nénpò swò, yí yísyó núkú wil Sole yí sòkò à pò kwe yěnkô gbró sõ, té n yí me yuku. A me yuku, té pè me à wel wilki ni sòkò.

19 Képah náh, à yõke yõ, té n syı tãhkì we.

Sole Liyel wey yónóle Daması kwil

* 9:12 9.12 - Ananiası sò pı ne dí nê tyí-á Liyel n yo pé tyí yò, péwò-á.

Képah sɔkɔ, Yesu tò sáhpú nónó-á sò me
Damasɩ kwil, Sole tẽ à sèpìn yísyó pɩ pépile.

²⁰ Té núkú tyah Yesu tyíle n yo n kɔ̃ Nsyifunɔ
Liyel ní-ńtân vî sɔkɔ ne, Liyel Pídí-á ñne.

²¹ Képah tẽne, nónó pól-á sò me ñ welɔle n
nohnɩ, kè pé gbân du. Pè tyah n yo ne, té ñmɔ
kó lésõ n kah n fõh Yesu yĩn yéngbopule
Yerusalemɩ sɔkɔ nɩ? Té pé
tẽnpukubinsɔkɔ-ńsah ńtẽ-á à pɔ ásô sɔkɔ, ne pé
kyɩ péle sárká syínwilkĩpu yõtãm tyí dé!

²² Nte wãn sò me n tɔ̃ n mɔ n yuku Sole tãhkì
yõ. A sò me kéle n yo n wah ne, Yesu-á Liyel yah
tɔkɔ pɩ pwáhnmɔ-òle. Kãh pɩ sẽ, Damasɩ kwil
Nsyifunɔ yáh-ńsah tye, tyíyóné nãh tɔ̃ we pé tyí.

²³ Képah sɔkɔ, sèpìn náhnáh sókónteno nãh,
Nsyifunɔ pɔ yo sah núkú yõ ne, páh kɩ Sole ko
mɔ.

²⁴ Té Sole me pɔ pé yĩnvĩ mè we noh. Pè sò
me kwil dé-ńtãnne n sykɩ, ké lékãh ké gbĩntõ,
ne pé à we n ko n mɔ.

²⁵ Nte sõ yó lékãhne, ñ tò sáhpú sò me ké tyí
ne pé à pwah mɔ. Képah sɔkɔ, pè à dah mɔ
tòkò-ñgbẽ yó sɔkɔ à tiki mɔ kẽnkahɩne, nê-á
kwil kore vî.

Sole syínyukunɔle Yerusalemɩ kwil

²⁶ Képah sɔkɔ, Sole sɔkɔ Yerusalemɩ kwil.
Wãh kyɩ yĩni tẽ nénpó, à sò me ké tyí ne, pé
kwrɔ mɔ Yesu tò sáhpú sɔkɔ. Nte pépi nãh sò

me fẽ sě ké yõ ne, wǎh pɪ Yesu tò sáh-òle
kègbɪsɪ tẽ yõ; képah ye tíkí pè tẽ.

27 Nte Barnabasɪ wɔ me à tẽ yuku Yesu tẽntò
névyè tyí. Té Sole-á sò Tẽ ògbě we dùkù nêne
Damasɪ kwil wěkì yah, ànê Tẽ ògbě-á yo mɔ n
tyí sɔ, Barnabasɪ ké yah yo pé tyí. Té tɔ kè yo
pé tyí, wǎh Yesu tyí yo nìsǎhle dùkù nêne
Damasɪ sɔkɔ.

28 A tɔkɔ légbí tyí, Sole kwrɔ mɔ pé sɔkɔ, à
Liyel weyne n yah n yo n kɔ nìsǎhle Tẽ ògbě yĩn
yõ Yerusalemɪ sɔkɔ.

29 A sò me n yǎh ànê Nsyifunɔ tɔle, nónó-á
Krekɪ weyne n wekɪ, me yékâble n pɪ péle. Nte
pépi wɔ sò me n kònmɔ-ńsahle n yah n kɔ.

30 Yesu yõ sěpú-á pɔ kè noh, pè à tẽ sɔkɔ
Sesari kwil, à kyɪ à tekɪ mɔ Tarsɪ kwil.

31 Légbíne, Yesu yõ sěpú tĩnkì nónó-á sò
Nsyude, ànê Kalile, ànê Samari gběnyah pól
sɔkɔ, pé pól sò me yèvinɪ sɔkɔ. Pè sò me tǎhkìle
n we, té me n kɔ Tẽ ògbě yah tíkí pínó sɔkɔ, té
Liyel Mirki gbò yõ, wǎn me n mɔ n yuku pé
nédán yõ.

Yene de mɔ dùkùle

32 Té légbíne, Pyerɪ sò me tǎntàn pólle n kɔ n
kɔ. Képah sɔkɔ, sò yóle, à tiki yuku Lida kwil
Yesu yõ sěpú tɔ tyí.

33 Té kyɪ dí yó we nénpó pè n ye Yenele. Nyân
sò me n wil ko; képah ye à sò me sě tẽ n sě sě
kwâh yõ pópó ye kwǎrtɔnɔ.

³⁴ Képah sɔkɔ, Pyeri me yo n̄ tyí ne: «Yene, Yesu Krista ye ále n̄ de n̄ mɔ yò. Yuku, n̄ té á s̄ s̄ kwâh yõ t̄ n̄ sah á gbl̄y.» Wăh yo s̄, d̄í n̄kú yuku ȳn.

³⁵ Képah sɔkɔ, Lida kwil ànê Sarõ gběnyah t̄n-á képah we s̄, pé pól vi mɔ T̄ n̄gbě Yesu tyí yõ.

Tabita kúnó ànê n̄ yîlkinmɔnɔle

³⁶ Pi yó lésõ me Nsyope kwil sɔkɔ Yesu t̄ s̄h-òle. N̄ ȳn ye s̄ Tabitale, pé n̄ ye Dorkasile Kreki wey sɔkɔ. A s̄ pèpɔrile n̄ p̄ gb̄imegbí, me ȳm t̄anne n̄ yohn̄ n̄ mɔ.

³⁷ Té kéne sèp̄in sɔkɔ, yam pɔ à f̄ mɔ, à ku. Pè me n̄ lékó wel, té à t̄kɔ kyi sah ȳnyõ wòkò yó sɔkɔ.

³⁸ Té k̄h p̄ Lida kwil ànê Nsyope kwil s̄ me yúkey w̄ne s̄, Yesu t̄ s̄hpú nónó-á s̄ me Nsyope sɔkɔ, pé s̄ noh ne, Pyeri-á me Lida kwil. Képah sɔkɔ, pé me díbí nép̄í nímí t̄ n̄ tyí ne, pé kyi yo n̄ tyí ne ník̄, à n̄ gbl̄y ye, à mó pɔ pépi t̄inne súú.

³⁹ P̄h kyi kè yo s̄, à n̄kú yuku pé sɔkɔ w̄ tyí. Wăh kyi ȳini t̄, pé à t̄ d̄kɔ yuku ȳnyõ wòkò sɔkɔ, té pékúsyɔ pól s̄ me nɔ de n̄ tn̄ me n̄ gbo, té me fwòmò-n̄gbnɔ ànê fwòmònp̄ile n̄ne n̄ w̄k̄i, nónó-á Tabita t̄i gbí nê-á s̄ à me vile.

⁴⁰ Képah sɔkɔ, Pyeri névye pól k̄ pé wil kégbó, té n̄ gbètukunɔ di à Liyel ni. Té me n̄ yah

vi pi lékó ònnè té nɛ: «Tabita, yuku.» Pi núkú n yí yuku mɔ. Té wáh Pyerɪ wɛ, à yuku kɔ tẽ.

⁴¹ Pyerɪ mɛ n gbò sɔkɔ tẽ, à à yilki sah. Képah náh, à Yesu yò sɛpú ànê pékúsyɔ ye pɔ ònnè pè wěku vile.

⁴² Káh pi sɛ, yí mè tɔ mɔ Nsyope kwil ywɔ ywɔ pól sɔkɔ, ànê pé náhnáh pi Tẽ òngbẽ Yesu yò sɛpúle.

⁴³ Képah náh, Pyerɪ tẽ mo kwéy Nsyope sɔkɔ sɛnpɪ dí yó tyí, nê yín-á Simole.

10

Névyɛ ye òkùlɛ Liyel tyí, nónó náh pi Nsyifunɔlɛ

¹ Dí yó lésò mɛ Sesarɪ kwil pè n ye Kɔrneylɛ. Sràsyíbí yòtẽ yó ye sò ònnè, Wrome tãn sràsyíbí ònkí sɔkɔ, nê-á pè n ye Yitalɪ gběnyah sràsyíbí ònkílɛ.

² À sò mɛ Liyel wěkì tẽnó plɛ, mɛ n yah tíkíle n pi, té òmɔ ànê n gbô tãn pól mɛ ònnè n ni. À sò mɛ Nsyifunɔ yãm tãnnè n yohnɪ n mɔ náhnáh, té mɛ Liyelle n ni gbímegbí.

³ Képah sɔkɔ, sò yó gbèkãm gbí kénkɔ sɔkɔ, à wěkínó yó wɛ. À Liyel yínyò tònpi yó wɛ pnéyɔ à de pɔ n ònnè, à pɔ à ye n yínnè nɛ: «Kɔrney!»

⁴ Ntɛ Kɔrney sò mɛ yínyò tònplɛ n yah díkídíkí tíkítíkí sɔkɔ, té à piki yah nɛ, kwáh nê se nɪ, pé yòtẽ? Yínyò tònpi mɛ yo n tyí nɛ: «Wáh nírí nónónɛ n pi, ànê wáh yòhnìnmonɔ

nónónε n πι yãh tãh tyí, Liyel yí με sé yõ. N dyo με n kwne á tyíle.

⁵ Núkúnúkú tēne, nósyó wilki n tekı n mo Nsyope kwil, pè kyı Simo yó tē n po, nê-á pè n ye Pyerıle.

⁶ A με twáhntēnóle sénpi dí yó tyí, nê to yĩn-á Simole. N gbô με pne yo gbòpo.»

⁷ Képah soko, yĩnyõ tònpi-á welo nópi yo te Korney tyí, té yal ñ tnô, Korney núkú ñ tònpi dibí népí ními ye ànê sràsyí yóle, nê-á sò με tēnóle ñ tnô di mónóle, té με Liyel wěkì tēnó ple.

⁸ Té με tyi nópi pól yãh pé tyí, té pè tekı mo Nsyope kwil.

⁹ Ké dīndalle, pè sò με wěkì yõ sě, té pãh pópó n de Nsyope kwil soko gbí nêne, gbí sò με yõtãh sírr kénkõ soko, té Pyerı με dokõ gbētĩn yõ, με níriıle n pi.

¹⁰ Képah soko, kwekı po à tē; à sò με ké tyí ne, pé yõke yõ. Té pãh με yõkele n pi ñ tyí gbí nêne, Liyel wěkínó yóle à wěkı.

¹¹ A yĩnyõ we yíkĩnmõnole, té kwãh yó με wil ké soko, fwòpĩn-ñgbě yó sõ, ké vyěyno nýãhle tēnóle, té με n tiki n pi sétãh.

¹² Té gbyêh ñyêh yí duke pól sò με ké soko, ànê yí nónó-à n til, à tãhlı kèpye duke pól tyí.

¹³ Képah soko, Pyerı yĩnpõ yó noh kè με n yo ñ tyí ne: «Pyerı, yuku n ko sé soko ñ ko.»

¹⁴ Nte Pyerı με Tē ñgbě syah ne, pãh pi sõ pile, pé náh dël kwãh yó ntē yõ yah, képah náh

pi, kwâh yó n̄tēne, nê-á névile n silki Liyel yah.
Képah-á, pé náh kè pi n pi pólle.

¹⁵ Képah tēne, ȳinpō mè tō ké syi yo à noh ke ní-òle ne n̄kē: «Liyel-á kwâh nê wēki kwáhpépěyne, áwɔ tyí náh ké wēkínóle ne, káh me névile n silki Liyel yah.»*

¹⁶ Képah tē pi sē ke tōnó, té Liyel núkú kéné kwâh yō doko soko ȳinyō.

¹⁷ Káh pi sē, Pyeri lékám sō me fēki, à me n̄ gblōyne n piki n yah wēkínó nê-á à we, ké yō-á ki fē n pi n pi tir n̄ene. A me képah soko, té Korney tēntō névye mó me sénpi dí Simo gbō tyí piki yah kō pɔ we, me ȳin tē ké yah,

¹⁸ té me n piki n yah ne, Simo nê-á pè n ye Pyerile, à se me twáhntēnóle ásô soko ni?

¹⁹ Nte Pyeri-á sō me yō soko n̄ fókole n sō wēkínó mè tyí soko sē, Liyel Mirki me yo n̄ tyí ne à yah, díbí nép̄i tōmí-á me n̄ne n yah n kō.

²⁰ Péwɔ-á tekɪ mɔ péle n̄ tyí. Képah-á, à yuku n tiki n soko péle, à káh tòtò pi.

²¹ Képah soko, Pyeri tiki kyi no nópi tnô, té yo pé tyí ne, nê-á pè n yah n kō, n̄mɔ-á péwɔle. Nkē, pè kèyáh kō.

²² Pè me yo n̄ tyí ne, sràsyíbi yòtē dí Korney-á tō péle n̄ tyí. Négbí-á n̄ne, wáh Liyel yah tíkile n pi, ànê Nsyifunɔ pól-á n̄ ȳingbúle n yo. Ȳinyō tōnpi yó-á kéle à wēki ne, wáh ȳine à pɔ n̄ tē n

* **10:15** 10.15 - Liyel lésô gbēnkyɔ yísyó tyí yo Nsyifunɔ tyí ne, pè káh séle n ko. Yah n te Levitiki 11.

kyi ò gbô sòkò, tyi nónó-á me á tyí yo yo tẽne, á sè yo à syah.

²³ Képah sòkò, Pyeri me pé kò pè de gbô sòkò, à twah ò tyí à lékâh pi.

Té ké dīndalle, à me pé sò tẽ sòkò. Té Yesu yò sěpú yísyó to sò sòkò péle, nónó-á n wil Nsyope kwil.

²⁴ Pé sòkò sò dīndalle, pè kyi de Sesarì kwil; té kyi ne yah Kòrney me ò gbô tãn ànê ò kódíbí kègblo ye tuke, me po pè syiki tẽ.

²⁵ Pyeri-á po n de gbí nêne, Kòrney kyi à yohni, té kò kwĩnki ò yah, à à gbilki.

²⁶ Nte Pyeri me yo ò tyí ne à yuku, té à yilki sah, té ne névi ó-á péwò tɔle dò.

²⁷ Pè me képah yónó sòkò wẽ tyí, té de yuku gbô à kyi no nópi we tükentěnlé pípi.

²⁸ Pyeri me pè syah ne, pãh pĩ ne, dël-á kéle Nsyifunò tyí, pè nãh n pi n soh wẽ tyí kwlókáhkí névyele, ànê pè nãh n de pé gbên sòkò kè. Nte Liyel-á kéle péwò tẽ wẽki ne, pé nãh yĩne pé ònî yó ntẽne n yah ne, wãh me sílkinóle Liyel yah, képah nãh pi, ne à nãh yĩne pínsòhnóle névyé tyí.

²⁹ Képah-á, pé kò pãh pé ye pé po yékâb pí-ńkẽne. Nkẽ, pè se ki fẽ pé yénó yò yo pé syah ni?

³⁰ Képah sòkò, Kòrney me yo ò tyí ne, ké sèpìn nyêh-á yò, gbèkãm gbí mè ó kénkò sòkò, pãh lésò me nírilé n pi pé wòkò sòkò. Té dõ, pé núkú dí yó we yíntěnlé pé yah tĩne, wil flòle pèrr ò tyí,

³¹ té me pé ye pé yinne ne, Korney, Liyel-á pé nírí tẽ; ò dyo-á me n kwne pé pèpòrì pínó tyíle.

³² Képah-á, pé névyè wilki n tekì n mọ Nsyope kwil, pè kyì Simo ye n pọ ásô, nê-á pè n ye Pyerile. Wáh me twáhntěńóle sėnpi đí Simo gbô soko, pne yo gbòpọ.

³³ Káh pi sė, pé núkú névyè tekì mọ ò tyí ne, pè kyì à ye n pọ. N tọ mó tọ pi ple té fě syi pọ. Núkúnúkú, pé pól-á ásô Liyel yah soko, ò welo noh yinne, nónó pól-á Tě ògbě dahbi ò gbò, ne à yo pé syah.

Pyeri Liyel wey yónóle Korney gbô

³⁴ Képah soko, Pyeri me wey toko té ne: «Núkúnúkú, mé pi kègbi yò ne, Liyel náh ònń yó ntěne n wah.

³⁵ Névi nê-à fyò ò yah tíkile n pi, té me n ko gbì wěkì yò, tě-à sọ me yìkì nê neyne, ò tyí n ọ Liyel tyí.

³⁶ Nmo Liyel ye ò wey tekì mọ Yisrayel tăn tyí, à Nivini tir yo pé tyí ne, yevuni-á n we Liyel tyí Yesu Krista gbò yò, òmọ nê-á no pól Tě ògběne.

³⁷ Nsyõ-á kwní kọ te ni soko welnwilkínó tyí soko, képah náh, nê-á pi Kalile gběnyah ògbò soko ànê Nsyude gběnyah pól soko, yé se mó kè pi té!

³⁸ Té Liyel sọ me Nasaretì kwil Yesule. A ò Mirki ànê tẽnwenole à kọ. Képah ye, à me n ko n kọ tántàn pól soko, à pèpòrile n pi, té nónó pól-á sọ me sétàn yòtě yòrì soko, à sọ me péle n wilki ké soko.

39 Té wǎh tyi nónó pól pɪ Yerusalemu kwil ànê Nsyifunɔ kwlo tɛ́lɔ sɔkɔ, á pól ye sè we yíne. Nte pè me à tɛ syɪ dahnɪ yõ, à à ko mɔ.

40 Té ké sèpìn tǔ-ò sǒle, Liyel me ò lékó yilki mɔ, té à kǒ à ò gblǒyne no wɛ́kɪ,

41 ònte à nǎh ò gblǒyne no pól wɛ́kɪ. A ò gblǒyne ápi ó wɛ́kɪ, ápi nónó-á lésǒ Liyel yah tɔkɔ pɪ Yesu lékó yílkinmɔnɔ wépu ànê sé yáhpúle. Ápi lésǒ yǒke yõ, té wɔ wɔ kwâh wɔ òne wɛ́ tyí, ò lékó yílkinmɔntenɔ nǎh.

42 Képah sɔkɔ, à me á tǔ ne: <Yé kyɪ Liyel weyne n yo n kǒ no tyí. Yé kéle pè wɛ́kɪ ne, òmɔ-á Liyel sah vye ànê lékyî tǔkè-òle.>

43 Nmɔ Yesu tyí ye tǔ Liyel tɛ́ntǔ syínyopu pól yo ne, névi nê-à sɛ òmɔ yõ, tɛ tyípèl-á kɪ yõ mɔ à kǒ òmɔ yín yõ.»

Liyel Mirki nǒsyó tɔkɔ, nónó nǎh pɪ Nsyifunɔle

44 Képah sɔkɔ, Pyerɪ sǒ me wékínó sɔkɔ sɛ́, té Liyel Mirki tiki ò wey nòhnìpu pól yõ.

45-46 Liyel-á Mirki nê kǒ, kǎh tǔ mɔ névye yõ nónó nǎh pɪ Nsyifunɔle, pè kǒ pè wénkǎhkínóle n wekɪ nónó-á pè nǎh sè sǎh, té Liyelle n gbilki sɛ́, képah pɪ gbɛ̀ndùnñe Yesu yõ sɛ́pú Nsyifunɔ tyí, pépi nónó-á sǒ pɔ ànê Pyerɪle.

47 Képah sɔkɔ, Pyerɪ ne: «Névye nónóne Liyel Mirki we te ápi tyí kǒle, á kɪ fɛ́ yahle sǒ ne, pè kǎh ò wel ò wilki òni sɔkɔ?»

48 Té me pè kǒ pè Kòrneypi wel wilki òni sɔkɔ Yesu Krista yín yõ. Képah sɔkɔ, pépi mó Pyerɪ òni ne, à wũ sèpìn yísyó pɪ péle.

11

Pyeri-á nê yo Yerusalemi kwil Yesu yõ sěpú tyí

¹ Té Yesu těntò névye ànê Yesu yõ sěpú tėló nónó-á sò me Nsyude gběnyah sokɔ, pé kè noh ne, nósý tɔ-á me Liyel wey fě syi, nónó náh pi Nsyifunɔle.

² Képah těne, Pyeri-á pɔ ò syi kyi Yerusalemi sokɔ gbí nêne, Yesu yõ sěpú Nsyifunɔ kyi tyah lékàhle ònne n kɔ,

³ té ne, à se sǒnpí kyi de, à yòke tɔle n yõ névye ònne, nónó náh pi Nsyifunɔle ni?

⁴ Képah sokɔ, tir mè-á pi sǒ, Pyeri ké yah yo wah pɔ dal mɔ pé tyí wárwár ne,

⁵ páh sò me Nsyope kwil me níríle n pi, té Liyel wěkínó yóle pé wěki. Páh kwáh yó we kè me wil yínyõ fwòpìn-ògbě yó sǒ, ké vyěyno nýáhle těnole, té me n tiki n pi à pɔ yini tě pé tnô.

⁶ Páh me ké yáhnó sokɔ díkídíkí, pé yípěy we ké sokɔ, ànê gběnyɔle, ànê yi nónó-á n til, à tahl kèpye tyí.

⁷ Képah tě sokɔ, pé yínpǒ yó noh kè me n yo pé tyí ne: «Pyeri, yuku n ko sé sokɔ ò kɔ.»

⁸ Nte pé me yo yínpǒ mè tyí ne pé Tě ògbě, pé náh képah pi n pi, nkě páh pi sǒ pile, dél kwáh yó ntě náh de yah pé vyãh ànê kwáh yó ntěne, nê-á névile n silki Liyel yah.

⁹ Képah těne, yínpǒ mè tǒ wil yínyõ, me n yo ne nkě: «Liyel-á kwáh nê wěki kwáhépěyne,

áwɔ tyí náh ké wěkínóle ne, kǎh me névile n silki Liyel yah.»

¹⁰ Képah tǎ-á pɪ sě ke tǔnó, té Liyel me tǔ kéné kwâh tɔkɔ dɔkɔ yínyǔ.

¹¹ Té légbí mè ó sɔkɔ, díbí népí tǔmí mó me pɔ yín tǎ péwɔ mé-ńsah gbô yah sɔkɔ. Nnî-á tǔ péle Sesarɪ kwil, pè pɔ péwɔ tyí.

¹² Té Liyel Mirki me yo péwɔ tyí ne, pé sɔkɔ péle, pé káh tǔtò pɪ. Pé yúnpyé népí kénúkò nónó-á yò, pépi me pé sò tǎ à yuku Sesarɪ kwil. Pé pól kyɪ de Kɔrney gbô sɔkɔ.

¹³ Képah sɔkɔ, Kɔrney tɔ mó yo pé tyí ne, páh sò me pé gbô sɔkɔ, té yínyǔ tǔnpɪ yó wil mɔ pé yah, té yo pé tyí ne ńkě, pé ney tekɪ n mɔ Nsyope kwil. Tǎ kyɪ Simo tǎ n pɔ, nê-á pè n ye Pyerile.

¹⁴ Wǎh kɪ pɔ welɔ yísyó yo pé tyí, nónó-á kɪ pé pwah mɔ ànê pé gbô tǎn pólle.

¹⁵ Kɔrney-á képah yo te sě péwɔ Pyerɪ tyí, té pé fyò tyah à tyile n yo pé tyí, Liyel Mirki tiki Kɔrneyɪ tɔ yǔ, sǔ-á lésǔ kè tiki pépi yǔ ké tyah gbíne.

¹⁶ Kǎh pɪ sě, péwɔ dyɔ to kǔ Tǎ ñgbě Yesu wey mè tyíle, wǎh nê yo ne ńkě: «Nsyǔ névye wel wilki ni sɔkɔ, ñte yépi tǎ wɔle, Liyel kɪ yé tǔ sah ñ Mirkile kɪ yé pɪ yályál.»

¹⁷ Nte pépi-á sě Tǎ ñgbě Yesu Krista yǔ, té Liyel me ñ Mirki nêne pépi kǔ, wǎh fyò kéle no nópi tɔ kǔ te pépi tyí kǔle, nê se péwɔle kɪ fě Liyel tir yah kǔ nɪ?

¹⁸ Képah sɔkɔ, névye-á welɔ nópi noh sě, pé

pól vi, té Liyel yinne n gbilki me n yo ne, Liyel-á ntyínó ké wěkìle névye to kō nónó náh pɪ Nsyifunóle, pé kɪ fě pé nno vi mɔ, kɪ tyé-ńkě min we dé!

Antyɔsyɪ kwil Yesu yō sěpú t̃nkìle

¹⁹ Yetyěni ko mɔ gbíne, pé sò me Yesu yō sěpúle n fōh. Képah ye, pé to karkɪ. Pé tókù soko Fenisi gběnyah, tókù soko Syipri gběnyah, tókù me soko Antyɔsyɪ kwil. Té pé náh sò me Yesu tyíle n yo ññi yó ñtě tyí, né Nsyifunó ó tyí náh.

²⁰ Nte tókù sò me pé soko, nónó-á n wil Syipri gběnyah soko ànê Sirenɪ kwil. Pépi-á pɔ Antyɔsyɪ soko, pé sò me Nìvìnì tirlé n yo no téló* to tyí Tě ñgbě Yesu tyí soko.

²¹ Té Tě ñgbě sò me t̃enwenóle péle n kō. Kǎh pɪ sě, névye náhnáh vi mɔ Tě ñgbě Yesu wěkì yō, à pɪ ñ yō sěpúle.

²² Képah t̃ene, Yerusalemɪ Yesu yō sěpú t̃nkì-á képah noh sě, pé Barnabasɪ tekɪ mɔ Antyɔsyɪ soko.

²³⁻²⁴ Barnabasɪle, ñépépěy ye lésó ñne. Liyel Mirki sò me à tokɔ, ànê Liyel yō s̃nó me ñ soko kègbule. Képah ye, wǎh kyɪ ỹini t̃ě, té Liyel p̃ep̃orɪ p̃ínó we ñénpó Yesu yō sěpú tyí sě, ñ nɪ vi. A me s̃óré mɔ pé pól soko ne, pé gbah t̃ě pé wró tel t̃ě Tě ñgběne pé nno pólle. Képah t̃ene, tówú ñgbě f̃ě syi s̃ě Tě ñgbě Yesu yō.

* **11:20** 11.20 Yah n te Welo yah yónó soko, ñyáh-á Kreki tyíle n yo.

²⁵ Képah náh, Barnabası soko Tarsı kwil, Sole yáhnkõ-ńsah.

²⁶ Wǎh kyı à wε, à à tẽ pɔ Antyɔsyı soko. Pé nímí tẽ à yi vi pól pı nénpó Yesu yõ sěpú tĩnkìlɛ, à névyɛ náhnáh tɔ wε kwɔ Yesu wěkìlɛ. Nénpó ñgbò soko ye pè Yesu tò sáhpú ye Kretyěbıle.

²⁷ Té kéne sèp̃in soko, Liyel tẽntò syínyopu yısyó wil Yerusalemı kwil, à pɔ Antyɔsyı soko.

²⁸ Pé soko núkú yó sò me pè n ye Akabusilɛ. Té Liyel Mirki gbò yõ, ñmɔ yuku kè yo ne ńkě, dõ kwéy, kwénpékè-á kı n de n pi kèkõyó pól soko. Képah pínó pɔ Klode wε, Wrome kwiltãm yõt̃ɛnɛ.

²⁹ Képah soko, Yesu tò sáhpú kè yah tokɔ, à yĩne pé nénúkù núkú pól gbǎn yĩ wénónɔle ne, páh kı pé gbǎn yĩ yısyó tuke mɔ, kı tekı mɔ Yesu yõ sěpú kõ Nsyude gběnyah soko.

³⁰ Pǎh kè yah tokɔ sõ, pè kè pı sě, té me yĩ nópıle Barnabası ànê Sole gbò dahbı, pépi me kyı séle Yesu yõ sěpú yah tãm kõ.

12

Nsyakı kònmonɔ ànê Pyerı dáhnmonɔle wòkònpèkè soko

¹ Ké légbí mè soko, yõt̃ɛ dí Yerɔdı tyah Yesu yõ sěpú tĩnkì névyɛ tókù fóhnóle Yerusalemı kwil.

² A Nsyõ nénkyí dí Nsyakı ko mɔ kèkirkìlɛ.

³ Té wǎh kè wε yĩ mè nɔ Nsyifunɔ tyí sě, à tǔ Pyerɩ tɔ tě. Légbí pɔ yĩne Nsyifunɔ búrn sě-̀̀nkě syáh syáhnóle.

⁴ Wǎh Pyerɩ tě sě, à me à dah mɔ wòkònpèkè sòkɔ, té sràsyíbí nérí ònyèh ònkìnó nýáh névyε kǒ pè wène n sah, à òne n syikɩ. A sǒ me ké tyí ne, búrn sě-̀̀nkě syáh-à kɩ sòkɔ te, pé à tuke no pól yí yah.

⁵ Pyerɩ yah sǒ me víkénóle wòkònpèkè sòkɔ, òte Yesu yǒ sěpú ònkí mó me Liyelle n gbah n ni ò tyí.

Liyel-á gbìl nê pí, à Pyerɩ wilki wòkònpèkè sòkɔ

⁶ Tě sǒ nê òndal-á Yerɔdɩ kɩ Pyerɩ tuke n pí, ké lékàhne, Pyerɩ sǒ me púkúbínsàhnóle kěló pló nínóle, té me n dɔ sràsyíbí nérí ní mí wró. Tě wòkònpèkè mè syíkípú sǒ me ké yah, me kéle n syikɩ.

⁷ Nte nénpó swɔ, Tě ògbě yínyò tǒnpi yó núkú wil mɔ wòkònpèkè mè sòkɔ, ké sòkɔ pól piki pèrr. Yínyò tǒnpi mè me Pyerɩ mi mi ò gbòpɔ tyí à à yilki mɔ, té yo ò tyí ne ònkě, à yuku súú. Képah sòkɔ, kěló nópi núkú kǒlɩ to Pyerɩ gbàn tyí, à kwe sétáh.

⁸ Képah tēne, yínyò tǒnpi tǔ yo ò tyí ne, à ò kǒ dyɩ ànê ò lékyèhle. A me kè pí sě. Yínyò tǒnpi mè tǔ yo ò tyí ne, à ò fwòmò-ògbě mɔ, à mó pé sǒ tě.

⁹ Pyeri me ò sò tẽ, à wil. Té yînyõ tònpi-á tyi nónónè n pi, Pyeri náh sò me sã sé yõ ne gblo-á séle. A sò we ne dékí-á pé n do.

¹⁰ Pè wòkònpèkè syíkí-ńsah gben kal sokò, té ké ní-ò to kal sokò, té kyi syi vyori wùkah gbíní tyí. Képah yah sò me mónóle kwil niyó tinnè. Ké to nùkú yiki mò ké gblòy. Pè me wil à wèkí tẽ n yuku. Dò, Pyeri nùkú yînyõ tònpi mè yah kwlo.

¹¹ Képah sokò, Pyeri yah pyè pi kyòo yí mènè. A me ne nùkúnùkú, páh pyè kè pĩ yíi ne, Tẽ ñgbè-á tó ñ yînyõ tònpi è à pò pé pwah mò wilki Yerodì gbò ànê Nsyifunò-á sò me pèl nónónè n syiki ne, sè péwò nò.

¹² Té Nsyõ nê-á pè n ye Markle, Pyeri-á ñ fòkò sò yah, à sokò ñmò yú Mari gbò. Níri pípi nánháh sò me tuke mò tẽ nénpó, me Liyelle n ni.

¹³ Té Pyeri-á pò gbò yah mi, tònpi pípi yó me pè n ye Wrodele, ñmò me nò de kéle, té píkinyahno pi ne, nê se ni?

¹⁴ Képah sokò, Pyeri-á yo mò, à ñ yí pĩ. Ké nìvìni tẽ tyí, à pyè gbò yah sah yíkínmò-ńkène té ñ syi to kyi kè yo no téló tyí ne ńkè, Pyeri-á me yínnntèńóle gbò yah.

¹⁵ Nte pè pyè ne, pípi yògbèkè-á yuku. Té wáh me kéle n gbah n yo ne gbí-á pé n yo, pè tó ne ńkè, Pyeri mírkí-á ki nê à we.

¹⁶ Nte Pyeri wò mó me wùkahle n tó n mi sã. Képah sokò, páh pópó pò wùkah yiki mò, pè kè

we kè pɪ òmòlɛ òtyínɔ. Kè pɪ pé tyí gbě̀ndù̀nìnɛ.

¹⁷ Pyerɪ mɛ ò gbò pɪ mɔ pé tyí nɛ, pè pé vyěy vike. Té Liyel-á à yohnɪ mɔ dùkù nềnɛ à kò à wil wòkò̀npèkè sòkɔ, à de ké sòkɔ à kè yā̀h pé tyí. Té yo pé tyí nɛ òkě̀, pè kyɪ kè yā̀h Nsyakɪ ànề pé yúnpyé Yesu yò sě̀pú tɛ̀lɔ tyí. Képah náh, à pyè wil sòkɔ fí yó.

¹⁸ Nte tyah-á pɔ dal, sràsýíbí fòkɔ fil Pyerɪ tyíle. Képah sòkɔ, pè wě̀nɛ n piki n yah nɛ, ò tyí se pɪ sò nɪ?

¹⁹ Képah tě̀nɛ, Yerɔdɪ pè kò pè mɪ de Pyerɪ sóhnkò̀nɔ sòkɔ. Nte pè náh à wɛ. Kā̀h pɪ sě̀, à mɛ wòkò̀npèkè syíkípyé ye pɔ piki yah, té nɛ, pè pè ko mɔ. Képah náh, Yerɔdɪ wil Nsyude gbě̀nyah sòkɔ à kyɪ sèp̀ìn yísyó pɪ Sesarɪ kwil.

Yòtě̀ dí Yerɔdɪ kúnóle

²⁰ Tiri kwil ànề Sidò kwil tǎn-á sò mɛ gbě̀nyah nề sòkɔ, ké yòke lésò mɛ n wil yòtě̀ dí Yerɔdɪ gbě̀nyah sòkɔ. Té yékầb-á pɔ wɛ pé wró ànề Yerɔdɪle, Yerɔdɪ fòkɔ kah vyā̀h péle. Kā̀h pɪ sě̀, pépi mɛ yo sah núkú yò nɛ, páh kɪ kyɪ wil Yerɔdɪ tyí. Képah yinne, pè kyɪ pé sò̀nɔ pɪ núkúle ànề Yerɔdɪ sě̀-ńsah wòkò̀ yòtě̀nɛ, nề-á pè n ye Blasɪtusilɛ, nɛ pé kyɪ yégbé̀kè kwrónmò̀nɔ yah kò Yerɔdɪ tyí.

²¹ Pǎh gbìyìkì nề yah tòkɔ, ké lésò-á nɔ, Yerɔdɪ ò yòtòrí flo mɔ pɔ kò tě̀ ò yòtòrí kò yò, à tyah wɛy yóle n yo tówú tyí.

²² Képah tě̀nɛ, névyɛ tyah n gbo mɔ nɛ, névi tě̀ wɔ náh n wɛkɪ yò dé, Liyel-á!

²³ Képah sɔkɔ, Yerɔdɪ-á sɔnpí gbilkínó mè fě syi, nê-á sò yĩne sàhnóle Liyel yõ, Tě ñgbě yĩnyõ tɔnpɪ yó núkú à mɪ, kěfyõ me gbɔ ñ sɔkɔ, à à yõ ko.

²⁴ Nte Liyel wey sò me n gbah n tɔ mɔ n yuku óle.

²⁵ Té Barnabasɪ ànê Sole wɔ-á pé tò pɪ te Yerusalemɪ kwil,* pè Nsyõ-Markɪ tě pé syɪ sɔkɔ Antyɔsyɪ kwil.

13

Barnabasɪ ànê Sole tékínmɔnɔle Liyel tò sɔkɔ

¹ Liyel tɛntò syínyopu ànê névyɛ kwópú sò me Antyɔsyɪ kwil Yesu yõ sěpú tĩnkɪ sɔkɔ:

Barnabasɪ sò me, ànê Solele, ànê Simeyóle, nê-á pé n ye Dísyíkèyɛ, ànê Sireni kwil Lusiyusile, à tahlɪ Manayě tyí, ñmɔ nê-á sò kɔrɪ pɪ wě tyí Kalile gběnyah yòtě dí Yerɔdɪle.

² Sò yóle, pàh me níkɪ tě, té me Tě ñgbě Liyelle n ni gbí nêne, ñ Mirki yo pé tyí ne: «Yé Barnabasɪ ànê Sole wilki pé tyíle. Pè kɪ tò pɪ, nê yĩn-á mé n ye péle.»

³ Képah sɔkɔ, pè níkɪ tě,* à nírí pɪ pé tyí à pé gbàh sah pé yõ, té pyě pè fin mɔ pè sɔkɔ.

Barnabasɪ ànê Sole Liyel wey yónóle Syipri sɔkɔ

* **12:25** 12.25 - Yah n te 11.27-30. * **13:3** 13.3 - Níkɪ tɛnó duke me dò. Té Nsyifunɔ tě wɔ tyí, pàh níkɪ tě, ké kanne, pè nine n wɔ, té pé nàh yòkele n yõ.

⁴ Liyel Mirki-á Barnabası ànê Sole tekı mo tò soko sě, pè me tiki yuku à kyı de Selesi kwil. Té de krótókè ñgbě yó soko nénpó, ne páh n yuku gběnyah yó soko pè n ye Syiprile, pne yo niyó.

⁵ Páh yini tě ké kwil yó soko pè n ye Salaminine, pè tyah Liyel weyne n yo Nsyifunó Liyel ní-ntân vı soko. Té Nsyó-Markı to sò me péle, pé yohnı n mo yinne.

⁶ Pè me Syipri mē kan ko kah, à kyı de ké kwil yó soko pè n ye Pafosıle. Pè kyı Nsyifunó sènpı dí yó yohnı, nê-á pè n ye Bar-Yesule. Nmo sò me ñ gblöyne n pı Liyel tēntò syinyo-òle.

⁷ Té à sò me wě tyı ànê Syipri yah tē-ò dí Serısyusi Polusile, ñmo nê-á lésó lékám névile. Té Liyel wey noh dékè sò me Serısyusi Polusi tē. Képah ye, à pè kō pè kyı Barnabası ànê Sole ye.

⁸ Nte sènpı dí Bar-Yesule, pè tō sò ñne n ye Yelimasule Krekı wey soko. Nmo sò me Barnabası ànê Solele n fwo. A sò me n yah n kō Syipri yah tē-ò dí yíninmo-nsahle, ne à káh sě Yesu yō.

⁹ Képah soko, Sole nê-á tō pè n ye Polele,† Liyel Mirki à tōko, à me sènpı dí yah díkídíkí,

¹⁰ té yo ñ tyı ne: «Áwo nê-á lékámkām ànê yínvı ó á tōó, sétàn yòtē névi mē; gblo wǎl pól sépele áwole, Tě ñgbě wǎl tómtóm fěkínó yal mo dé!

† 13:9 13.9 - Solele, Nsyifunó ye n ye ñne sě, té Wrome tǎn me ñne n ye Polele.

11 Núkúnúkú tǽne, Liyel gbò kɪ sah á wil. Á kɪ pɪ yítúne wró yó sɔkɔ, á náh tǔ gbĩ kyòo we n pi.» Képah yóntenɔ ñsǔ, ñ yí núkú wɔ, à ñ gblǔy we fǽntú sɔkɔ, té tyah n kɔ n kore n vi n kǔ, à neyne n yah n kǔ ñ gbò sɔkɔ tǽ tǽ tǽne.

12 Képah sɔkɔ, Syipri yah tǽ-ò dí-á Liyel tyí-ngbɔ pínó we, té kwónó nê noh, sè ñ nɪ tǽ. Káh pɪ sǽ, à sǽ Tǽ ñgbǽ Yesu yò.

Pole ànê Barnabasí-á kwónó nê pɪ Antyɔsyɪ kwil, Pisidi gběnyah sɔkɔ

13 Képah náh, Pole ànê ñ kómú de krótókè ñgbǽ sɔkɔ, à yal Pafɔsɪ kwil, té yuku Persyɪ kwil, Pānfili gběnyah sɔkɔ. Páh me nénpó, Nsyǔ ñ gbɛ wil pé sɔkɔ, à ñ syɪ yuku Yerusalemɪ kwil.

14 Nte Polepi tǽ wɔ mó yal Persyɪ kwil, à yǔ sɔkɔ pé kólóle, pópó à kyɪ de Antyɔsyɪ kwil, Pisidi gběnyah sɔkɔ.‡ Té Nsyifunɔ mɪ mɪ yòh sǔ-á pɔ nɔ, pé kyɪ de kǔ tǽ péle pé Liyel ní-ńsah wòkò sɔkɔ.

15 Képah tǽne, ñnî yó me tyi kǔnsàhnó ànê Liyel tǽntǔ syínyopu sébéynó tǽntǽnnó yísyó kar. Wáh kar te, Liyel ní-ńsah wòkò yah tām me pé kǔ pé yo Polepi tyí ne, pé no, welo yísyó-à kɪ me pé tyí sǔré mɔ mɔ tǽne tówú sɔkɔ, ké wǽkì-á me pé tyí.

16 Képah sɔkɔ, Pole me yuku yīn, té ñ gbò pɪ mɔ no tyí ne, pé noh pé tyí yò. Té yo pé tyí ne:

‡ 13:14 11.19 - Antyɔsyunɔ sò me nínó. Núkú sò me Pisidi gběnyah sɔkɔ, ní-ò me Siri gběnyah sɔkɔ. Nte Siri gběnyah Antyɔsyɪ sɔkɔ ye sò pé kóló mè tyah. Yah n te Tyípinì 13.1-4.

«Yisrayel tǎn, à tahlǎ nónó-á Nsyifunǎ náh péle, té me Liyel yah tíkile n pǐ, yé nónó pǐ ní tyí.

¹⁷ Ápǐ Yisrayel tǎn Liyelle, à ápǐ náh tǎn yah wilki. A tǎ Yisrayel tǎn pǐ dǎ, gbí nê-á sǎ pé me Yesyipti gběnyah sǎkǎ; té tǎ ñ tēnwenǎle pé wilki ké sǎkǎ.

¹⁸ Té à pé pu\$ gběnnǐ sǎkǎ pópó ye tikiníní kénkǎle.

¹⁹ Képah náh, à yǐkǐnǐnó kwǎrninǎ névye ko mǎ, à pé duku to Kanah gběnyah sǎkǎ, té pé sétáhle Yisrayel tǎn kǎ gběkǐle.

²⁰ Tyí nópǐ pól-á pópó n pǐ n te, kè nǎ ye kyeyéh tikiníní pǎ gbǎm (450) kénkǎle. Képah náh, á náh tǎn sǎkǎ ye Liyel n wilki á vyǎh syípúle, pópó à pǎ nǎ Liyel tēntǎ syínyo-ò Samuyelǐ gbí tyí.

²¹ Té sǎ yǎle, pé me kè yah kǎ Liyel tyí ne, páh me yǎtē yǎ tyí. Képah sǎkǎ, Liyel me Kisi pídí Sawuli pǐ pé yǎtēne, pópó ye tikiníní. Té Sawulile, Běnsyame yǐkǐ ney ye sǎ ñne.

²² Nte Liyel-á pǎ ñmǎ milki gbí nēne, à me Davidi pǐ pé yǎtēne. Davidi tyí sǎkǎ ye lésǎ Liyel yo ne nkē: <Mé wil mǎ ní dyǎ yǐ ney yǎ, ñmǎ nê-á Nsyese pídí Davidile. A kǐ ní dyǎ yǐ tyi pól pǐ dal mǎ palle.>

²³ Liyel ye lésǎ ñ vyǎhle Davidi kǎ ne, Yisrayel pwáhnǎmǎ-ò-á kǐ dubi ñmǎ pětóbé sǎkǎ. Kéne pwáhnǎmǎ-ò ye pǎ pǐ Yesule.

§ 13:18 13.18 - Púnó nê tyí-á n yo ásǎ sǎkǎ yǎ, yǎke ó náh sǎ Liyel péle n kǎ. A sǎ me pé nǐle n gbé, à n tǎ n sah n pǐ pé tyí.

24 Tέ Yesu-á pópó n pi, wèlnwĩkĩ-ò Nsyõ ye yo Yisrayel tãn pól tyí ne, pè pé nno vi mo, pè mó wèlnwĩkĩnó we.

25 Nte Nsyõ tõe-á pópó po n tyε, à me n yo névyε tyí ne níkě: «Yépi tẽ sõno sokɔ, nê me nímoλε? Yé káh we ne, pwáhnmo-ò nê pónó-á yé syiki tẽ, ñmo-á nímoλε dé! Nte yé yah, à me n kne pó-ńsah. Tέ ñmo ntẽ fórcɔ kah ñ lékyêh fyé dénóλε ñ gbyêh sokɔ.»»

26 Képah náh, Pole tõe ne: «Á no, yépi nónó-á Abrahami pétóbéλε, à tahlı Liyel yah tíkí pípú pól tyí, pwáhnmonɔ wey mē ye tekı mo ápi pól yinne.

27 Nte Yerusalemı tãn ànê pé yõtãm náh lésõ pĩ ne, Yesu-á pwáhnmo-òλε. Tέ Liyel tẽntõ syínyopu welɔ nónó-á n kar pé tyí Nsyifuno mı mı yòh sònó pólle, pè náh sé yõ pĩ. Kéne welɔ tyi yónó ye lésõ pè pı dal mo, pãh lékàhle Yesu kõ.

28 Pè náh Yesu tyípíní yó ntẽ we, nê-á yĩne ñ kònmonɔλε. Nte pè kè yah kõ Pilati tyí ne, à à ko mo.

29 Tέ Liyel wey-á tyi nónó pól yo Yesu tyí sokɔ, pãh po sè pı dal mo te gbĩ nêne, pè ñ lékó tiki mo to dahnı yõ, té kyı à yĩ diki yó sokɔ.

30 Nte Liyel me ñ lékó yilki mo.

31 Képah náh, névyε nónó-á lésõ ñ sò tẽ yal Kalile gběnyah, à dɔko yuku ñne Yerusalemı kwil, à ñ gblõyne pépi wěki sèpĩn náhnáh sokɔ. Kéne névyε nópi ye me ñ tyi yónwàhpu kègblɔλε Yisrayel tãn yah núkúnúkú yò.

³² Nte ápile, Nìvìnì tir ye ápi to n yo yé tyí yò ne níkě: Liyel-á n vyãhle á náh tãh kō nê tyí yō,

³³ képah-á à pɪ dal mɔ ápi tyí, ápi nónó-á pɪ pé wěnpìle. Wãh Yesule á kō, à yĩne kãh wãrkɪ sah sǒ Gbálnó sébéy yìkì ní-ò sɔkɔ ne níkě:

<Nmɔ Pídí ye ále;

à tɔkɔ kwey tyí, n̄mɔ ye á Súle.>^{*}

³⁴ Liyel ye lésō kwãh tẽ kè yo sah ne níkě, Yesu-à pɔ ku, à náh n pyãh n pi. Páh kɪ n̄ lékó yilki mɔ. A tǒ lésō kè yo dal mɔ ne níkě:

<Máh lésō ní vyãhle Davidi kō nê tyí sɔkɔ, mé kɪ kè pɪ yé tyí, kɪ sãm mɔ yé sɔkɔ, tir yó náh ké òkù ku n pi.>[†]

³⁵ Képah ye Davidi yo fí yó sɔkɔ ne níkě:

<Á náh n ye á tǒnpɪ pèpɛy lékó kō kè n pyãh n pi.>[‡]

³⁶ Nte Davidi tẽ wɔ gbĩ sɔkɔ, à Liyel tǒ pɪ ké wěkì yō. Képah náh, à me ku pé kō pé yĩ n̄ náh tãh lékyî tnô, n̄ tɔ lékó me pyãh.

³⁷ Nte Liyel ye Yesu lékó yilki mɔ. Nmɔ lékó tẽ wɔ náh pyãh dé!

³⁸ Á no, yé pĩ ne, n̄mɔ Yesu gbò yō-á tyípêl yǒnmɔnɔ tyí we yo yé tyí dé! Moyisi tyi kǒnsàhnó náh tẽ we yé yō wilki tyípêl nónó sɔkɔ,

³⁹ névi nê-à sě Yesu yō, tẽ yō kɪ wil sé pól sɔkɔ, à kɪ fě no de Liyelle.

^{*} **13:33** 13.33 - Yah n te Gbálnó 2.7. [†] **13:34** 13.34 - Yah n te Yesayi 55.3. [‡] **13:35** 13.35 - Yah n te Gbálnó 16.10.

40 Képah ye, yé kyòmìnó pɪ, yè káh pɔ Liyel wey mè yahle. Képah-à pí-ńkêne, Liyel tẽntò syínyopu-á tir nê yo sah, kè kɪ pɔ yé yĩni tẽ. Pè lésõ ne ńkê:

41 <Yé yah, wènyìkì wékípú nópi, yé ne me gbẽndùñ sɔkɔ, yè mó ku tẽ yõ! Máh kɪ pɔ nê pɪ n pi yé sɔkɔ, té kɪ yé sah min sɔkɔ;

névi-à sõ sõ pɔ kéle n yãh yé tyí,

yé náh n sã n pi ké yõ.»Š

42 Sépi yóntenɔ náh, Pole ànê Barnabasɪ-á n wil Liyel ní-ńsah wòkò sɔkɔ gbí nêne, no tyah péle n ni ne, mi mi yòh kèyãhle, pè tõ pɔ pé syi pé wey mè ó yõ.

43 Képah náh, tówû-á pɔ karkɪ gbí nêne, névyé náhnáh Pole ànê Barnabasɪ sõ tẽ. Nsyifunɔ ye sõ, à tahlɪ névyé tyí, nónó-á vi mɔ de Nsyifunɔ Liyel nínó wẽkì sɔkɔ. Té Pole ànê Barnabasɪ sõ me n yãh péle, à pé sònɔle n vi n mɔ ne, Liyel-á pèpɔrɪ nê pɪ pé tyí, pè ké tẽnó ple.

Pole ànê Barnabasɪ Liyel wey yónóle névyé tyí, nónó náh pɪ Nsyifunɔle

44 Képah sɔkɔ, Nsyifunɔ mi mi yòh kèyãh-á vi pɔ, kwil névyé kan pɔ tuke mɔ Liyel wey noh yĩne.

45 Nsyifunɔ-á kéne tówû we sã, dyóyókì de pé sɔkɔ kèpékèyô. Pè tyah Pole weyne n kòlɪ, à ké tyíle n yo n ykɪ.

46 Képah sɔkɔ, Pole ànê Barnabası kè yo nìsàhle pé tyí ne: «Yépi ògbò tyí ye Liyel wey sò yĩne kè yo. Nte yáh fyò kè yahle, té kè wěku ne yé náh yĩne tyé-ńkě min wénóle, kǎh pı sě, ápi kı á yah mo névye òinne núkúnúkú, nónó náh pı Nsyifunole.

47 Tě ògbě Liyel-á nê yo, képah ye á n pı dò. A kè yo ne ńkě:

«Mé ye ò sah ne á pı kyòole névye tyí, nónó náh pı Nsyifunole,
á mó kyı pwáhnmonɔ wey yo
kèkõyó pól sɔkɔ.»*

48 Képah sɔkɔ, nónó náh pı Nsyifunole, pǎh welɔ nópi noh sě, pé ni vi, pè tyah Tě ògbě Liyel weyne n gbilki. Té névye nónó pól-á sò yĩne tyé-ńkě min wénóle, pé pól sě Tě ògbě yõ.

49 Liyel wey núkú tǔ mo kéné gběnyah tǎntǎn pól sɔkɔ.

50 Té syó né-ògbnɔ yísyó sò me, nónó-á me Nsyifunɔ Liyel wěkìle n kɔ. Kǎh pı sě, Nsyifunɔ me pépi ànê kwil né-ògbnɔ yísyó kurki mo Pole ànê Barnabası yõ. Pè me tyah Polepile n fõh, té pè yĩni yal pé sétáh yõ.

51 Pǎh mó n wil kéné kwil, pè pé gbyêh nèngbõ kwer kwe ké sɔkɔ, té sɔkɔ Yikonyumi kwil.

52 Nte Antyɔsyı kwil Yesu tò sáhpú tě wɔ sò me nìvìnì ògbě sɔkɔ, té Liyel Mirki me pè tɔkɔ.

* 13:47 13.47 - Yah n te Yesayi 49.6.

14

Pole ànê Barnabası Liyel wey yónóle Yikonyumi kwil

¹ Képah sòkò, Pole ànê Barnabası-á yĩni tẽ Yikonyumi kwil, pè tǒ de yuku Nsyifunò Liyel ní-rísah wòkò sòkò. Té tyah Liyel weyne n yo, fóó Nsyifunò ànê nónó náh pı Nsyifunòle, pé náhnáh vi mọ pı Yesu yǒ sěpúle.

² Nte Nsyifunò sòkò nónó-á sǒ yahle sěnóle Yesu wey yǒ, pépi nékáhbí kurki mọ Yesu yǒ sěpú yǒ.

³ Nte képah fyé yǒ, Pole ànê Barnabası tǒ tẽ à mo Yikonyumi sòkò. Pé gbǒ sàhnyĩnò sǒ me Tẽ ñgbě yǒ pè kǒ pè n wẹki nìsǎhle. Té à sǒ me pé yah tẽ pè kǒ pè gbıl tyile n pı, gbıl nónó-á n wẹki ne, pǎh welò nónóné n yo Liyel pèpọri pínó tyí sòkò, gblò-á séle.

⁴ Nte kwil névye gbekı. Pé tókù sǒ me mọ Nsyifunòle, tókù mó me mọ Yesu těntǒ névyele.

⁵ Képah sòkò, Nsyifunò ànê nónó náh pı Nsyifunòle, à tahlı pé yǒtǎmnó tyí, pè wě tyí mọ ne, pé Pole ànê Barnabası fǒh, pé mó pè minki ko dyêhle.

⁶ Nte Pole ànê Barnabası-á pọ pĩ ké sòkò, pè to sòkò Lisitir kwil, ànê Derıbi kwil, ànê sé gbòplo kwlo sòkò, Likawoni gběnyah.

⁷ Té yǒ sòkò, à Nìvìnì tirlé n yo n kǒ nénpó.

Sèkùkù dǐ yó dénmonòle Lisitir kwil

⁸ Té dǐ yó lésǒ me Lisitir kwil, gbyêhne kúnóle. A sǒ dubi sèkùkùle, à náh tẽ we kọ yah.

⁹ Té sǒ yóle, Pole-á n wẹkɪ, kéné dí sǒ me ñ weyne n nohnɪ. Képah tǔne, Pole tyah díne n yah díkídíkí. Té wǎh kè we ne Liyel yǒ sǔnó-á me dí mè tyí kɪ fě dénɔɔɔ we Liyel tyí,

¹⁰ à yo ñ tyí yǐnpǒ ñgběne ne: «Yuku n yǐn tómm á gbyěh yǒ!» Képah sɔkɔ, dí núkú yɔkɔ syikɪ ñ gbyěh yǒ, à tyah n kɔ.

¹¹ Tówû-á képah tǔ pínó we sǔ Pole tyí, pè tyah n yo wòhòh Likawoni tǎn wey sɔkɔ ne ñkě, tǎn-á sé viri pɪ névyele à tiki pɔ pé wró dé!

¹² Képah sɔkɔ, pè tò nê-á pè n ye Nsewusile, pè képah yǐn dyɪ Barnabasɪ kǔ. Té wey-á sǒ me Pole wɔ gbò sɔkɔ sǔ, pè kèyǎh yǐn dyɪ ñmɔ kǔ, nê-á pè n ye Yeremesile.

¹³ Té tò nê-á pè n ye Nsewusile, ké wòkò sǒ me kwil dé-ńsah yah sɔkɔ. Ké lékwén nétě dí me nyéhpýèni tǔ pɔ kéné tò wòkò yah ànê yǐ fine.* Té ñmɔ ànê tówû sǒ me ké tyí ne, pé gbètòh mɔ Barnabasɪ ànê Pole yǒ.

¹⁴ Nte Barnabasɪ ànê Pole-á képah tǔ noh sǔ, pépi nóno-á Yesu tǔntò névyele, pè pé fwòmɔlo yɔrɪ tɔkɪ yèkwɔrɪ tǔ tyí, té to de tówû ñyó me yo tǔ yǐnpǒ ñgběne ne:

¹⁵ «Á no, sǒ me té yé képahle n pɪ? Névyè ye ápi tɔle, yépi tyí kǔle dò! Nìvìnì tir ye á pɔ yó-ńsah yé tyí ne, yé yǒ kě fal fal tǎn nópi milki, yé mó vi mɔ Liyel wěkì tǔ, ñmɔ nê-á min

* **14:13** 14.13 - Névyè náhnáh tǔ sǔnɔ sɔkɔ, nyéhpýèni nópi sǒ me kóhnɔɔɔle yǐ fi nópile.

nétēne. Nmo ye mo yinyōle, ànê sétáhle, ànê pne yole, à tahl sé soko yiyin pól tyí.

16 Ngbòle, Liyel mè ye sò ye kwlo kwlo névye pól kō pè n ko pé dyo dyo wāl yō.

17 Nte à me n gblōy dukùle n wēki sē gbímegbí n pèpɔri pínó soko. A me pūne n pi n mo yéle n kō à n wil yinyō, té ye sèmuco kō sè n pekɔ, té yōke náhnáhle yéle n kō ànê nìvìnìne.»

18 Nte welo nópi fyé yónó yō, Yesu tēntò névye yah vyāh tówù yíninmo-ńsah ne, pè káh gbètòh mo pé yō.

19 Ké légbí soko, Nsyifuno yísyó wil Antyɔsyi kwil, Pisidi gběnyah, ànê Yikonyumi kwil, à pɔ nénpó. Pépi pɔ tówù vi tē mo Polepi yō, pè kō pè yuku Polele n minki dyēhle ne páh ñne n min n ko. Képah náh, pè à yɔri wilki sah kwil náh ùnne, té me n sō ne wáh ku.

20 Nte Yesu tò sáhpú-á pɔ tuke mo n tnô, à à mo gbí gbí nēne, à me yuku té de kwil soko. Té ké dīndalle, à soko ànê Barnabasile Derɔbi kwil.

Pole ànê Barnabasí syínyukunole Siri gběnyah soko

21 Képah tēne, páh kyɔ yini tē Derɔbi kwil, pè Nìvìnì tir yo nénpó tǎn tyí. Pé náhnáh me sē Yesu yō, à pi n tò sáhpúle. Képah náh, Polepi pé syɔ syō Lisitir kwille, ànê Yikonyumi kwille, à kyɔ de Antyɔsyɔ kwil, Pisidi gběnyah soko.

22 Té nìsāh ànê sóré ye sò pè n mo n kō Yesu tò sáhpú soko ne, pè gbah n tē pé sōno sah yíí

Yesu yǒ gbímægíbí. Pè sò me n yo pé tyí ne nkě, yèvyǎhrì náhnáh dénwǐlnó sòkò-á pé kù de Liyel tǒrí mé-ńsah sòkò.

²³ Té Yesu yǒ sěpú tǐnkìnó nónó-á sò me kwlo nópì pól sòkò, Polepi sò yah tǎm yísyó yah wilki sé sòkò, à sah sé yǒ. Té níkì tǔ à nírí pì pé tyí, à pè dahbì Tě ñgbě Yesu gbò, pǎh sě ñmò nê yǒ.

²⁴ Képah náh, pè Pisidi gběnyah kò kah, à kyì de Pǎnfilì gběnyah sòkò.

²⁵ Nénpó sòkò, pè Liyel wey yo Pèrsyì kwil tǎn tyí, té pyě yuku Atali kwil.

²⁶ Pǎh n yal nénpó, pè de krótókè ñgbě sòkò, à yuku Antyosyì kwil, Siri gběnyah sòkò. Kéne kwil sòkò ye sò pè pè dahbì Liyel gbò sòkò, tò mè pì yǐnne, nê-á pè pì te yò.

²⁷ Pǎh yǐni tǔ Antyosyì sòkò, pè Yesu yǒ sěpú tǐnkì ye tuke. Té Liyel-á pé yah tǔ, à ñ tò pì dùkù nêne, pè kè yǎh pé tyí; à tahlì wǎh ñ yǒ sěńó wěkì yúkì mò névyè tò kǒ sǒ, nónó náh pì Nsyifunòe.

²⁸ Képah náh, Polepi tǔ péle Antyosyì sòkò, à mo.

15

Yékâb dénóle

¹ Képah tǔne, díbí yísyó wil Nsyude gběnyah, à pò Antyosyì kwil sòkò. Té pò tyah Yesu yǒ sěpúle n kwò ne nkě, né pè náh kòkè kǒ sǒ-á Moyisi tyi kǒnsàhnó kè yo sah, pè náh fě pwáhnmòno we n pì.

² Nte Pole ànê Barnabası náh fě syi. Kǎh pı sě, yékâb ñgbě de pépi ànê díbí nópi wró. Képah soko, kè yah toko ne Pole, ànê Barnabası, ànê pépi tókù-á kı doko yuku Yerusalemı kwil. Pǎh kı kyı wil Yesu tǎntò névye ànê Yesu yõ sǎpú yah tǎm tyí, pè yĩ mè yah wah.

³ Té me yòhnìnmonɔ pı Polepi tyí kéne kóló mè yinne. Polepi-á n soko, pè syõ soko Fenisi gběnyah ànê Samari gběnyah soko, me névye tyile n yǎh pé tyí, nónó-á vi mo Liyel wěkì tǎ, té Nsyifunɔ náh péle. Kè pı nìvìnì ñgběne Yesu yõ sǎpú pól tyí.

⁴ Pǎh kyı yĩni tǎ Yerusalemı kwil, Yesu yõ sǎpú, ànê pé yah tǎm, ànê Yesu tǎntò névye me pè tǎ palle. Képah soko, Liyel-á Polepi yah tǎ pè ñ tò pı dukù nêne, Polepi kè yǎh pé tyí.

⁵ Nte Farisiyě névye nónó-á vi mo pı Yesu yõ sǎpúle, pépi tókù yuku tyah n yo ne nkě, nónó-á sě Yesu yõ, té Nsyifunɔ náh péle, pǎh yĩne pè kòkè kò; ànê pǎh yĩne kyìnmonɔle pè Moyisi tyi kònsàhnóle ne n pı.

⁶ Képah tǎ soko, Yesu tǎntò névye ànê Yesu yõ sǎpú yah tǎm wě we yĩ mè tyí soko, à kè yah wě tyí.

⁷ Kè sò pı yíí yékâb ñgběne pé wró, fókó Pyeru pɔ yuku yĩn, té yo pé tyí ne nkě: «Ñ yúnpyé, yépi ntě se kè pĩ ne Liyel-á nmo yah wilki yé soko di mónóle té! A ne mé Nìvìnì tir yo névye tyí, nónó náh pı Nsyifunɔle, pè kò pè kè we noh, pè mó sě Yesu yõ.

⁸ Nte Liyel nê-á névyé fɔkɔ sɔnɔle n pne, ñmo ye ñ Mirkile pè kɔ, sɔ-á lésɔ à kéle ápi tɔ kɔ, à kè wêkɪ ne páh pépi tɔ fě syi.

⁹ A náh wáhkì pɪ ápi ànê pépi wró. Páh sě ñ yɔ, képah ye à pé nnɔ tɔ sah.

¹⁰ Té núkúnúkú, sɔ pɪ té yé Liyel vyāh sòle n noh, à tókópèlle n sah Yesu yɔ sěpú yɔ, nónó-á ápi náh tǎn ànê ápi ntě náh tě we sè twah yah?

¹¹ Nte ápi sě ké yɔ ne áyáh pwáhnmonɔ we Tě ñgbě Yesu pèpɔrɪ gbò yɔ, no nópi tyí kòle.»

¹² Káh pɪ sě, no pól tě syísyí, té pé ní kwɔ Pole ànê Barnabasɪ tyí. Képah sɔkɔ, Liyel-á syɔ Polepi tyí, à gbíl tyi nónó pɪ névyé tyí, nónó náh pɪ Nsyifunɔle, Polepi sè yāh pé tyí.

¹³ Páh sè yāh te gbí nêne, Nsyakɪ wey tɔkɔ, té ne ñkě: «Ñ yúnpyé Nsyifunɔ,* yé noh í tyí yò.

¹⁴ A pól yí yah ye Simo-Pyerɪ kè yo ne ñkě, ñgbò dùkù-á Liyel kè yah tɔkɔ, à nósyó yah wilki névyé sɔkɔ, nónó náh pɪ Nsyifunɔle, à pɪ ñ nolɔ.

¹⁵ Té wey mè mó tɔ me yínénóle Liyel tǎntò syínyopu welɔle. Yé yah, kè me wárkínsàhnóle ne,

¹⁶ Tě ñgbě Liyel-á ne ñkě:

«Képah náh, mé kɪ í syɪ pɔ Davidi kéte sónó tɔ mɔ.

Mé kɪ ñ kéntíkínì tɔ mɔ kɪ kè yilki palle.

¹⁷ Képah sɔkɔ, kèkòyó névyé téló pól kɪ yuku ñne n yah n kɔ.

* **15:13** 15.13 - Yúnpyé Nsyifunɔ nónó tyí-á n yo ásò sɔkɔ yò, pépi pɪ Nsyifunɔle nónó-á sě Yesu yɔ.

Gbɪ yõ, kwlo kwlo névye pól ye kɪ n yah n kõ n
pi ñne,
máh pépi nóno ye ne pè pi ní tyíle.»

Sě ye Tě ñgbě Liyel yo, ñmo nê-á tyi nópi wěki
¹⁸ di mónóle.†

¹⁹ Képah yinne, ñmo Nsyakɪ tě sōno soko,
névye nóno-á vi mo Liyel tyí yõ, té Nsyifunɔ
náh péle, á náh yine à tyile n tẽ n tah pé tyí.

²⁰ Nte á ye sébéy wārki n tekɪ n mo pé tyí ne,
pè pé gblõyne n tẽ sãh fálnó yíle, ànê fòfikile,
ànê tó kwé-ńkě kwáhkókè kòle, ànê tónne, sè kō
sè káh pɔ pè silki.

²¹ Yé yah kè, à toko ñgbò dùkù tyí, kéne tyi ye
ńkěne Moyisi tyi kònsahnó soko, pè névyele n
kwɔ mɪ mɪ yòh sōnó pólle kwlo kwlo pól
Nsyifunɔ Liyel ní-ńtân vɪ soko.»

Sébéy tónóle Yesu yõ sěpú tyí, nóno náh pi Nsyifunɔle

²² Képah soko, Yesu tẽntò névye, ànê Yesu yõ
sěpú yah tãm, ànê Yesu yõ sěpú finkì pól yo sah
núkú yõ ne, páh kɪ nósyó yah wilki pé wró, té
kɪ pépi tekɪ mo Pole ànê Barnabasɪle Antyɔsyɪ
kwil. Képah tẽne, Nsyudasɪ, nê-á pè n ye
Barsabasɪle, pè me ñmo ànê Silasɪ yah wilki. Pé
nímí pólle, névye sò me yòyenne n sah pé yõ.

²³ Pè me tẽntò sébéy yó wārki à dahbi pé gbò,
nê soko-á kè me yónóle ne ńkě: «Á yúnpyé yépi
nóno-á Nsyifunɔ náh yéle, té me Antyɔsyɪ, Siri
gběnyah soko, à tahlɪ Siri gběnyah kwlo téló tyí,

† 15:18 15.16-18 - Yah n te Amosɪ 9.11-12.

ànê Silisi gběnyahle; ápi Yesu tǝntò névye ànê yé yúnpyé Yesu yǝ sǝpú yah tǝm ye n wɛkɪ yé tyí.

24 Á kè noh nɛ, nósýó-á wil ápi sokɔ, à kyɪ pé wɛlɔlɛ yé lékám vye fǝkɪ, à yé mɔ sah fókósõno sokɔ. Té ápi náh se mó tǝ tǝ péle.

25 Képah ye, á kè yah tɔkɔ wǝ tyí nɛ, áyáh kɪ névye wilkɪ tɛkɪ mɔ yé tyí. Pè kɪ n pɔ n pi wǝ tyí ànê á nìgbèkì névye Barnabasɪ ànê Polele,

26 pépi nónó-á pé min mɔ kǔ kǔ Tǝ nǝbǝ Yesu Krista tǝ yǐnɛ.

27 Nsyudasɪ ànê Silasɪ ye á n tɛkɪ n mɔ yé tyí. Tyi nónó-á á wǎrkɪ tɛkɪ mɔ yé tyí, pé kɪ pɔ sè tǝ yo yé tyí vyǎhle.

28 Liyel Mirki ànê ápi ye yah tɔkɔ kéle nɛ, á káh tǝ tyi yísýó kǝ sah yé kǝ, à wil tyi nópi tyí sokɔ yò, sépi nónó-á yǐnɛ pínóle káhkáh:

29 Yé yé gblǝynɛ n tǝ sǎh fálnó kòle, ànê tǝnɛ, ànê tǝ kwé-ńkǝ kwáhkókè kòle, ànê fǝfíkì pínóle. Yáh yé gblǝynɛ n tǝ n yǐ sépi pól pínóle, yé mɛ n pi plɛ. Yé tǝnɔ!»

30 Képah náh, pé wǝkùle tǝntò névye kǝ pé sokɔ à kyɪ de Antýosýɪ kwil. Pè kyɪ Yesu yǝ sǝpú tówù tuke mɔ, té tǝntò sébéy mènɛ pé kǝ.

31 Pǎh kè kar, ké sokɔ tyíyónó sǝré mɔ pé sokɔ, kè pi nìvìnìnɛ pé tyí.

32 Képah sokɔ, Nsyudasɪ ànê Silasɪpi tɔ-á sò pi Liyel tǝntò syínyopule sǝ, pépi tyah nolɛ n vi n mɔ, mɛ tyi náhnáhle n yo pé tyí, à sǝréle n mɔ pé sokɔ.

33 Páh sèpìn yísyó pì nénpó, képah náh, no pé fin mɔ, té wɛkɪ pé tyí nɛ, pé de lènɔlɛ pé tópurú ònnɛ. [

34 Té Silasɪ wɔ mɛ nɛ, péwɔ-á kɪ wũ nénpó.]

35 Nte Pole ànê Barnabasɪ tẽ wɔ sò mɛ tẽ Antyɔsyɪ sɔkɔ. Pépì ànê névyɛ náhnáh yísyó sò mɛ nolɛ n kwɔ, té mɛ Tẽ ògbě Nìvìnì tirlɛ n yo.

Pole ànê Barnabasɪ gbékínóle

36 Sèpìn yísyó-á sɔkɔ sɛ, Pole yo Barnabasɪ tyí nɛ, páh Tẽ ògbě wɛy yo kɔ kwlo nónó pól sɔkɔ, à yɛ pé pé syɪ kyɪ yah pé yúnpyé Yesu yò sɛpú tyí kéné kwlo sɔkɔ, pé tyí-à kɪ mɛ òkù nêne.

37 Képah sɔkɔ, Nsyɔ nê-á pé n ye Markɪlɛ, Barnabasɪ sò mɛ ké tyí nɛ, pé ò tɔ tẽ pé sɔkɔ.

38 Nte Pole wɔ náh sò mɛ ké tyí nɛ pé sɔkɔ ònɛ; òmɔ nê-á lésò ò gbɛ wil pé sɔkɔ Pãnfili gběnyah òkù sɔkɔ, té à náh tɔ sò mɛ n kyɪ n pɔ péle pé tò sɔkɔ.

39 Káh pì sɛ, yékâb ògbě de Pole ànê Barnabasɪ wró, pé mɛ gbekɪ. Barnabasɪ mɛ Nsyɔ-Markɪ tẽ tahlɪ ò gblɔy tyí, pé de krótókè ògbě yó sɔkɔ à sɔkɔ Syipri gběnyah.

40 Nte Pole wɔ mó Silasɪ yah wilki. Té Yesu yò sɛpú-á nírí pì pé tyí, à pé dahbɪ tɛ Tẽ ògbě gbò sɔkɔ gbí nêne, pé mɛ sɔkɔ wẽ tyí.

41 Pé Siri gběnyah ànê Silisi gběnyah pól kɔ kɔ, à Liyel yò sɛnó sórɛle n mɔ n yuku Yesu yò sɛpú ònkìnó sɔkɔ.

16

Timote tàhlinóle Pole ànê Silasí tyí pé kóló sòkò

¹ Képah náh, Polepi-á wil Siri ànê Silisi gběnyah sòkò, pè yò sòkò Deribí kwil. Páh wil nénpó, pè yuku Lisitir kwil. Pè kyí Yesu tò sáh-ò yó we nénpó pè n ye Timotele. N yúne, Nsyifu ney ye sò òne, nê-á me Yesu wěkìle n kò, té ò sú me Krekí neyne.

² Té Yesu yò sěpú nónó-á sò me Lisitir sòkò ànê Yikonyumi kwil, pè sò me Timote yíngbìle n yo.

³ Képah sòkò, Pole sò me ké tyí ne pé à tē sòkò pé kóló sòkò. Té Nsyifunò nónó-á sò me kéne kwlo sòkò, pè sò pī ne, Krekí ney-á Timote súle.* Pépi yinne, Pole me Timote kō.

⁴ Képah sòkò, Polepi-à fyò n sòkò kwlo nónó sòkò, Yesu tēntò névye ànê Yerusalemí kwil Yesu yò sěpú yah tām-á tyi nónó yah tòkò, pè séle n yāh kéne kwlo Yesu yò sěpú tyí ne, pè ne n kò sé wāl yò.

⁵ Kāh pī sě, Yesu yò sěpú tìnkínó sò me n gbah n sě Liyel yò, té wān tō me n mọ pé nédán tọ yò sōmesó.

Pole wěkínó yó we Turasí kwil

⁶ Képah náh, Polepi sò me ké tyí ne pé kyí Liyel wey yo Asi gběnyah sòkò, òte Liyel Mirki

* **16:3** 16.3 - Krekí névye náh sò kòkèle n kō. Képah ye, Timote sú kō à náh sò à kō. Nte kòkè kò-òkè névye tyí náh sò nọ Nsyifunò tyí.

kè yahle pé tyí. Kǎh pɪ sě, pè me kah syõ Frisyi gběnyah ànê Kalasi gběnyahle.

⁷ Páh kyɪ yīni tē n tɛ Misi gběnyahle, pè tō kè yah tɔkɔ nɛ, páh kɪ yuku Bitini gběnyah. Ntɛ Yesu Mirki† kè yahle pé tyí.

⁸ Kǎh pɪ sě, pè Misi kɔ kah, à tiki yuku Turasi kwil.

⁹ Té lékâhne, Pole wěkínó yó we. Wěkínó mè sɔkɔ, à Masedonu gběnyah dí yó we yíntténóle, té tē me ñne n ni nɛ nkě, à pɔ Masedonu sɔkɔ, à pɔ pépi yohnu n mɔ.

¹⁰ Pole-á fyò wěkínó mè we sě, á me kè pĩ yíí nɛ, Liyel-á ye ále nɛ, á kyɪ pé Nìvìnì tir yò Masedonu tǎn tyí. Kǎh pɪ sě, á núkú á vi nɛ áyáh kɪ sɔkɔ nénpó.

Lidi-á pɪ Yesu yõ sě-òle òkù nêne Filipi kwil

¹¹ Képah sɔkɔ, á de krótókè ñgbě yó sɔkɔ Turasi kwil, à yõ sɔkɔ gběnyah yó sɔkɔ, nê-á me pne yò nyó pè n ye Samotrasile, á náh kwɔ dah fí yó ntě sɔkɔ. Té ké ñindalle, á yuku Neyapolisi kwil.

¹² Áyáh yal nénpó, á yuku kwíl-ñgbě yó sɔkɔ pè n ye Filipile, Masedonu gběnyah sɔkɔ. Kéne kwil yòtǒrí sò me Wrome tǎn gbò. Á me tē nénpó, à sèpìn yísyó pɪ.

¹³ Nsyifunɔ mɪ mɪ yòh sō-á pɔ nɔ, á kè sō nɛ, pé Liyel ní-ńsah-á kɪ we yóngbalɪ sɔkɔ. Kǎh pɪ sě, á wil kwil nyó, à nénpó nyáh sō. Á kyɪ syó

† 16:7 16.7 - Yesu Mirki nê tyí-á yo ásò sɔkɔ yò, Liyel Mirki ye kéle, nê tyí-á yónóle 16.6.

yísyó we tükènmontěńóle nénpó. Á me kǒ tě pé tnô, à yáhkì yáh péle Liyel wey tyí yǒ.

¹⁴ Tě pi yó sǒ me syó nópi sǒkǒ pè n ye Lidile. Fwòsǎhlo dénkókónì gbò yí-ò ye sǒ ònne. Á n wil Tyatiri kwil, té à sǒ me Nsyifunǒ Liyel wěkìle n kǒ. Tě Tě ògbě me wekì pi mè nì sǒkǒ à kǒ à ò níkí kwǒ, à Pole welo noh palle.

¹⁵ Kǎh pi sě, òmǒ ànê ò kéte tǎn pól me wènwǐlkìnó we ni sǒkǒ. Képah sǒkǒ, pi me kè yah kǒ ápi tyí ne, áyâh kì me sě ké yǒ ne péwǒ-á pi Tě ògbě Yesu yǒ sě-òle, á pǒ n kyì n twah pé tyí pé gbó. Tě á gbah tě pópó, á pǒ sah ò tyí yǒ.

*Pole ànê Silasí dáhnmonǒle wòkònpèkè sǒkǒ
Filipi kwil*

¹⁶ Képah sǒkǒ, sǒ yóle á me n yuku nírí pí-ńsah, té tǒnpi pípír yó pǒ á yohnì. Sétǒ sǒ me kéne pípír gbil à kǒ à tyísnóle n we n yo. Á sǒ me pó náhnáhle n we ò yòtǎmne n kǒ kéne tyísnó wényonǒ sǒkǒ.

¹⁷ Kéne pípír me yuku, à ápi ànê Pole sǒ tě, té me yo tǔ léyy no tyí ne ńkě, díbí nópile, yòtah Liyel tǒnpu-á péle. Pwáhnmonǒ wěkì tyí-á pè pǒ n yo pé tyí.

¹⁸ Á sǒ me képah těne n pi sě, sèpìn náhnáh sǒkǒ. Kǎh pǒ Pole gblóle n vyâh, à ò yah vi yo sétǒ mè tyí ne ńkě, Yesu Krista yìn yǒ, à pípír mè fin mǒ. Wǎh yo sě, nénpó swǒ sétǒ núkú pípír fin mǒ.

19 Képah sɔkɔ, pípír yòtām-á kè wε ne, pé sōnɔ-á sò me pó nê wénó yō ñmɔ gbò yō kǎh kɪ yīn mɔ, pè Pole ànê Silasɪ tẽ, té yuku péle yòtām tyí, tówú tükè-ñsah sɔkɔ.

20 Képah náh, pè me kyɪ péle Wrome tǎn yísyó tyí nónó-á pé yòtāmne, té kyɪ tyah n yo ne ñkẽ, díbí nópi-á me fěkínóle n pɪ pépi kwil. Nsyifunɔ-á péle,

21 té pǎh me pɔ wǎl yísyóle névyele n kwɔ nónó-á sé wǎl náh me pépi Wrome tǎn nítẽ tyí kɪ sè fě syi, képah náh pɪ, kɪ sè pɪ n pɪ.

22 Képah tẽne, tówú tɔ núkú yuku Polepi yō. Yòtām nópi me pè kō pè Polepi flo de, té ne pè pè ko yèfõhle.

23 Képah sɔkɔ, pǎh yèfõh yí náhnáhle pè ko te, pè pè dah mɔ wòkònpèkè sɔkɔ, té yo ké syíkí-ò dí tyí ne, à péle n kyomɪ palle.

24 Dí-á fyò képah noh sɛ, à mó pè tẽ dah mɔ wòkònpèkè nyó wòkò sɔkɔ, té sésár kárn mɔ pé gbyêh tyí.

25 Nte lénɪ mónó wró sɔkɔ, Pole ànê Silasɪ sò me nírilé n pɪ, té me yìle n gbɪ à Liyel yinne n gbilki, té wòkònpèkè sɔkɔ névyé téló mó me n nohnɪ pé tyí.

26 Képah tẽne, sétáh syahrɪ ñgbẽ núkú pɪ nénpó swɔ, à wòkònpèkè sètyah yike. Ké vɪ yey pól núkú yikɪ mɔ, ké sɔkɔ névyé pól gbyêh sɔkɔ kárnno pól kōlɪ kwe.

27 Wòkònpèkè syíkí-ò dí-á pópó dɔ yuku, té ké

vì yey we yíkinm̀oǹole sě, à we ne ké soko névye-á to wil. Képah tẽne, à núkú ò kèkírki yori de ne, pé pé gbl̃y ko m̀o.

28 Nte Pole me yo m̀o ò tyí ýinp̃ òngbẽne ne, à káh dlo yó ntẽne ò gbl̃y ǹo, pé pól-á me ásô.

29 Képah soko, ẁòk̀oǹpèkè syíkí-ò dí pè k̃o pè p̀o f̀òtǹole à k̃o, à de yuku súú ẁòk̀oǹpèkè niỹó ẁòk̀ò soko, té ò gbètukuǹo di Pole ànê Silasì yah wílsyahri soko.

30 Té me pè tẽ wil kégbó, té pè piki yah ne, pé nénkyíbí, s̃o se pé ýne pé pi pé mó pwáhñm̀oǹo we ni?

31 Pè me yo ò tyí ne: «Sě Tẽ òngbẽ Yesu ỹo, á k̀i pwáhñm̀oǹo we, áw̃o ànê á nolé.»

32 Képah soko, Polepi Tẽ òngbẽ Yesu wey yo òm̀o ànê ò gbó tãn pól tyí.

33 Dí me Polepi tẽ légbí mè ó soko lékâhne, à kyí pé níy wu; té nénpó sw̃o, òm̀o ànê ò gbó tãn pól me wèlnwílkinó we ni soko.

34 Képah náh, à Pole ànê Silasì tẽ yuku ò gbó soko, à kyí ỳokele pè k̃o pè ỹo. Té òm̀o ànê ò no pól ni s̃o me vi ýí pé wénsẽǹo ýinne Liyel ỹo soko.

35 Képah soko, tyah-á p̀o dal, ỳõtãm̀ nópi tẽntò névye tek̀i m̀o ne, pè kyí yo ẁòk̀oǹpèkè syíkí-ò dí tyí ne, à dibí nópi fin m̀o.

36 Dí me kyí kè yo Pole tyí ne níkě, ỳõtãm̀-á tẽntò m̀o pé tyí ne, pé pè fin m̀o. Káh pi s̃e, núkúnúkú páh k̀i f̃e wil k̀i n yuku yèviǹi soko.

37 Nte Pole me pè syah ne, pépi nóno-á gbò

mɔ yõ Wrome tãn tyí, pépi kó pè tè ko tówû yí yah pé tükè-nkēne; té pé dah mɔ wòkònpèkè sòkò nì? Té nùkúnúkú, pè tǒ me n yah n kǒ pé wìlkìnfìnmɔ-ńsahle sètìn sò sòkò nì? Képah náh fẽ n pì n pì dé! Nkě, fók pé dahnmɔpu-á kù pɔ pé fìn mɔ pé gblɔy.

³⁸ Képah tẽne, tẽntò névye nópi me pé syi kyi welo nópi yo yõtãm nópi tyí. Pépi-á képah tẽ noh sẽ ne, Pole ànê Silasile, Wrome tãn gbõnmònyõbe-á péle, tiki pè tè.

³⁹ Pè pɔ gblɔy ye yah kǒ Polepi tyí, té pè fìn mɔ, té me pè nì ne pè wil kwil sòkò.

⁴⁰ Polepi-á wil wòkònpèkè sòkò, pè yuku Lidi tinnè. Pãh kyi Yesu yõ sɛpú wɛ, pè sórè mɔ pé sòkò té sòkò.

17

Pole ànê Silasì Liyel wey yónóle Tesaloniki kwil

¹ Képah náh, Polepi syõ Anfipolisi kwil ànê Apɔlɔnì kwil, à kyi de Tesaloniki kwil sòkò. Nsyifunɔ Liyel ní-ńsah wòkò yó sò me nénpó.

² Képah sòkò, Pole-á sò nkēne kéle n pì sǒ, à tǒ kyi yãhkì yãh Nsyifunɔle Liyel wey sɛbéy sòkò tyi yõ pé Liyel ní-ńsah wòkò sòkò. A képah tẽ pì syi sẽ wẽ tyí ke tǒnó, pé mì mì yòh sònóle.

³ A sò me ké yahle n yo pé tyí, à péle n wɛkì ne nkě: «Pwáhnmɔ-ò sò yĩne à pɔ yèvyãhrì pì ku sẽ, Liyel mó à yilki mɔ. Yesu nê tyí-á mé n yo yé tyí yò, òmɔ ye kéne pwáhnmɔ-òle.»

4 Képah sòkò, Nsyifunò tókù sah ò tyí yǒ, ànê Krèkì névye nékwínkíle, nónó-á sò me Nsyifunò Liyel wěkíle n kò, à tahlì syó né-̀ngbò náhnáh tyí. Pé pól me mò Pole ànê Silasíle.

5 Nte Nsyifunò yísyó sò me Polepi dyòle n yò, té sòkò à kyì nétúkúnì òkònkòni yísyó tē wǎl yey sòkò, à pò tówùle n kurki n mò, té fěkìńóle n pì kwil sòkò. Képah sòkò, pè kyì kwò de Nsyasò gbò, à Pole ànê Silasíle n yah n kò ne, pé pè tē pò tówù tyí.

6 Páh kyì pè yah kwò sě, pè Nsyasò ànê Yesu yǒ sěpú yísyó tē à yuku péle pé kwil yòtām tyí. Té kyì tyah n yo wòhòh ne, nónó-á fěkì kèkòyó pólle, pépi-á pò de ásò tò sòkò yò.

7 Té Nsyasò me fě syì pè kò pè twah ò tyí. Nte Wrome kwíltām yòtē Sesar-á ne tyì nónó káh ne n pì, sépi-á no nópi pól me n pì. Páh me n yo ńtēne ne, yòtē ògbě yó-á tǒ me, nê-á pè n ye Yesule.

8 Képah sòkò, wèlò nópi nóhnó tówù ànê kwil yòtām fòkò fil.

9 Káh pì sě, kwil yòtām me Nsyasòpi kò pè pò ògbě yó kò, té pyě pè fin mò.

Pole ànê Silasí Liyel wey yónóle Bere kwil

10 Képah sòkò, lékáh-á fyò mò, Yesu yǒ sěpú me Pole ànê Silasí kò pè sòkò Bere kwil. Páh yíni tē nénpó, pè kyì Nsyifunò Liyel ní-ńsah wòkò sòkò.

11 Nénpó tǎn sǒ nэгblóle kal Tesaloniki kwil tǎnne. Nìvìnì tir nê-á sǒ Pole n yo Yesu tyí soko, pè me kè fě syi palle dékè soko. Té me Liyel weyne n kar, à ké soko tyile n sohlì n yah sòmésó ne, pé pĩ gblo-à kì nê Polepi welole.

12 Kǎh pì sě, Nsyifuno náhnáh, ànê Kreki syó né-ngbno yísyó, ànê díbí nékwínkí pì Yesu yó sěpúle.

13 Nte Tesaloniki kwil Nsyifuno-á fyò noh ne, Pole-á me Liyel weyne n yo Bere kwil tó soko, pè tǒ pò nénpó tó soko, à pò tówú kurki mǒ, pè kǒ pè fěkìnó pì.

14 Képah soko, Yesu yó sěpú núkú Pole tekì mǒ pne yo òinne. Té Silasì ànê Timote wǒ me wũ nénpó.

15 Nónó-á kyì tekì mǒ Polele, pè kyì de òne, fók Atenu kwil. Té pǎh pé syì n pì, Pole me pè tǒ ne, pǎh kì kyì, pè kyì yo Silasì ànê Timote tyí, pè pò péwǒ tnó súú.

Pole Liyel wey yónóle Atenu kwil

16 Té Pole-á sǒ me Silasì ànê Timote syíkíntěné soko sě Atenu kwil, à fal fal tǎn kyomì we dò kéne kwil soko. Kǎh pì sě, ò yah kah kwǒ.

17 Képah soko, à kyì yǎhkì yǎh Nsyifunole, pé Liyel ní-nsah wòkò soko, à tahlì nónó tǒ-á sǒ me Nsyifuno Liyel wěkìle n kǒ. Té sòmésó, wǎh kyì tówú tükè-nsah, té névye nónó we nénpó, à yǎhkì yǎh pé tole.

18 Té lékám ñgbnɔ névyé yísyó tɔ sò me. Pè túkù sò me Yepikur wěkì kwópúle, té túkù mó me Setoyiki wěkì kwópúle. Pépi me yékâb mɔ Polele. Pé túkù sò me yo tũ ne, wènkwĩnki ney mètɔ se ne sǒ-á nɪ? Túkù mó ne, kǎh pɪ tẽ ne fal fal tǎn káhkí yísyó tyí sǒ à n yo, nónó-á pépi náh séle n pne. Té Nìvìnì tir ye sò Pole n yo pé tyí Yesu tyí yõ, ànê lékýì yílkinmɔnɔ tyíle.

19 Képah tẽne, pè à tẽ sɔkɔ pé kwil fí yó sɔkɔ pè n ye Arewopasile.* Pǎh kyɪ de, pè me à piki yah ne, wǎh pɔ kwónó késán nêne névyele n kwɔ, à se kɪ fě ké yah yo pé syah nɪ?

20 Nkě, gběndùñ tyi ó-á à n yo pé n nohnɪ yò. Képah-á, à sé yah yo n wah pé syah.

21 Nte gbɪ yõ, Atenɪ kwil tǎn pól ànê népân nónó-á sò me twáhntěnóle ké sɔkɔ, pé pól ñkěne pé wró kan tɔkɔ n pɪ tyísnó yǎhnóle, képah náh pɪ, sé nóhnóle.

22 Képah sɔkɔ, Pole me yuku yĩn pé nyó, té yo pé tyí ne: «Atenɪ tǎn, mé pĩ ne ñkě, Liyel yáhnkɔpu yèsyìkìnì-á yéle.

23 Máh yé kwil kɔ kɔ, mé kè kyɔmɪ we, líyelno náhnáh me ké sɔkɔ. Té mé tyah yó ñtẽ we, kè me wárkínmɔnɔle ké yõ ne: «Dúkù pĩ-ñkě liyel tyí ye.» Té ñmɔ nê-á yé n gbilki ñ dükù pĩ-ñkěne, ñmɔ tyí ye mé pɔ yónwàh-ñsah yé tyí.

24 Nmɔ Liyel ye mɔ kèkõyóle, ànê ké sɔkɔ

* **17:19** 17.19 - Arewopasile, kènpìn yó ye sò kéle, nê yõ-á sò né-ñgbnɔ wěne n we n pɔ, ñ tyi yahle n wah.

yíyìn pólle. Nmo ye tǒ yínyǒ ànê sétáh nétēne.
A náh n tē névi gbò wòkònmòni soko.

²⁵ Nmo ye mo minne névi soko, ànê mìnìne à kǒ à n mi, à tahlì yíyìn pól tyí. Képah ye, à náh me névi gbēnpini yó ntēne n yah n kǒ, n gblǒy yohni n mo yinne.

²⁶ Yah, nénúkù ó soko ye kèkǒyó yìkìni pól wil Liyel-á nónó mo, té pè kǒ pè tē tē kǒ kèkǒyó tǎntǎn pól soko. Té ki ànê kòkì gbíne pè kǒ, té tǒ gbàhnì gboke pé tē-ntǎn tyí.

²⁷ Liyel sépi pól pi ne, nénúkù núkú pól fē pé yah n kǒ. Gbòkēnpì, pǎh kù wne yah kǒ pò pé we. Nte gbì yǒ, à náh mó tǒ me fíí á soko yó ntēne.

²⁸ Nmo gbò yǒ soko ye ápile min soko, té me n werke. Képah ye tǒ yé yì gbípú yísyó yo ne nkē, Liyel wēnpì-á ápile.

²⁹ Nte Liyel wēnpì-á ápile sē, á se tǒ yīne à ne n sǒ ne, Liyel-á me á kù ne tǎn nǒpi sǒ; sépi nónó-á névyè sè mo sǎnne, képah náh pi wárn vyǒrùle, képah náh pi dyèhle, à yīne pé yēngbē lékámne?

³⁰ Té yé yah, névyè-á tyi nónó pi soko n̄p̄-ànkē soko n̄gbòle, Liyel náh tǒ me sépile n mo n kǒ. Nte núkúnúkú, à me kéle n yo no pól tyí tǎntǎn pól soko ne, pè pé nno vi mo.

³¹ Wáh we à képahle n yo, à me gbìyìkì yó yah wilki sah, sǒ nê-á tukey kù n tuke n pi kèkǒyó névyè pól yǒ, à yīne gbì wèkìle. A me dí yó yah wilki sah, nê-á kù pò tukey mè tuke n pi, té pǎh

Ɔɔ tẽ ko mɔ, à n̄ lékó yilki mɔ, à kéle á wẽkɩ ne,
wãh kɩ fĩ tẽ.»

³² Képah tẽne, pãh fyò lékó yílkínmonɔ tyí
noh, pé túkù tyah kóle Polele n ko. Túkù mó me
n yo n̄ tyí ne nkẽ, sɔ yóle, à tɔ Ɔɔ n̄ syɩ n̄ wey
mè yõ pé tyí.

³³ Kãh Ɔɩ sã, Pole me yal pé tnô.

³⁴ Nte n̄ wey nóhpú túkù kyɩ kwɔɔ mɔ ñne, à
Ɔɩ Yesu yõ sãpúle. Né-ñgbnɔ nónó-á nkẽne wẽne
n tuke n mɔ, n̄ tyi yahle n wah, pépi ney yó tɔ
sò me péle pè n ye Denisile, ànê sê yó tɔle pè n
ye Damarisile, à tahlɩ nósýó tyí.

18

Pole Liyel wey yónóle Korěnti kwil

¹ Képah nãh, Pole yal Atenɩ kwil, à yuku
Korěnti kwil.

² Légbí Ɔɔ yĩne Wrome kwiltãm yòtẽ dí Klode
me Nsyifunɔ pól yal Wrome kwil. Kãh Ɔɩ sã,
Nsyifu dí yó lésò me nénpó pè n ye Akilasile. A
dubi Põte kwil. Nmo ànê n̄ kyɩ Prisili me yal
Wrome kwil, Yitalɩ sétáh yõ, à sɔkɔ Korěnti
kwil. Pole me kyɩ yĩne pé póntwahno késãne
nénpó, té kwɔɔ mɔ pé sɔkɔ.

³ Té pé pól sò me tò núkúle n Ɔɩ, nê-á Ɔɩ yèpye
flo kóhnóle. Kãh Ɔɩ sã, Pole me tẽ pé tyí pè tòle
n Ɔɩ wẽ tyí.

⁴ Té mɩ mɩ yòh sònó pólle, Pole sò me yãhkìle
n yãh n Ɔɔ Nsyifunɔle pé Liyel ní-ńsah wòkò
sɔkɔ, me n yah n kɔ ne pé pépi ànê Krekɩ névye
sònɔ vi mɔ.

5 Képah sòkò, Silasì ànê Timote wil Masedoni gběnyah à pò. Páh fyò pò de, Pole náh tǒ me tǒ yó ntěne n pi né Liyel wey yónkǒnò ó náh. A sǒ me ké yahle n yo Nsyifunò tyí ne, Yesu-á Liyel yah tǒkò pi pwáhnmo-òle.

6 Nte Nsyifunò me kè yahle n tyí, té nne n gbyò. Káh pi sě, à n wil flo kwer, té yo pé tyí ne, pé mónpunò kémû-á kɪ pi pé yěngbě tyíle, péwò vyāh náh me ké sòkò. A tǒkò núkúnúkú tyí, páh kɪ pé yah mǒ névye tinnè, nónó náh pi Nsyifunòle.

7 Képah sòkò, té yal nénpó à sòkò dí yó tinnè, nê-á pé n ye Tityusi-Nsyusitusile. Nsyifunò Liyel yǒ sě-ò ye sǒ nne. N gbò sǒ me Nsyifunò Liyel ní-nsah wòkò gbòpò sòkò.

8 Nte Liyel ní-nsah wòkò yǒtě dí Krisipusi ànê n no pól sě Tě ñgbě Yesu yǒ. Korěnti kwil tǎn nónó tǒ-á sǒ me Pole weyne n nohni, pé náhnáh sě Tě ñgbě yǒ, té wèlnwìlkinó we ni sòkò.

9-10 Képah těne, sǒ yó lékâhne, Pole wěkínó yó we, nê sòkò-á Tě ñgbě yo n tyí ne: «Névye náhnáh kɪ n pi n pi nmo tyíle kwil mè sòkò. Képah ye, káh á vyāh vike n sah, yǒ n sòkò ne n wèkɪ, káh tíkí pi. Nmo me ále, ney náh fě n tě n tir n pi pólle.»

11 Képah těne, Pole tě, à yi núkú ànê nǒwǒlò kénúkò pi Korěnti kwil, à nolè n kwò Liyel weyne.

12 Képah sòkò, Nsyifunò pò yuku wě tyí mǒ, à tyah Polele n fwo. Té légbíne, Kalyǒ ye lésò

Akayi gběnyah yah tẽ-òlẹ. Pè me Pole tẽ kyɪ n̄ tyí tukey tũkè-ńsah sɔkɔ,

¹³ té ne dí mè-á me névyẹ yǒlẹ n̄ yɪkɪ, à pélẹ n̄ mɔ Liyel níńó gběntěńáh yó sɔkɔ, nê náh me nukúle pépi tyi kònsàhnólẹ.

¹⁴ Képah sɔkɔ, Pole-á me ne pé wey tɔkɔ, Kalyõ me yo Nsyifunɔ tyí ne, kàh sò me pi tyíkěkì, képah náh pi, tyí pékè ñgbě yólẹ dí mè pi, páh náhki tẽ noh pé tyí pallẹ.

¹⁵ Nte páh se me yékâblẹ n̄ pi welɔ, ànê yni, ànê pé yěngbě tyi kònsàhnó yõ té; képah-á me pépílẹ n̄ yah kè. Péwɔ náh fě sěnkõ tukey tuke n̄ pi ló!

¹⁶ Té me pé yal tukey tũkè-ńsah sɔkɔ.

¹⁷ Képah sɔkɔ, Sositeni nê-á sò Nsyifunɔ Liyel ní-ńsah wòkò yah yètěne, pé pól tuke ñmɔ yõ, à ñne n̄ ko tukey tũkè-ńsah sɔkɔ. Nte Kalyõ náh dahbi wilki pé tyí ké sɔkɔ.

Pole syínyukunɔlẹ Antyɔsyi kwil, Siri gběnyah sɔkɔ

¹⁸ Képah sɔkɔ, Pole tõ wũ à sèpìn náhnáh pi Korěnti kwil. Képah náh, à wěkì ni Yesu yõ sěpú tyí nénpó ne, páh kɪ pé syi yuku Siri gběnyah sɔkɔ ànê Prisili, ànê Akilasilẹ. Té à lésõ me ñ vyãh tɔkɔ Liyel tyí. Kãh pi sě, wãh pópó n̄ sɔkɔ, à kyɪ Sãnkri kwil, à kyɪ ñ yõ kye vyãh tókónó mè yĩnne.*

* **18:18** 18.18 - Nsyifu ney-à sò ñ vyãh tɔkɔ Liyel tyí, à náh tõ ñ yólẹ n̄ kye, fók n̄ pɔ nɔ ké tyénó tyí. Yah n̄ te Yáhnó 6.1-21.

19 Képah náh, òmò, ànê Prísìlì, ànê Àkìlàsì kyi de krótókè ògbě yó sòkò, à yal nénpó à kyi de Yefesì kwil. Pole με ò kómù sah nénpó, té με sòkò Nsyifunò Lìyel ní-ńsah wòkò sòkò, à kyi yáhkì yáh péle.

20 Képah sòkò, pè kè yah kò ò tyí ne òkě, à tǒ sèpìn yísyó pì pépile nénpó. Nte Pole náh fě syi.

21 Té με wěkì ní pé tyí, té ne òkě, Lìyel-à kì fě syi, sǒ yóle, páh kì tǒ pé syi pò yah pé tyí. Té de krótókè ògbě sòkò Yefesì kwil, à sòkò.

22 Wǎh kyi tiki Sesarì kwil, à dòkò yuku Yerusalemì kwil, à kyi wẹkì Yesu yǒ sǎpú tǐnkì tyí. Wǎh wil nénpó, à ò syi tiki yuku Antyosyì kwil,

23 à kyi tǎ yah nénpó. Képah náh, à tǒ yal à kyi Kalasì gběnyah kwilo kò kǒ ànê Frìsyì gběnyah kwolole, à òsǎh mò kǒ Yesu tǒ sǎhpú sòkò.

Apòlòsìlẹ Yefesì ànê Korěntì kwil

24 Légbíne, Nsyifu dí yó pò Yefesì kwil. N yín ye sǒ Apòlòsìlẹ, à dubi Àlekisǎdri kwil. A sǒ wey tyí yah we yíí, té à mó tǒ Lìyel wey sǎbéynó tyi pǐ yíí.

25 À lésǒ kwónó we Tě ògbě Yesu wěkì tyí yǒ, té με Yesu tyíle n yò, à kwónóle n pì kè wěkì yǒ, dékè sòkò ò nì pólle. Nte Nsyǒ ní sòkò wènwìlkinó ó ye sǒ à n pne.

26 Té sǒ yóle, wǎh tyah n wẹkì òsǎhle Nsyifunò Lìyel ní-ńsah wòkò sòkò sě, Prísìlì ànê Àkìlàsì με ò wey noh pò tyẹ. Képah tǎne, té à

ye yah kyɪ Yesu wě̀kì tyi yo wah yíí à syah, wǎh sò me nónó yítũri sòkò.

²⁷ Képah náh, Akayi gběnyah sókónó sǎnɔ de Apòlòsì sòkò. Yesu yò sě̀pú nónó-á sò me nénpó, pépi me ké sóré gbah mɔ̀ n sòkò, té sébéy wǎrkɪ tɛkɪ mɔ̀ Yesu yò sě̀pú tyí Akayi gběnyah sòkò nɛ, Apòlòsì-à kɪ yíni tě̀ pé tyí, pè à tě̀ plɛ. Wǎh kyɪ yíni tě̀, Liyel gbò yò, n kyínó sò pɪ yíí yòre ñgběne Yesu yò sě̀pú tyí Akayi gběnyah sòkò.

²⁸ A sò me Liyel weyne n kar, à kéle n wě̀kɪ nɛ, Yesu-á Liyel yah tɔ̀kɔ̀ pɪ pwáhnmɔ̀-òlɛ. Tówú pól yí yah, n wey sò me gbɛle kal Nsyifuno tyíle.

19

Pole yínintě̀nɔle Yefesɪ kwil

¹ Gbí nê-á sò Apòlòsì me Korě̀nti kwil, Pole sò me Asi gběnyah tley tǎntǎn kɔ̀ kah, à kyɪ de Yefesɪ kwil sòkò. A kyɪ Yesu tò sǎhpú yísyó we nénpó,

² té pè piki yah nɛ níkě, pǎh sě̀ Tě̀ ñgbě Yesu yò gbí nêne, pè se Liyel Mirki we nɪ? Pè me yo n tyí nɛ, pé náh Liyel Mirki yó nítě̀ tyí yónó noh yah pólle.

³ Képah sòkò, Pole me pè piki yah nɛ, ñte ni sòkò wè̀n-wilkinó òkù nê se pè we nɪ? Pè me à syah nɛ, Nsyò tyí-á.

⁴ Képah sòkò, Pole tǔ̀ n syɪ yo pé tyí nɛ, névyɛ nónó-á fě̀ syi pé nno vi mɔ̀, pépi-á sò Nsyò n wel n wilki ni sòkò. Nte wǎh sò me n yo névyɛ tyí

ne, nê-á kɪ n pɔ n pi péwɔ náhle, pè sɛ̀ òmɔ yǒ; òmɔ nê-á Yesule.

⁵ No-á wɛlɔ nòpi noh sɛ̀, pè me wèlnwìlkinó we ni sɔkɔ Tɛ̀ ògbɛ̀ Yesu yín yǒ.

⁶ Pole me ò gbàn sah pé yǒ té nírí pɪ pé tyí, Liyel Mirki me tiki pé yǒ. Képah tɛ̀ne, pè tyah wénkáhkinóle n wɛkɪ nónó-á pè náh sè sãh,* té me Liyel tɛ̀ntònène n we n syi n yo névyé tyí.

⁷ Pé pól sò me nɛ̀pɪ̀ gbõnimí kénkõle.

⁸ Képah sɔkɔ, Pole sò me n de n pɔ Nsyifunɔ Liyel ní-nsah wòkò sɔkɔ. A sò me n yãh n pɔ névyéle nìsãh sɔkɔ Liyel tǒrí tyí yǒ, pópó ñwǒlò tǒnó. A sò me ò tah sah ne, pé pé wey nóhpú sònɔ vi mɔ.

⁹ Nte tókù sò me pɔ nikisekókóle n pɪ, à yahle sɛ̀nóle ké yǒ, té me Tɛ̀ ògbɛ̀ wɛ̀kì tyíle n yo n kò tówù yí yah. Kãh pɪ sɛ̀, Pole me pè sah, té Yesu tò sãhpú tɛ̀ sɔkɔ pé yahle, à kyɪ yáhkìle n yãh péle sòmésó kãrn pí-nsah wòkò sɔkɔ, nê-á Tiranusi tyíle.

¹⁰ A képah tɛ̀ pɪ sɛ̀ ye nínó, fókó Nsyifunɔ ànè nónó náh pɪ Nsyifunɔle, té me Asi gbɛ̀nyah sɔkɔ, pé pól Tɛ̀ ògbɛ̀ wey we noh.

Seva dínpi tyípinìne

¹¹ Liyel sò me Pole tɔkɔ à gbìl tyísnóle n pɪ,

¹² fókó névyé pɔ tyah Pole flɔ ànè ò myèhtùkènène n tɔkɔ n tũ n pɔ pé yámpú tyí,

* **19:6** 19.6 - Yah n te 2.4.

pè kǒ pè n de; ànê sétàn-à me nónó sǎkǎ, sè n wil pé sǎkǎ.

13 Té Nsyifunǎ yísyó sǒ me nónó tò-á sǒ sétàn yínínwìlkǐnkǒnǎle névye sǎkǎ. Pépi tǎ me kè yah tǎkǎ ne, pé Tě ñgbě Yesu yīn tǎkǎ kéle n pǐ. Pè sǒ me n yo sétàn tyí ne, Yesu nê tyí-á Pole n ne n yo, ñmǎ yīn yǒ, ñkě sè wil.

14 Nsyifunǎ sǎkǎ, sárká syínwìlkǐpu yǒtě nê-á pè n ye Sevale, ñmǎ dǐnpǐ nǐpǐ kwǎrnimi ye sǒ n pǐ kǐpahle.

15 Nte pǎh kǐpah yo sě, sétǒ pè syah ne, pǎh Yesule n pne, té tǒ pǐ névi òkù nê-á Polele. Nte pépi-á ò, nónó se pépile n?

16 Kǐpah tǎne, sétǒ-á sǒ dǐ nê sǎkǎ, à yuku mǐ pé sǎkǎ, té tǎ we pé tyí kǐpékèyǒ. A pè pǐ yo, fǒó pè to wil wǒkǒ mè sǎkǎ à sǎkǎ wil títíle.

17 Kǐpah sǎkǎ, Nsyifunǎ nónó pól-á sǒ me Yefesǐ kwil, à tahlǐ nónó náh pǐ Nsyifunǎle, pǎh yī mè noh, kè pǐ tíkíle pé pól tyí. Pè me tyah Tě ñgbě Yesu yīnne n gbilki.

18 Té nónó-á sǒ pǐ Yesu yǒ sǐpúle, pé náhnáh pé tyítúkúnǐ pínǒle n yo n dal n mǎ n pǎ tówú yí yah.

19 Kǐpah sǎkǎ, nónó-á sǒ me snèyne n pǐ, pé náhnáh me pé snèy pǐ pǐ sébéynǎ tǎkǎ pǎ tuke mǎ, à suke no pól yí yah. Pǎh sébéy nǒpi drǎ kǒ yah, sè pǐ pǎ pló kèyǒ túkúrí pǎ kwǎlǎle.†

† 19:19 19.19 - Légbíne, pǎ pló kèyǒ túkúrí pǎ kwǎlǎ (50 000) kǐ sǒ fě nǐpǐ gbǒnkenúkǒ kénkǒ tò pínǎ pǎ dyah ye gbǎm sǎkǎ.

20 Sě ye sò Liyel wey me tǎhkìle n we, à n tǒ n mo n yuku yahle Tě ñgbě gbò yõ.

Fěkìno ñgbě nê-á pi Yefesì kwil

21 Tyi nópi pínsokonteno náh, Pole kè yah tókò ne, páh kɪ kyɪ Masedonɪ gběnyah ànê Akayi gběnyah sòkò, té kɪ pyě yuku Yerusalemɪ kwil. A sò me kéle n yo tole ne ñkě, páh kɪ yīni tē nēnpó, páh yīne pé kyɪ Wrome kwil to sòkò.

22 Kǎh pi sě, à me Timote ànê Yerasitɪ tɛkɪ mo Masedonɪ gběnyah sòkò, pépi nónó-á sò ñ yòhnìnmopule. Té ñmo wò wũ à sèpìn yísyó pi Asi gběnyah sòkò.

23 Légbíne, fěkìno ñgbě yó pi Yefesì kwil, Tě ñgbě wěkì tyí sòkò.

24 Sán ywó-ò kètòndí yó lésò me pè n ye Demetriyusile. Kéne dí ñkěne tǎn vì yáryár yísyóle ne n ywò wárn vyorɪ pépérle. Yefesì tǎn tò yǔkì nê-á pè n ye Artemisile, képah wòkò kètónó ye ñkěne à n ne n ywò. Té ñ tǔnpɪbɪ sò me póle n we yíí ñ tyí, tò mè pínó sòkò.

25 Sò yóle, à ñ tǔnpɪbɪ pól ye tuke, à tahlɪ ñ tò dùkù pípú pól tyí. Képah tēne, té yo pé tyí ne ñkě, pé kódíbí, pé pól-á kè pĩ yíí ne páh me yõrele n we n yíí pé tò mè pínó sòkò.

26 Nte dí nê-á pè n ye Polele, wǎh me pò tir nēne n pi, páh se me kéle n nohnɪ, té me kéle n yah té. Kéne Pole-á me névyele n kwò ne ñkě, fal fal tǎnne, névye gběnpɪno yí-á séle, yõ náh me sé tyí. Kéne wey mè ñtē-á me névye náhnáh

yõ yíkí Yefesí kwil. Té kè náh se tǒ me yĩn képah ó tyí, ñkě kǎh me Asi gběnyah kwlo kan pól névye yõle n yíkí.

²⁷ Kǎh yõ sɔkɔ sě, yĩ mè-á kí n syah pépi pí pí tǒle n yíkí dé! Kè náh se tǒ n yĩn n pí képah ó tyí, pé fal fal tǒ yǔkí Artemisi wòkò náh tǒ n mɔ n kò n pí pólle. Gbílkinó nê-á sò me n sah tǒ mè yõ, kǎh kí yĩn mɔ. Té képah-á mó tǒ Asi gběnyah névye pól ànê kèkõyó névye pól me n gbilki.

²⁸ Demetriyusi-á fyò kéne welo yo névye noh sě, pé fɔkɔ kah vyãh. Pè me tyah yo tǔ wòhòh ne ñkě, pépi Yefesí tǎn Artemisi tě wɔ kénkò náh me.

²⁹ Píntũnɔ mè yínpɔ kwil pól tǒ. Té Masedoní gběnyah tǎn nǎpí ní mí yísyó tɔ sò yuku Polele ñ kóló sɔkɔ Yefesí kwil. Pé sɔkɔ núkú yĩn ye Kayusile, ní-ò yĩn me Arisitarkile. Képah těne, no núkú wě tyí mɔ, à to tuke nǎpí ní mí nópi yõ, à pé tě yɔrɔ sɔkɔ pé tówù tükè-ñsah sɔkɔ.

³⁰ Képah sɔkɔ, Pole sò me ké tyí ne, pé kyí pé yõ wilki mɔ tówù tyí. Nte Yesu tǒ sǎhpú me kè yahle ñ tyí.

³¹ Asi gběnyah né-ñgbnɔ yísyó tɔ sò me, nóno-á sò Pole kódíbile. Pépi tɔ me tǎntò mɔ ñ tyí, à à vi mɔ ne, à kǎh n kyí tówù tükè-ñsah mè sɔkɔ.

³² Té légbíne, tówù mè névye pól sò me wɛkí fěkí tǔ wòhòh, té pé pól tyíyónónɔ mó tǒ me sé tyí tyíle. Kǎh pí sě, kè pí fěkínóle. Névye kan

ńtě náh sò me pé pónó yõ pĩ.

³³ Nsyifu dí yó tɔ sò me pè n ye Alekisãdrele. Pé no Nsyifunɔ me ñmɔ kurki mɔ kyɪ sah tówû yah ùnne ne, à yo ké sɔkɔ. Képah sɔkɔ, Alekisãdre me ñ gbò pɪ mɔ tówû tyí. A sò me ké tyí ne, pé pé no Nsyifunɔ vyãh syi.

³⁴ Nte tówû-á fyò pɔ n pĩ ké sɔkɔ ne Nsyifu ney-á ñne, pé pól núkú tǔ tyah yo mɔ tũ wě yõ wòhòh ne ñkě, pépi Yefesɪ tãn Artemisi tě wɔ kénkɔ náh me! Pè képah tě yo tũ sě, pópó kè syi pɔ n nɔ lérínó nínó kénkɔ tyí.

³⁵ Nte ké tyé-ńsah, kwil sébéy wárkí-ò dí‡ pɔ tě we pè yĩn mɔ. Képah sɔkɔ, té me ne ñkě, Yefesɪ tãn, névyé pól-á pĩ ne, Yefesɪ kwil-á n syɪkɪ pépi fal fal tǔ ñgbě Artemisi wòkòle, ànê ké tàhsè nê-á wil yínyõ à pɔ syɪkɪ.

³⁶ Ké kǒlì-ò náh me pólle. Képah-á, pè pé nno vi. Pè káh tir yó ńtě pɪ sònyah-ńkěne.

³⁷ Díbí nónó-á pè tě pɔ ásô, pè náh tir yó pɪ de pépi tǔ wòkò tyí, pè náh se mó tǔ yo de pé fal fal tǔ yũkɪ mè tyí.

³⁸ Nte káh kɪ me pɪ ñnî me pɪ de Demetriyusi ànê ñ tǔ pímû tyí, tukey tükèné yòhni-á me, tukey tükèpu mó tǔ me. Pè kyɪ n tokɔ tě kǔ pépi tyí kè.

³⁹ Té tyi yísyó tɔ-à kɪ se tǔ me pé tyí wah wah těne, pãh kɪ fě pɔ sé yah yo kwil névyé tuke mɔ sǒle.

‡ 19:35 19.35 - Kwil sébéy wárkí-ò dí nê tyí-á n yo ásô sɔkɔ yò, né-ñgbě ye sò ñne kwil mè sɔkɔ.

40 Páh yékâb nê soko kweyne yò, tir yó ntě se me pé tyí, pé kɪ fě we yo yékâb mē yòle ni? Képah-á, páh kɪ n to n kɔ̃ yò, páh kɪ pɔ n syah n tɔkɔ péle n kɔ̃ dé!§

41 Welo nópi yóntenɔ náh, à névye kɔ̃ pé karkɪ.

20

Pole yúkúnóle Masedonɪ ànê Kresɪ gběnyah soko

1 Té fěkínó mē-á pɔ yĩn mɔ gbí nēne, Pole me Yesu tò sáhpú ye tuke, à sórié mɔ pé soko, té wěkì ni pé tyí, à soko Masedonɪ gběnyah soko.

2 A kéne gběnyah pól kɔ̃ kɔ̃, à sórié yah mɔ kɔ̃ nánáh Yesu yò sěpú soko. Wáh yal nénpó, à soko Kresɪ gběnyah,*

3 à kyɪ nŵóló tǔnó pɪ nénpó. Képah náh, wáh pɔ ñ vi ne, pé de krótókè ñgbě soko, pé yal n yuku Siri gběnyah soko, à kè we noh ne, Nsyifunɔ-á me ñne n plo pèkè yóle. Káh pɪ sě, à kè yah tɔkɔ ne páh kɪ pé syɪ syɔ̃ Masedonɪ gběnyahle.

4 Té nónó-á sò Pole wěkì kómûne, pépi we yò: Sopaterɪ nê-á n wil Bere kwil, té ñ sú yĩn me Pirusile, ñmɔ sò me, à tahlɪ Arisitarkɪ, ànê Sekūdusi tyí, pépi nónó-á n wil Tesaloniki kwil, ànê Kayusile, nê-á n wil Derɪbɪ kwil, ànê

§ 19:40 19.40 - Yòtām nónó-á Wrome tǎnne, pépi tyí ye pè n yo ásò soko ne, páh kɪ n to n kɔ̃, páh kɪ pɔ n syah n tɔkɔ péle n kɔ̃.

* 20:2 20.2 - Kresɪ nê tyí-á n yo yò, ké yĩn ye tò Akayile. Yah n tɛ 19.21.

Tisyikile, ànê Torofimine, pépi nónó-á n wil Asi gběnyah soko, à tahl Timote tyí.

⁵ Pépi me soko ápi yahle, à kyí ále n syíkí Turasí kwil.

⁶ Búrn sê-ńkê syáh syáhnsokontenɔ náh, ápi wɔ mó kyí de krótókè ñgbě yó soko Filipi kwil, à pé nyáh sô. A sèpìn kwâl pí té pyě de á no tnô Turasí kwil. Képah tēne, á tē nēnpó à sèpìn kwārninɔ pí.

Pole-á Yetiki lékó yilki mɔ sô Liyel gbô yô, Turasí kwil

⁷ Yòh wró gbìyìkì gben sòle,† á lésô me tuke mɔ Tě ñgbě yôke yô yinne, té Pole me yáhkìle n yāh tówùle. A kí sò n yal n pí dīndalle Turasí kwil. Kāh pí sê, à Liyel wey yo mo pé tyí, pópó à pɔ nɔ tyah tónó tyí.

⁸ Té á pól sò me tükènmɔnɔle gběntin yô wòkò tǔ-ò soko, té fòtnónó me tũnsàhnóle pípí ké soko.

⁹ Kètēnpìkì yó tɔ sò me ále pè n ye Yetikile. Nmo sò me kō tē fnètír vyāh yô. Dô, doy pɔ mɔ ñ soko. Nte Pole Liyel wey yô-á sò me ko sê, à pɔ dɔ, té tē syi yinyô wòkò tǔ-ò soko, fóó à pɔ syíkí sétáh. Pāh pópó pɔ ne pé à yilki sah, pè à we kúnóle.

¹⁰ Képah tēne, Pole tɔ tiki pɔ, té kɔ à yô ñ gbān soko, té yo pé tyí ne: «Yé káh n ye yé yáh-ńsah tyē; à me min soko.»

† 20:7 20.7 - Yòh wró gbìyìkì gben nê tyí-á yo ásô soko yè, tükù me n sô ne samidi-á, tükù mó me n sô ne dimansyi-á.

11 Képah náh, à n̄ syɪ dɔkɔ yuku nt̄õ, pè kyɪ Tě ñgbě yõke yõ wě tyí, té t̄õ yõ sɔkɔ Liyel wey yónóle, pópó à pɔ nɔ tyah dal gbí tyí, té à pyě sɔkɔ.

12 Képah sɔkɔ, no me Yetiki tẽ sɔkɔ n̄ vile krémkrém n̄ gbô. Yí mè pɪ yíi nɪ déno ñgběne no pól tyí.

Pole w̄lnóle Turasi kwil, à yuku Miletì kwil sɔkɔ

13 Pole s̄ò kè yah tɔkɔ, à sɔkɔ Asɔsi kwil sɔkɔ, gbáhkì yõ. A s̄ò ne ápi pé yah yohnɪ nénpó, á pé twah. Káh pɪ s̄ě, ápi me de krótókè ñgbě sɔkɔ, à mɔ n̄ yahle à kyɪ ñne n sykɪ nénpó, n̄ twah yinne.

14 Wáh pɔ de, á pól de krótókè sɔkɔ, à yõ sɔkɔ à kyɪ yin Mitilenɪ kwil.

15 Képah náh, á t̄õ yõ sɔkɔ. Ké sèp̄in ní-ò s̄òle, á kyɪ yini tẽ gběnyah yó yèsreynɛ pè n ye Kyole, pne yɔ nyó. Ké sèp̄in t̄õ-ò s̄òle, á kyɪ sɔkɔ gběnyah yó gbòpɔ pè n ye Samosele, pne yɔ nyó. Ké sèp̄in n̄yáh-ò s̄òle, á pyě yini tẽ Miletì kwil.

16 Tè Pole s̄ò me sàlnó sɔkɔ ne káh kɪ f̄ě n pɪ n pi, pé ne me Yerusalemɪ kwil P̄antekɔtɪ syáh syah s̄òle. Képah ye à k̄õ à yõ sɔkɔ, à náh syõ Yefesɪ kwille. A s̄ò p̄i ne páh kɪ de nénpó, pé náh we n wil n pi súú Asi gběnyah sɔkɔ.

Pole-á v̄inmɔnɔ n̄ne Yesu yõ s̄ěpú yah t̄am k̄õ Yefesɪ kwil

17 Képah sɔkɔ, Pole tẽ Miletì kwil, té t̄ent̄ò mɔ Yefesɪ kwil Yesu yõ s̄ěpú yah t̄am tyí ne pè pɔ.

18 Páh pɔ yĩni tẽ ñ tnô, à yo pé tyí ne: «À tɔkɔ ñmɔ pɔ sɔ tyí Asi gběnyah sɔkɔ, máh me n pi sɔ gbíme gbí yé wró, yé se kéle n pne té.

19 Mé tò pi Tẽ ñgbě tyí gblɔy tíkínmɔnɔ kègbi sɔkɔ, à yéfi kwe. Té Nsyifunɔ tɔ me vi ní náh gbáhyí náhnáh sɔkɔ, à yèvyährì náhnáhle ní yĩni tẽ.

20 Nte yé se pĩ ne, mé náh tir yó ntẽ wɔbì yéle nê-á kɪ fẽ yé tyí pekɪ n pi té. Mé sò me sé pólle n yo yé tyí, té me yéle n kwɔ tówû tükè-ntàn sɔkɔ ànê yé gbên tɔ sɔkɔ.

21 Mé kè yo kɔ Nsyifunɔ ànê Krekɪ névye tɔ tyí ne, pè pé nnɔ vi mɔ, pè mó sɛ ápi Tẽ ñgbě Yesu yó.

22 Nte núkúnúkú, Liyel Mirki we ní kyĩ mɔ mé n sɔkɔ Yerusalemɪ kwil yò. Mé náh pĩ tir nê tẽ wɔ-á kɪ kyɪ ní yĩni n tẽ n pi nénpó.

23 Máh nê tẽ wɔle n pne, máh de kwil nê sɔkɔ, Liyel Mirki níkěne kéle n wěkɪ ne, wòkònpèkè sɔkɔ dénó ànê yèvyährì-á me ní sykɪ tẽ.

24 Nte sépinó pól sɔkɔ, ní gblɔy min tẽ tyí náh me tah ní tyí pólle. Mé náh me kéle n mɔ n kɔ kwáhtähle. Tir nê tyí-á me tah ní tyí, kèpah ye pi ní tò pínтенɔle; tò nê-á Tẽ ñgbě dahbì ní gbò sɔkɔ ne mé Nìvìnì tirlè n yo n kɔ Liyel pèpɔrɪ tyí sɔkɔ.

25 Nte núkúnúkú, mé pĩ ne máh syɔ yépi nónó pól tyí à Liyel tɔrí tyí yo kɔ, yé náh tɔ ní we n yah n pi.

26-27 Nte mé náh yé wɔbì Liyel dyɔ yíí tir yó ntěne, mé ye sé pól yo sɔkɔ yé tyí. Kèpah ye, mé

kéle n yo n dal n mo yé tyí kweyne ne, yé soko ney nê-à kɪ se tɔ mo pu, ké kɛmũ náh n pi n pi nmo tyíle.

²⁸ Yé yé gblɔy tɛnó ple, yè mó Liyel yípêy‡ tɛnó ple, Liyel Mirki-á yé sah sépi nónó yɔ ne, yé séle n tɛ ple. Sépi ye Yesu yɔ sɛpú tɛnkile, Liyel-á nónó pi n tyíle n pídí tó kwénó gbò yɔ.

²⁹ Mé pĩ ne, nmo sókóntenɔ náh, névyé yísyó-á kɪ po de yé wró gbɛnképèl tyí kɔle, kɪ yényêh pi yípêy soko.

³⁰ Té yépi n̄tɛ soko, névyé túkù kɪ po yuku tyah mìnì welɔle n yo, kɪ Yesu tò sáhpú yɔ yɪkɪ, pè kɔ pè kɪ pé sò tɛ.

³¹ Kãh pi sɛ, yé yé gblɔyne n kyɔmɪ, yè mó yé dyɔ sah ne n kwne ne, máh lésɔ yé kwɔ ye tɔnɔ, ké lékãh ké gb̄intɔ, à v̄n̄m̄ɔnɔle yé nénúkù núkù pól kɔ. Té kèyãhle n̄ yéti n̄tɛ n kwɛ ké tyí soko.

³² Té núkúnúkù, mé yéle n dahbɪ Liyel ànê n pèpɔrɪ wey gbò soko. Tãhkì me nmo soko kɪ fɛ yé kɔ yé kɪ yuku yahle nmo yɔ sɛnó soko, té wãh n̄ vyãhle yé kɔ n̄ pèpɔrɪ nê tyí soko, yé kɪ kè wɛ wɛ tyí ànê nónó pól-á me Liyel tyí yɔ n̄ yɔ sɛnó yinne.

³³ Mé náh pó, ànê sán, ànê flo yah kɔ nn̄i yó n̄tɛ tyí.

³⁴ Yé pól pĩ ne, máh tò pi n̄ gbãnne à yin n̄ gblɔy yinnóle, ànê n̄ kómũ to yinnóle kè.

‡ 20:28 20.28 - Liyel yípêy nónó tyí-á n yo ásò soko yò, Yesu yɔ sɛpú ye pè n ye.

³⁵ Mé kéle yé wěkɪ tyi pól sɔkɔ ne, sě-á névi yĩne à tòle n pi, à kwáhle n we à yám tǎnne n yohni n mɔ, à mó ò dyɔ sah ne n kwne Tě ògbě Yesu wey mē tyíle wǎh nê yo ne íkě, sǎm-á me kǒnó sɔkɔ, à kal wénsyinɔle.»

³⁶ Pole-á welo nópi yo pɔ tyɛ, à kuku yĩn péle wě tyí, pé pól Liyel ni.

³⁷⁻³⁸ Tě Pole sò yo pé tyí ne, pè náh tǒ pé yèpo we n yah n pi pólle. Képah sɔkɔ, pé pól tyah òne n pɔri n tē n pɔ à n wɛkɪ ò tyí, té n gbo yèkwɔri tē tyí. Képah náh, pè kyɪ à tɛkɪ mɔ, fóó krótókè tókó-ńsah sɔkɔ.

21

Pole dókónyukunɔle Yerusalemi kwil

¹ Képah sɔkɔ, áyáh pɔ we yal pé tyí, á de krótókè ògbě yó sɔkɔ, à yǒ sɔkɔ gběnyah yó sɔkɔ pè n ye Kosele, pne yo niyó. Á náh kwɔ dah fí yó òtē sɔkɔ. Ké dǐndalle, á yǒ sɔkɔ gběnyah yó sɔkɔ pè n ye Wrodesule, pne yo niyó. Áyáh wil nénpó, á yuku Patara kwil sɔkɔ.

² Á kyɪ yĩne krótókè ògbě yóle, kè me n yuku Fenisi gběnyah sɔkɔ. Á me de ké sɔkɔ, à sɔkɔ.

³ Á kyɪ syǒ yúkey gběnyah yóle pè n ye Syiprile, pne yo niyó, fóó á ké yǒ òtēne n yah. Nte á me kè mɔ á gběyìnè sòle, té á yah mɔ Siri gběnyahle, à kyɪ tiki ké kwil yó sɔkɔ pè n ye Tirile. Krótókè mē vyó kɪ sò n tiki n mɔ n pi nénpó.

4 Képah soko, áyáh kyɪ Yesu t̃ sáhpú nónó wɛ nénpó, á t̃ péle à sèp̃ìn kwǎrninɔ pɪ. Té kéne sèp̃ìn soko, Yesu t̃ sáhpú kè yo Pole tyí Liyel Mirki gb̃ò ỹò nɛ, à káh doko yuku Yerusalemɪ kwil.*

5 Nte sèp̃ìn kwǎrninɔ nópi-á fyò soko, á t̃ kyɪ ỹò soko á kólólɛ. Áyáh n soko, díbí, ànê syó, ànê w̃ɛnp̃ì pól kyɪ á gbáhkì wilki mɔ kwil náh t̃inne, yóngbalɪ soko. Á pól mɛ á gbètukunɔ di nénpó, à Liyel ni péle w̃ɛ tyí.

6 Képah náh, á wɛkɪ w̃ɛ tyí, té w̃ɛ fin mɔ. Á tékínmɔpu nópi mɛ pé syɪ soko pé t̃inne. Ápi mɛ t̃ de krótókè m̃è soko

7 à yal Tiri kwil soko, pópó à kyɪ de kwil yó soko pè n ye Pitolemayisilɛ. Nénpó soko ye á krótókè soko kóló ỹin mɔ. Á mɛ wil krótókè soko, à kyɪ yah wɛkɪ k̃o Yesu ỹò s̃ɛpú tyí kwil niyó, té gb̃iỹìkì núkú pɪ péle.

8 Ké d̃indalle, á pɔ ỹò soko á kólólɛ, à soko Sesarɪ kwil. Áyáh ỹini t̃ nénpó, á kyɪ twah Filipi tyí, nê-á Nìṽìñ tir yó-òlɛ. Népi kwǎrnimi† nónó-á lésò pè yah wilki Yerusalemɪ soko, à pɪ Yesu t̃ɛnt̃ò névye yòhñinmɔpule, pépi soko ney yó ye s̃ò ñnɛ.

9 Té syónp̃ì népi ñyêh s̃ò mɛ ñ tyí, pè náh díbí tyí p̃i. Kéne syónp̃ì s̃ò Liyel t̃ɛnt̃ònɛnɛ n syi n yo.

10 Képah soko, á mɛ sèp̃ìn yísyó pɪ nénpó. Á mɛ nénpó, té Liyel t̃ɛnt̃ò syinyo-ò yó tɔ wil

* 21:4 21.4 - Yah n te 20.22-24. † 21:8 21.8 - Yah n te 6.5 ; 8.5.

Nsyude gběnyah, à pɔ á wε. Pè ònne n ye Akabusilε.

¹¹ Wǎh pɔ á wε, à Pole kǒ tokɔ, à ò gblǒy gbyêh ànê ò gbàn pukubi kéle, té ne, Liyel Mirki-á yo ne nkě, sǒ-á pé pukubi pé gblǒyne, sěntě-á Nsyifunɔ kɪ n pukubi n pi kǒ mē nētēne Yerusalemɪ kwil, té kɪ ò gbàh de mɔ névye kǒ, nónó náh pi Nsyifunɔle.

¹² Képah tēne, áyáh welo nópi noh sě, à tahl Yesu yǒ sěpú nónó-á sò me Sesarɪ kwil, ápi pól Polele n ni ne, à káh dɔkɔ yuku Yerusalemɪ sokɔ.

¹³ Nte Pole me yo á tyí ne, sǒ se pi, té á n gbo, à n yah n kǒ yèkwɔrɪ mó-ńsahle pé sokɔ ni? Nkě, káh kɪ sǒ yǐn-ńkēne pé púkúbínó ó tyí, té pé ku nētēne Yesu yǐnne Yerusalemɪ sokɔ, páh kè fě syi.

¹⁴ Té áyáh ò sǒnɔ vi mɔ kwlo sě, á yal mɔ ò gbáhntēnɔle, té ne, Liyel dyɔ dyɔ tē ó pi!

¹⁵ Áyáh sèpìn nópi pi pɔ n dal mɔ, á á vi, té wěkì tē, à dɔkɔ yuku Yerusalemɪ sokɔ.

¹⁶ Té Sesarɪ kwil Yesu tò sǎhpú yísyó me á sò tē. Pépi me á tē yuku dí yó tinnε pè n ye Mnasōne. A sò n wil gběnyah yó sokɔ pè n ye Syiprile, pne yo nyó. A sò yǐne à twah òmɔ tyí. Kéne dǐne, Yesu tò sǎh-ò ye sò ònne di mónóle.

Pole kýnyahnɔle Nsyakɪ tyí

¹⁷ Képah sokɔ, áyáh kyɪ yǐni tē Yerusalemɪ kwil, Yesu yǒ sěpú me á tǒ sah tē nìv̀ǹǹ sokɔ.

18 Ké dīndalle, Pole sɔkɔ ále Nsyaku ònnè, òyāh sɔkɔ-á sò Yesu yò sěpú ònkì yah tām tɔ me tükènmònlè pé tòó.

19 Wāh kyì de, à wèkì pé tyí, té Liyel-á à tɔkɔ à tyi nónó pì névyè wró, nónó náh pì Nsyifunólè, à me sé pól yo wah pé tyí pnépné.

20 Páh képah noh sě, pè Liyel gbilki, té me yo Pole tyí nɛ, pé yúnpi Pole, à kó me n yah Nsyifunò nékwínkí sě Yesu yò nì? Nkě, páh me Moyisi tyi kònsàhnó wěkìlè n kɔ n yíí pé pólle dé!

21 Nte à yah, no-á me nêne n yo ò tyí sɔkɔ; páh me n yo nɛ, Nsyifunò nónó pól-á me karkì tě tě kò nékáhbí wró, wāh me péle n kwɔ nɛ nkě, pè pé syì Moyisi tyi kònsàhnó náh. Wāh me n yo pé tyí nɛ, pè káh tǒ pé wěnpìlè n kò, ànê pè káh tǒ Nsyifunò wàlle n kɔ.

22 Té páh kì se mó tǒ ò pónó noh n pi. Núkúnúkú, sǒ se pé kì pì nì?

23 Nkě, páh kì nê yo n pi ò tyí, à képah pì. Díbí nēpì òyēh-á me ásò, nónó-á pé vyāhle Liyel kǒ, té kì ké tyi pì n pi.

24 Nkě, à pè tě sɔkɔ, òmò ànê pépi kyì ké tyi pì pé gblóy tǒ sah Liyel yah, òmò mó yīn pé ywǒ kyénó sárká gbǒnwìlkìlè. Képah sɔkɔ, no pól-á kì pì nɛ, páh tyi nónónɛ n nohnì ò tyí sɔkɔ, gblo náh séle, òmò n̄tě tɔ-á me n kɔ Moyisi tyi kònsàhnó wěkì yò.

25 Nte nónó tě wɔ náh pì Nsyifunólè, té vi mò pì Yesu yò sěpúle, páh nê yah tɔkɔ, páh kè

wǎrki tekí mɔ te pé tyí ne: Pè pé gblǒyne n tẽ sãh fálnó yíle, ànê fòfíkìle, ànê tó kwé-ńkẽ kwáhkókè kòle, ànê tónè.

²⁶ Képah sɔkɔ, dīndalle Pole díbí nópi tẽ pè sɔkɔ wẽ tyí, à kyí pé gblǒy tǒ sah. Képah náh, à de Liyel ní-ńsah gbô sɔkɔ. Té sǒ nê-á pé gblǒy tǒnsàhnó sèpìn kí tũ, té pè kí sárká wilki n pi pé nénúkù núkú pól yīn yǒ, à me ké gbǐyǐkì yo nénpó.

Pole tẽnóle Liyel ní-ńsah gbô sɔkɔ

²⁷ Té sèpìn kwǎrninɔ nópi tyénó sɔkɔ, Nsyifunɔ nónó-á n wil Asi gběnyah sɔkɔ, pè Pole we Liyel ní-ńsah gbô sɔkɔ. Pè me tówù pól kurki mɔ n̄ yǒ, té à tẽ.

²⁸ Pè sǒ me gbo mɔ tũ ne ńkẽ, Yisrayel tǎn, pè pé yohni n mɔ oo! Pè yah dí mènè, òmɔ-á n yo n yíkí pépi Nsyifunɔ tyíle ywǒ ywǒ pól sɔkɔ, ànê tyi kǒnsàhnó tyíle, ànê Liyel ní-ńsah gbô tyíle. A wil képah sɔkɔ, névye nónó náh pi Nsyifunɔle, wáh pè tẽ de Liyel ní-ńsah gbô sɔkɔ. Liyel tyah mè n̄tẽ dèl kó à pi yò n̄?

²⁹ Té Torofimi nê-á n wil Yefesɩ kwil, òmɔ ye lésǒ pè we ànê Polele wẽ tyí kwil n̄yǒ sɔkɔ. Képah ye, pè núkú we ne, Pole-á à tẽ de Liyel ní-ńsah gbô sɔkɔ.

³⁰ Káh pi sě, kwil fěki. Névye me to wil ywǒ ywǒ pólle, à pɔ. Pè me Pole tẽ yɔrɩ wil Liyel ní-ńsah gbô náhle, té núkú ké yey vike.

31 Gbí nê-á sò pè me n yah n kō Pole kònmɔ-ńsahle, Wrome tãn sràsyíbí yòtḗ ñgbě kè we noh ne, Yerusalemı kwil pól-á me fĕkìnóle.

32 Nénpó swɔ, à núkú sràsyíbí ye tuke ànê sràsyíbí yòtãmne, té to sɔko péle tówú mè mé-ńsah sɔko. Té tówú mè-á fyò sràsyíbí yòtḗ ñgbě mè we à n pi ànê sràsyíbíle, pè núkú yal mɔ Pole kònóle.

33 Képah sɔko, sràsyíbí yòtḗ ñgbě me no de Polele, à à tḗ, té ne, pè à pukubi kĕlól pló nínóle. Té piki yah ne, nédúkú nê se ñne, ànê tir nê se à pi nı?

34 Nte tówú mè névye pól yuku yo mɔ tũ wĕ yò pé tyíyónónole sé tyí tyíle. Kãh pi sĕ, sràsyíbí yòtḗ ñgbě mè nãh fĕ tḗ ké yò pĩ. Képah sɔko, à ne sràsyíbí Pole tḗ kyı dah mɔ pé wòkò ñgbě sɔko.

35-36 Pãh kyı yĩni tḗ wòkò ñgbě mè yah, té Pole tyah n dɔko ké súndɔko-ńtã yò, no pól ñ sò tḗ me gbo mɔ tũ ne, pè à ko mɔ oo, pè à ko mɔ! No-á Polele n kah n yĩki n kō sĕ, sràsyíbí kwlo pè à yò sɔko.

Pole-á ñ vyãh kōli sō

37 Té gbí nê-á pè n tyah dénóle wòkò mè sɔko, Pole me yòtḗ ñgbě mè syah ne, pé se ki fĕ tir yó yo ñ tyí nı? Yòtḗ dí ne, è, té wãh Krekı weyne n nohnı kè!

38 Nkĕ, Yesyipti kwil dí nê-á fĕkìnó pi sĕ yò sĕ yò, à tyínyêh pípú népî kèyò nínó (4 000) tḗ sɔko gbĕnnı sɔko, tḗ nãh ñmole kè.

39 Képah sɔkɔ, Pole à syah ne, Nsyifu ney-á péwɔle, pé dúbí-ńsah tótó-á Tarsı kwille, Silisi gběnyah sɔkɔ. Pé dúbí-ńsah kwil m̀e yīn-á me wīlnóle. Nkě, à ǹ gblɔy ye, à mó ye pé kɔ pé yo mɔ no tyí.

40 Sràsyíbí yòtě ñgbě me ké wěkile à kɔ. Képah tēne, Pole yuku yīn súnɔkɔ-ńtàn yò, té ñ gbò pı mɔ no tyí, pè me yīn sūmm. A me tyah n wekı pé tyí Yebre wey‡ sɔkɔ ne nkě:

22

1 «Ñ súbí ànê ní yúnpyé, yé yé gblɔy ye, yè mó noh ní tyí, nê-á mé kı yo kı ní vyāh kòlı n pi yé tyí.»

2 Képah sɔkɔ, pāh Pole we à n wekı pé tyí Yebre wey sɔkɔ sě, tyah tɔ gbah pı sūmm.

3 A me yo pé tyí ne: «Nsyifu ney ye n̄mɔle. Mé dubi Tarsı kwil, Silisi gběnyah sɔkɔ. Nte Yerusalemı kwil m̀e sɔkɔ ye mé kyāh yò. Té Kamalyelı ye sò kwɔ n̄ne. A ní kwɔ yīí á nāh tăn tyi kònsàhnó wālle. Mé sò me gbah tē yīí Liyel yò sēnó sɔkɔ, sɔ-á yéle ké sɔkɔ kweyne yò.

4 Mé Yesu yò sēpú fōh, fóó à pé tókù ko mɔ. Mé pé díbí ànê pé syó tókùle n tē n pukubi n dah n mɔ n pɔ wòkònpèkè sɔkɔ.

5 Sárká syínwilkıpu yòtě ñgbě ànê Nsyifunɔ yèwàhnì pól kı fě pı ní tàrfyòle ké sɔkɔ. Pépi n̄tē tyí ye lésò mé we syi sébéynóle ne mé kyı á no Nsyifunɔ kɔ Daması kwil, mé mó Yesu yò sēpú

‡ 21:40 21.40 - Nsyifunɔ wey ye sò Yebre weyne.

we n tẽ n pukubi nónó-á me nénpó, mé pɔ péle Yerusalemı sɔkɔ, mé pɔ pè fõh.

⁶ Képah sɔkɔ, máh me wěkì yõ, té me de n te Daması kwille, kyòo yó núkú wil yínyõ sɔkɔ gb̃ntõle, à pɔ kwe ní yõ pèrr à ní mɔ gb̃.

⁷ Kǎh pı sě, mé yõ sykı sétáh, té yínpõ yó noh nê-á me n yo ní tyí ne: <Sole, Sole, kwáh nê pı té á nne n fõh sě?>

⁸ Mé me piki yah ne, nê se ñmɔle ni, Tě ñgbě? Kéne yínpõ tõ ké syı yo ní tyí ne: <Nasaretı kwil Yesu ye ñmɔle, nê-á á n fõh.>

⁹ Képah sɔkɔ, máh sò me wěkì yõ ànê nónóne, pépi tɔ sò kyòo mè we; té nê-á n yo n mɔ ní tyí, pè náh tẽ wɔ wey noh.

¹⁰ Mé me piki yah ne, tir nê se mé yĩne mé pı ni, Tě ñgbě? A me yo ní tyí ne: <Yuku n de Daması kwil. Té wáh yĩne ñ tyi nónó pól pı, pè kı sè yo ñ syah.>

¹¹ Nte kyòo mè pikínó sò me ní yí wɔ. Kǎh pı sě, áyáh me wěkì yõ ànê nónóne, pépi me ní gbò sɔkɔ tẽ, à de Daması kwil.

¹² Té dí yó lésõ me nénpó pè n ye Ananiyasile. Kéne dí sò me Liyel wěkì tẽnó ple, me ñ tyi kònsàhnóle n pı sé wǎl yõ. Nsyifunɔ nónó pól-á sò me nénpó, pé pól sò me ñ yíngbíle n yo.

¹³ Nmɔ me pɔ ñmɔ tnô, té yo ní tyí ne: <N yúnpi Sole, fě ne n yah ítõ.> Wǎh yo sě, nénpó swɔ ní yí ykı, mé me à we.

¹⁴ Képah sɔkɔ, à me yo ní tyí ne: <Liyel nê-á á náh tǎn n gbilki, ñmɔ ye ñ yah tɔkɔ ne á pé dyo

yíine n pne, ànê á pé tònpi négbí* we yíne, á mó n vyāh wey noh.

15 Képah ye, wáh tyi nónó we, té tyi nónó noh Liyel tònpi négbí tyí sòkò, á kɪ n pɪ n pi sé yónwàh-òle no pól yí yah.

16 Káh pɪ sɛ, núkúnúkú káh n tǒ n tɛ n mo. Yuku, á yíne wèlnwìlkìnóle ni sòkò, á tyípèl mó yǒ mɔ n kǒ, Tɛ ñgbɛ Yesu yín yéngbonɔ sòkò.»

17 Képah náh, mé ní syɪ sòkò Yerusalemɪ kwil. Té sǒ yóle, máh me nírilɛ n pɪ Liyel ní-ńsah gbô sòkò, Liyel wɛkínó yóle ní wɛkɪ.

18 Mé Tɛ ñgbɛ we à me n yo ní tyí ne níké, Yerusalemɪ kwil tǎn náh ní tyíyónó fɛ n syɪ n pi péwɔ tyí sòkò. Képah-á, mé sal n wil súú Yerusalemɪ kwil sòkò.

19 Nte mé me yo n tyí ne, á no Nsyifunɔ-á kè pǐ yíi ne, máh lésǒ me n kyɪ n pɔ á Liyel ní-ńtǎn vɪ sòkò, à ñmɔ yǒ sɛpúle n tɛ n dah n mɔ n pɔ wòkònpèkè sòkò, té péle n ko yèfòhle;

20 à tahlɪ pǎh n tyí yónwàh-ò Yetyɛnɪ ko mɔ gbí nêne, ñmɔ tɔ-á sǒ me dò. Máh sǒ me mɔ n kònmɔpule, té pɪ pé fwòmò-ñgbnɔ syíkí-òle dò.

21 Képah sòkò, Tɛ ñgbɛ me yo ní tyí ne: «Fíí sòkò ye mé n tekɪ n mɔ ále kwlókáhkí névyɛ tyí. Ne n yuku!»»

22 Tówû sǒ me Pole welɔle n tǒ n sah n nohnɪ, ñte wǎh fyò pɔ welɔ nópi yo ne, kwlókáhkí névyɛ tyí-á Tɛ ñgbɛ n tekɪ n mɔ péle, pè núkú gbo mɔ wòhòh ne, ñsǒntɛ névi-á yíne

* 22:14 22.14 - Liyel tònpi négbí nê tyí-á pè n yo yò, Yesu ye.

kònmòntonòle sètáh yõ. A náh yĩne à tẽ min sòkò.

²³ Pè sò me kah gbo mọ tũ, me pé flòle n de n milki, té me nènghbõne n yilki n mọ.

²⁴ Káh pı sě, sràsyíbí yõtẽ ñgbẽ ne, sràsyíbí Pole tẽ de pé wòkò ñgbẽ sòkò, pé mó à ko yèfõhle. Képah sòkò, tir nê yĩn-á tówú n gbo n mọ ñ yõ sòkò, páh kı ké yõ pĩ.

²⁵ Nte páh Pole pukubi mnòle ne páh ñne n ko gbí nêne, sràsyíbí yõtẽ dí nê-á sò me nénpó, à yo ñmọ tyí ne: «Ké wěkì se me yépi tyí kı fě Wrome tãn gbò mọ yõ ko ñ tükè-ñkě ñtẽne?»

²⁶ Dí-á képah noh sě, à kyı kè yo sràsyíbí yõtẽ ñgbẽ tyí ne, tyítúkù nê se à n tyah pínòle sě nı? Ngbõ Wrome tãn gbò mọ yõ-á dí mènne dé!

²⁷ Képah sòkò, sràsyíbí yõtẽ ñgbẽ pọ Pole piki yah ne, à yo pé syah, Wrome tãn gbò mọ yõ se ñtyínò ñne nı? Pole me ne àwe-á.

²⁸ Pole-á yo sě, dí à syah ne, té pọ ñgbẽ-á péwò tẽ wò wilki, té pı Wrome tãn gbò mọ yõle dé! Pole me ne, ñte péwò tẽ wò-á dubi kéle.

²⁹ Képah tẽne, nónó-á kı sò yĩne pé Pole ko n pi ne à wekı, pé gbe mọ ñne. Té sràsyíbí yõtẽ ñgbẽ-á kè we pĩ ne, Wrome tãn gbò mọ yõ-á Polele, té pé me pé kǒ pé à pukubi, ké tíkí de ñ sòkò.

Pole tẽnkyínòle Nsyifunò tukey tükèpu tĩnkì tyí

³⁰ Képah sòkò, ké dīndalle sràsyíbí yõtẽ ñgbẽ sò me ké tyí ne pé pĩ tótó, tir nê yõ-á Nsyifunò

toko Pole kǒ. Képah tǝne, à pè kǒ pè kyi Pole wah mo, té me tukey tükèpu ùnkǐ névye pól ye tuke, pépi nóno soko-á sárká syínwǐkǐpu yǝtǎmne, té pè kǒ pè Pole tǝ po pé nyó.

23

¹ Képah soko, Pole tyah tukey tükèpu ùnkǐle n yah díkídíkí, té yo pé tyí ne: «Ñ yúnpyé, mé me ní foko dal mo n ko Liyel wǝkǐ yǝ, pópó à po no kwey tyí.»

² Pole-á yo sǝ, nóno-á sǝ me ù tnô, sárká syínwǐkǐpu yǝtǝ ùgbǝ Ananiyasi yo pé tyí ne, pè ù vyǎh mi.

³ Képah soko, Pole me yo ù tyí ne, sékú sǝ wahy nê-á ùne, Liyel-á ki mi ùmole. Wǎh me kǒ tǝ ásô, à péwole n tuke à yǐne tyi kǝnsàhnóle à yo, té mó tǝ me sé délle n pi ne pé mi kè.

⁴ Képah tǝne, nóno-á sǝ me nénpó, pè à syah ne, Liyel sárká syínwǐkǐpu yǝtǝ ùgbǝne à n gbyo lé?

⁵ À me pè syah ne, pé nǎh sǝ me pǐ ne sárká syínwǐkǐpu yǝtǝ ùgbǝ-á ùne ló, pé yúnpyé. Nkǝ, kǎh me wǎrkínsàhnóle ne: «Káh á kwil névye yǝtǝne n gbyo.»

⁶ Képah soko, Pole-á sǝ me kè pǐ sah ne, tukey tükèpu ùnkǐ tóní núkúle Sadusǝ névye-á, té pé tóní mè me Farisiyǝ névyele sǝ, à tyah n kah n weki pé nyó ne: «Ñ yúnpyé, Farisiyǝ névye ye ní dúbípúle, ùmo to me Farisiyǝ neyne. Té ùmo

sõno-á me ké yõ ne, lékyî-á kɪ n yilki n mo n pi, képah yĩn ye ñne tukey soko ásô yò.»

⁷ Pole-á fyò képah yo n te ñsõ, yékâb ñgbě núkú de Farisiyě névyè ànê Sadusě névyè wró, à pé tówû gbekɪ.

⁸ Sadusě névyè wo sò me ne, lékó yílkínmõno náh me, yĩnyõ tònpi yó ñtě náh me, mírkí yó ñtě náh me. Nte Farisiyě névyè wo mó ne, sé pól-á me.

⁹ Kãh pi sě, wãn tõ mo névyè gbónmõno yõ. Képah tẽne, Liyel tyi kònsàhnó kwópú nónó-á sò n wil Farisiyě névyè tĩnkĩ soko, pépi yísyó yuku yahle kèpékèyò ne, pépi náh me tyítúkù yó ñtě pínó we dí mè tyí pólle. Ténkàh mírkí yó, képah náh pi, Liyel yĩnyõ tònpi yó-á kɪ nê yo mo ñ tyí té?

¹⁰ Té yékâb-á po kah pi sòhsòh sě, tíkí me sràsyíbí yõtě ñgbě tẽ ne, pãh kɪ po Pole yoru n kõlɪ n pi. Képah soko, à me yo sràsyíbí tyí ne, pè tiki kyɪ Pole tẽ n yal pé wró, pè yuku ñne pé wòkò ñgbě soko.

¹¹ Ké lékâh-á po mo, Tě ñgbě wil Pole yah, té yo ñ tyí ne: «Sóré mo á gblõy soko. Ngbõ, wáh ñ tyí yo sõ Yerusalemɪ kwil, á yĩne ñ tõ ñ tyí yo sě Wrome kwil to soko dé!»

Nsyifunõ-á yĩnvĩ nê dahbi Pole gbáhkì sò

¹² Képah soko, tyah-á po dal Nsyifunõ yísyó yuku Pole tyí yo syɪ wě tyí, té pé wo Liyelle ne, pé náh tñnì yõ yõ kwâh yó ñtě yõ n pi, ànê pé

náh wɔ wɔ kwâh yó ñtẽ wɔ n pi, Pole kònmo-ńkẽ sɔkɔ.

¹³ Té nónó-á sǒ pɪ yínvĩ mènɛ, pè kah nɛpĩ tikininínɛ.

¹⁴ Képah tẽ sɔkɔ, pè kyɪ wil sárká syínwĩlkĩpu yõtã ànê yèwàhnì tyí, té yo pé tyí nɛ, pépi-á pé wo Liyelle kèpékèyô nɛ, pé náh tǒnì kwâh yó ñtẽ dah n mo n pi pé vyěy sɔkɔ, Pole kònmo-ńkẽ sɔkɔ.

¹⁵ Képah-á, ńkẽ pépi to pé vyěy pɪ núkúle ànê tukey tükèpu ùnkĩle, pè mó kyɪ kè yah kǒ sràsýíbí yõtẽ ñgbẽ tyí nɛ, à Pole tekɪ mo pé kǒ. Nkẽ, pè kè pɪ á kɪ nɛ, pè sǒ mɛ kè tyí nɛ, pé ñ tyi sohlì n yah palle. Nte pépi tẽ wɔ-á kɪ pé vi, kɪ kyɪ à syíkɪ tẽ wěkì yah sɔkɔ, kɪ à wɛ ko mo, ñ yínintẽ-ńkẽ sɔkɔ.

¹⁶ Nte Pole lèpi mɛ yínvĩ mè tyí wɛ noh, té Pole nyáh sǒ sràsýíbí wòkò ñgbẽ sɔkɔ, à kyɪ kè yo à syah.

¹⁷ Képah sɔkɔ, Pole mɛ sràsýíbí yõtẽ yó ye, té yo ñ tyí nɛ, tir yó-á mɛ dípír mè tyí yo yo tẽnɛ sràsýíbí yõtẽ ñgbẽ tyí. Nkẽ, à kyɪ ñnɛ ñ tyí.

¹⁸ Wãh yo sě, dí mɛ kyɪ dípírle, té yo pé yõtẽ tyí nɛ, Pole nê yah-á víkénóle wòkò ñgbẽ sɔkɔ, ñmo-á ye yah péle, té kè yah kǒ pé tyí nɛ, pé pɔ dípír mènɛ ñ tyí. Wãh mɛ kè tyí nɛ, pé tir yó yo à syah.

¹⁹ Képah sɔkɔ, yõtẽ ñgbẽ mɛ dípír gbò sɔkɔ tẽ pè kěkɪ gbòpɔle, té à piki yah nɛ, tir nê se ñ tyí yo yo tẽnɛ nɪ?

20 A me yo n̄ tyí ne, Nsyifunɔ yísyó-á me yo sah núkú yõ ne, páh kɪ pɔ à ni, à Pole tekɪ mɔ pé kɔ́ ns̄õne tukey tükèpu ònkì tyí, á kɪ ne pè s̄õ me ké tyí ne, pé n̄ tyi sohl̄i n yah palle.

21 Té à yah, nép̄i tikinini dòhnò-á me pé vi sah, me Polele n plo pèkè yóle. Páh kè yah tɔkɔ, à pé wo ne, pé náh t̄õn̄i yõ yõ kwáh yó òt̄ẽ yõ n pi, àn̄ê pé náh wɔ wɔ kwáh yó òt̄ẽ wɔ n pi, n̄ kònmɔ-ńk̄ẽ sɔkɔ. Páh kè sah te gbáhkì núkú yõ, té me òmɔ ó f̄ensyino syɪkɪ t̄ẽ. Nte à káh n ye pè à pilki.

22 Képah sɔkɔ, sràsyíbi yòt̄ẽ ògb̄ẽ me dípir fin mɔ, té kè gbah yo n̄ tyí ne, à káh kè yáh òn̄i yó òt̄ẽ tyí ne, páh tyi nópi gbél kye péwɔ tyí dé!

Pole tékínmɔnɔle Sesarɪ kwil

23 Képah sɔkɔ, sràsyíbi yòt̄ẽ ògb̄ẽ me sràsyíbi yòt̄ãm nép̄i ními ye pɔ yo pé tyí ne, pè sràsyíbi nép̄i lègbãm (200) wilki n sah, àn̄ê sèsèn nátãm nép̄i tikit̄óni pó gbãmne, àn̄ê mààm̄al nátãm nép̄i lègbãmne (200). Pè mó pé vi sah Sesarɪ kwil sɔkɔ t̄ẽne ȳep̄n̄i s̄ò.

24 Pè mó t̄õ sèsèn yísyó wilki n sah, sépi pɔ Pole twah yuku gb̄enyah yah t̄ẽ-ò dí Felikisi ònn̄e, dlo yó òt̄ẽ káh à we nɔ.

25 Képah t̄ẽne, té sébéy wárkɪ pè kɔ́ ne, pè kyɪ Felikisi k̄õ, n̄ê sɔkɔ-á à yo ne ńk̄ẽ:

26 «Ñmɔ Klode Lisyasɪ ye n t̄õ sébéy mèn̄e á tyí, gb̄enyah yah t̄ẽ-ò dí pèpey Felikisi. N̄ wey me á tyí.

27 Dí nê-á mé n tekı mo á tyí yò, Nsyifunɔ sò me à tẽ, me n yah n kɔ̀ n kònmo-ńsahle. Nte máh noh ne Wrome tãn gbò mo yò-á ñne, ñmo ànê ní sràsyíbí me kyı à tẽ syı pé tyí.

28 Nte mé sò me ké tyí ne, mé pĩ tir nê yĩn-á pè tɔko à kɔ̀. Képah ye, mé à tẽ kyı pé tukey tükèpu ùnkĩ tyí.

29 Képah sɔko ye mé pĩ ne, pãh me yékãble n pi Polele pé tyi kònsàhnó tyí yò, té képah tyí yò-á pè tɔko à kɔ̀. Té sépi pól sɔko, à náh tir yó ñtẽ pi nê-á yĩne n kònmonɔle, képah náh pi, n dáhnmonɔle wòkònpèkè sɔko.

30 Képah náh, mé pɔ noh ne, pãh me yínvĩ yóle n dahbı n gbáhkì sò. Képah ye, mé núkú ñne n tekı n mo á tyí yò. Té nónó-á sò me tɔko à kɔ̀, mé me yo pé tyí ne, pè kyı ké yah yo áwo tyí.»

31 Képah sɔko, kãh yo sɔ̀ sràsyíbí tyí, pè me kè pi sɛ. Pè kyı Pole tẽ à sɔko ñne lékãhne, fók à kyı de Antipatrisi kwil.

32 Dĩndalle, pè sèsen nátãm kɔ̀ pè yò sɔko ñne, té pé téló me pé syı sɔko pé sràsyíbí wòkò ngbẽ sɔko.

33 Sèsen nátãm nópi-á fyò kyı de Polele Sesarı kwil, pè sébéy mène gběnyah yah tẽ-ò dí kɔ̀, té Polele n gbò dahbı.

34 Gběnyah yah tẽ-ò dí me sébéy mè kar, té Pole piki yah ne, gběnyah nê ney se ñne ni? Wãh noh ne Silisi gběnyah ney-á ñne,

35 à yo n tyí ne, nónó-á tɔko à kɔ̀, pãh kı pɔ

gbí nêne, páh kɪ pyě nóhnó pɪ ò tyí. Té me yo pé tyí ne, pé à tẽ ò yah vike n sah Yerodɪ tǒrí kéte soko.

24

Nsyifunɔ me n yah n kɔ Pole tũkè-nsahle

¹ Té sèpìn kwâl sókóntenɔ náh, sárká syínwìlkɪpu yòtẽ ògbě Ananiyasi tiki pɔ Sesarɪ kwil, ànê yèwàhnì yísyóle, à tahlɪ wey pí-ò ògbě yó tyí, nê-á pé n ye Tertulusile. Pé sò me pɔ Pole ye, gběnyah yah tẽ-ò dí Felikisi tyí.

² Képah soko, pé me Pole ye yah, té Tertulusi me de wey soko, à n toko Polele n kɔ ne níkě, gběnyah yah tẽ-ò pèpɛy, yèvunɪ ògbě nê soko-á péle kweyne yò, òmɔ gbò yò soko-á kè we. Wáh ò gběnyah yah tẽ palle sò, képah-á vɪnmɔnɔ náhnáh dahbɪ ké soko.

³ Wáh n tǒ n sah n pɪ pépi tyí sò gbímegbí tàntàn pól soko, páh n gbah n wekɪ ò tyí képah yinne.

⁴ Té à ò kékwe, à mó ò níkí kwɔ noh pé tyí kwéy. Pé náh pé wey yò ko n pi, kè kɔ kè n pɪ n pi ò tyí gblóvyáhríle.

⁵ Nkě, dí nê-á yò, páh kè kyomɪ we ne, wáh me pɪ tẽ soh soh níyàn tyí kòle. Wáh me Nsyifunɔ yòle n yikɪ kèkòyó pól soko. Òmɔ-á n tẽ névyè yahle, nóno-á n kɔ Nasaretɪ kwil Yesu wěkì yò, nê-á gbɪ náh kéle.

⁶ Wáh sò me n yah n kɔ Liyel ní-nsah gbò dèl òtẽ pí-nsahle, képah-á pé kɔ pé à tẽ. [Páh sò ne

pé à tuke à yĩne pépi Nsyifunɔ tyi kònsàhnó tyi yónóle.

⁷ Nte sràsyíbí yòtḗ òngbḗ Lisyasí-á pɔ à tḗ syi pé tyí gbùgbù,

⁸ té ne: «Nónó-á ne Pole tyípinó náh me ple, pé kyí tɔkɔ à kṵ Felikisi tyí.»] Képah náh, Tertulusi tṵ ne, núkúnúkú òmɔ nṵtḗ Pole piki yah ò gbłɔy, képah sɔkɔ, wǎh kí pĩ ne, tyi nónó yĩn-á pépi pɔ tɔkɔ à kṵ, gbłɔ-á séle.

⁹ Képah tḗne, Nsyifunɔ me dí wey sò so mɔ ne, sḗ-á kè we.

Pole-á ò vyǎh kṵlì sṵ tukey sɔkɔ

¹⁰ Képah náh, gbḗnyah yah tḗ-ò dí me ò gbò pɔ mɔ Pole tyí, à weyne à kṵ. Képah sɔkɔ, Pole me ne: «Mé pĩ ne áwɔ-á ápi no tukey tṵkè-òle ké ye náhnáh-á yò. Képah ye, ní ni me yínnóle kí ní vyǎh kṵlì á yah sɔkɔ.

¹¹ Nmɔ dókónpɔnɔle Yerusalemí sɔkɔ, ne mé pɔ Liyel gbilki, kè náh tṵnì kah sèpìn gbṵninóle. Áwɔ nṵtḗ kí fḗ ké níy tḗ, kí ké gbí pĩ.

¹² Pè náh ní we mé me yékâble n pɔ ònṵ yó nṵtḗne Liyel ní-nsah gbô sɔkɔ, képah náh pɔ Liyel ní-nṵtân vî sɔkɔ, képah náh pɔ kwil fí yó nṵtḗ sɔkɔ. Mé náh se mó tṵ tṵwú kurki mɔ tir yó nṵtḗ sɔkɔ.

¹³ Tḗ pǎh pɔ tɔkɔ òne n kṵ yò, tir nḗ me pé kí fḗ yo nḗ-á n wḗkí ne gbłɔ-á pé tyíyónó nópìle?

¹⁴ Nte nḗ tḗ-á mé kí n yo n pi, képah ye yò, mé me tṵle n pɔ ní náh tǎn Liyel tyí wḗkì mè yṵ, wḗkì nḗ-á pépi ne gbí náh kéle. Nte tyi nónó

pól-á wārki tyi kònsàhnó ànê Liyel tēntò syínyopu sébéynó sòkò, nímò sēnó me sé pól yō.

15 Nmò sōnò-á me Liyel yō nê tyí sòkò, pépi tò sōnò me képah ó yō ne, népéplò ànê nétúkúñì pól lékyî-á kɪ yilki mò.

16 Képah ye, mé me gbah tē ní fòkò dal mò n kò Liyel yah ànê névye yah sòkò gbímegbí, wényo-ńsah kēne.

17 N pónó nê tyí-á mé yo yò, ye náhnáh sókóntenò náh ye mé pò Yerusalemì sòkò, à pò ní kwil névye yohnì mò pòle, té sárkánó wilki Liyel tyí.

18 Képah sòkò ye sò pè pò we ńne Liyel ní-ńsah gbò sòkò, máh ní gblǒy tǒ sah gbí nēne. Tówù náh sò me ńne, ànê gbrǒgbrǒ yó ńtē náh sò me n pɪ.

19 Té Asi gběnyah Nsyifunò yísyó wò sò me. Mâh sò me tir yó pu pɪ pè we, pépi ye náhkì pò ásò, à pò tòkò ní kǒ áwò tyí dò.

20 Képah náh pɪ, Nsyifunò nónó-á ásò yò, pǎh lésò ní tē kyì pé tukey tükèpu tǐnkì tyí, lékàh-à kɪ me we ní tyí, pè kè yo kè!

21 Tyínúkú yó ó ye lésò mé yo gbǎp pé tyí tukey tükèpu yah sòkò ne ńkē, máh sē ké yō ne lékyî-á kɪ n yilki n mò n pɪ, képah yīn-á ńne tukey sòkò kweyne yò dé!»

22 Té kwil yah tē-ò dí Felikisi sò me Tē ñgbě Yesu wēkì dùkù pī yíí. Kǎh pɪ sē, à tukey mè kur mò sah náh tǐn yō, té ne sràsýíbí yòtē ñgbě

Lisyasi-à kɪ pɔ gbí nêne, páh kɪ pé tir mè yah wah.

²³ Té me ne, sràsyíbí yòtḗ dí n̄ syi n kyɪ Pole dah mɔ wòkònpèkè sɔkɔ. A mó ye à kṵ à ne n me n̄ gblɔy yṵ kwéy. A káh n̄ tyí névyè yīni mɔ n̄ pónyòhn̄nm̄ɔle.

Pole Liyel wey yónóle Felikisi ànê Drusili tyí

²⁴ Sèp̄n̄ yísyó sókóntɛnɔ náh, Felikisi pɔ de ànê n̄ kyɪ Drusilile. Té Drusilile, Nsyifu ney ye sò n̄ne. Képah sɔkɔ, Felikisi pè kṵ pè Pole ye yah, à pɔ Yesu Krista yṵ sē dùkù tyíle n yāh n̄ tyí.

²⁵ Nte Pole-á pɔ tyah n yāh gbɪ wěkì kɔ dùkù pèpey tyí yṵ gbí nêne, ànê gblɔy tēnó tyí yṵ, ànê Liyel névyè pɔ n tuke dùkù tyí yṵ, képah sɔkɔ, tíkí Felikisi tē, à me yo Pole tyí ne, núkúnúkú tēne, wāh kɪ fē n yuku, té páh pɔ wró we, páh kɪ tṵ yo mɔ n̄ tyí.

²⁶ Té n̄ sōnɔ sò me ké yṵ tɔle ne, Pole-á kɪ pé kṵ n pi pólè; képah ye, à sò me n̄ne n tṵ n ye fárfár pè yáhkìle n yāh n̄ pɔ n̄ne.

²⁷ Pè ye nínó pɪ képah tē sɔkɔ sē. Képah náh, yòtḗ késán yó pɔ Felikisi swɔ tɔkɔ pè n ye Porsiyusi Fesitusile. Té Felikisi-á sò me ké tyí ne pé Nsyifunɔ dyɔ yī pɪ sē, képah ye à Pole sah wòkònpèkè sɔkɔ.

25

*Pole n̄ gblǒy tyí dahbı Wrome kwíltām yòtĕ
Sesar gbò*

¹ Képah náh, gběnyah yah tĕ-ò Fesitusi* pónó sèp̄n̄ tǒ-ò sòle Sesarı kwil soko, à doko yuku Yerusalemı kwil.

² Képah soko, sárká syínwilkıpu yòtām ànê Nsyifunò né-̀ngbnò kyı n̄ tyí ne nkĕ, Pole-á tyítúkúnı pı.

³ Té tyah n̄ne n gbah n ni ne, à n̄ gblǒy ye pé tyí, à mó Pole kō à pò Yerusalemı kwil, pé n̄ tyi sohlı n yah palle. Nte kègbı tĕ yǒ, yínvı ye sò pé n pı ne, pé à we ko mɔ wĕkì yah.

⁴ Nte Fesitusi me pé syah ne, Pole-á me dahnmonole wòkònpèkè soko Sesarı kwil. Té péwɔ ntĕ tɔ náh tǒ n mo n pi pé syínsoko-̀nsah nénpó.

⁵ Nkĕ, pé yah tām nónó-à kı fĕ n tĕ n pi, pé péwɔ sò tĕ pé tiki yuku Sesarı kwil. Pole-à kı se me tyítúkù yó pı pé we, páh kı kyı nénpó, pé kı n tɔkɔ à kō.

⁶ Képah soko, Fesitusi náh tǒ tĕ mo nénpó à kah sèp̄n̄ kwärtǒnɔ, képah náh pı, gbām yǒ soko, té n̄ syı soko Sesarı kwil. Ké dındalle, à me kō tĕ tukey tükè-̀nsah soko, té tĕntò mɔ ne pè pò Polele.

⁷ Pole-á pò gbı n̄ne, Nsyifunò nónó-á sò wil Yerusalemı kwil, pé pò à mɔ gbı, té tyah lékàhle

* **25:1** 25.1 - Fesitusile, Wrome ney ye n̄ne. Nmɔ ye sò Wrome kwíltām yòtĕ Sesar sah Nsyude gběnyah yah tĕ-òle.

Fesitusi tyí, Sesari kwil.

14 Pè kɪ sò sèpìn yísyó pɪ n pi nénpó. Kǎh pɪ sě, Fesitusi mó núkú Pole tyí we kǒ mɔ yǎh Akripa tyí ne íkě, Felikisi-á dǐ yó dah mɔ sah wòkònpèkè sòkò ásò.

15 Té pǎh pɔ yuku Yerusalemɪ kwil, sárká syínwìlkɪpu yòtǎm ànê Nsyifunɔ yèwǎhni-á me pɔ n tɔkò ònne n kǒ pé tyí, té me kéle n yah n kǒ pé tyí ne, pé à mɔ kǔ kǒ.

16 Nte pǎh kè yo pé tyí ne, kè nǎh n pɪ sě pépi Wrome tǎn wěkì sòkò. Pé nǎh wòkònpèkè sòkò neyne n mɔ kǔne n kǒ, né pé nǎh wěkìle à kǒ, à ò yo yo tě yo névyè yǐ yah, nónó-á tɔkò à kǒ.

17 Képah sòkò, kéne no me pɔ ànê péwɔle ásò sòkò. Péwɔ nǎh sò me ké tyí ne pé tir mè sah mo. Képah-á, ké dǐndal nítēne pé núkú yuku tukey tükè-nsah sòkò, té ne pé pɔ kéne dǐne.

18 Péwɔ tě-á sò me n sǒ ne, névyè nónó-á tɔkò à kǒ, pǎh kɪ pɔ tyítúkúni ògbnɔ duke duke kwǎh n pi ne, sépi-á à pɪ. Nte pǎh pɔ, kè nǎh pɪ sě.

19 Pǎh me pɔ yékâb yísyó óle n pɪ ònne pé yěngbě Liyel wěkì tyí sòkò ànê Yesu yó tyí sòkò nê-á lésò ku, té Pole tǒ me n yo ne, wǎh me min sòkò.

20 Kǎh pɪ sě, péwɔ nǎh sò pǐ, pǎh ne yǐ mè dùkù wah n pi sǒ. Képah sòkò, pé me Pole piki yah ne, à se kɪ kyɪ Yerusalemɪ kwil, ò tukey kyɪ tuke nénpó nɪ?

21 Nte Pole me ne, pǎh me ké tyí ne pé tě ásò, pé tyi yah mó pɔ kyɪ wah Wrome kwíltǎm yòtě

Sesar tyí. Kǎh pɪ sě, pé me ne pè à dah mɔ sah wòkònpèkè sɔkɔ, fóó kè pɔ nɔ ò tékínmɔnɔ tyí Sesar tyí.

²² Képah sɔkɔ, Akripa me yo Fesitusi tyí ne, péwɔ tɔ-á me ké tyí ne dí mè pɔ ò tyi yǎh pé noh. Képah tǎne, Fesitusi me ne òkě, òsò òtě ó sɔkɔ, wǎh kɪ pɔ ò tyi yǎh à kɪ noh.

²³ Dǐndalle, Akripa ànê Berenisi pé mɔ wil yòtòrí flo sɔkɔ, té sràsyíbí yòtǎm òngbɔ ànê kwil né-òngbɔ me pé sò tǎ, pé yuku tukey tükè-òsah wòkò sɔkɔ. Képah sɔkɔ, Fesitusi pé kǔ pè pɔ Polele.

²⁴ Wǎh pɔ, Fesitusi me de wey sɔkɔ té ne, yòtě dí Akripa, òmɔ ànê nónó pól-á me péle ásò sɔkɔ yò, pé pól-á me dí mène n yah kè. Nsyifuno tówù pól-á pɔ wil pé tyí ò tyí sɔkɔ Yerusalemɪ, ànê fóó ásò tɔ sɔkɔ. Pǎh me gbo mɔ tǔ ne, à nǎh yǐne sàhnóle min sɔkɔ pólle.

²⁵ Nte péwɔ tǎ wɔ nǎh tir yó we ò tyípínì sɔkɔ, nê-á yǐne ò kònmɔnɔle. Té wǎh fyò ò gblǒy tyí dahɪ Wrome kwiltǎm yòtě Sesar gbò, képah-á pé ne, pǎh kɪ à tekɪ mɔ à kǔ.

²⁶ Té tir nê tǎ tótó-á pé kɪ wǎrkɪ, kɪ à tekɪ mɔ n pi Wrome kwiltǎm yòtě Sesar tyí, pé nǎh me képah pǐ. Képah-á pé pɔ òne pé tyí ànê òmɔ òtǎ tɔ tyí ò wahle yòtě dí Akripa. Pǎh ne, pǎh kɪ à piki yah te, pé tǎ we tir yó we n wǎrkɪ ò tyí sɔkɔ, pé à tekɪ n mɔ Sesar tyí.

²⁷ Péwɔ tǎ tyí ké yah nǎh, à wòkònpèkè sɔkɔ ney tekɪ mɔ Wrome kwiltǎm yòtě tyí, té à nǎh

mó tǒ tǔ tyi yah we yo tekı mǒ ñ tyí, nónó yĩn-á pè tǒkǒ à kǒ.

26

Pole-á ñ tyípínì yǎh sǒ yòtǔ dí Akripa tyí

¹ Képah sǒkǒ, yòtǔ dí Akripa yo Pole tyí ne, wey-á me ñ tyí, wǎh kı fǔ ñ vyǎh kǒlı. Wǎh yo sǔ, Pole me ñ gbǒ yǒ, té tyah ñ vyǎh kǒlìnóle pé tyí ne ñkǔ,

²⁻³ yòtǔ dí Akripa, ñmǒ-á pépi Nsyifunǒ tyídí pólle n pne ànê tyi nónó yǒ-á pé yékâble n pı. Képah-á, ñivìnì ñgbǔ-á kéle péwǒ tyí kweyne, kı pé vyǎh kǒlı tyi nópi pól sǒkǒ, Nsyifunǒ-á n tǒkǒ péle n kǒ tyi nónó sǒkǒ. Páh ñne n ni, à ñ gblǒy ye, à mó noh pé tyí.

⁴ A tǒkǒ pé kètǔnpǐkǐ gbí òkù tyí, páh sǒ me pé minne n pı òkù nêne pé kwil tǎn wró ànê Yerusalemı sǒkǒ, Nsyifunǒ pól-á képahle n pne.

⁵ Páh péle n pne di mónóle. Páh kı me ké tyí, páh kı fǔ pé kèdùkù yo ñtǔne ne, Farisiyǔ névye tǔnkǐ sǒkǒ ney-á péle, tǔnkǐ nê Liyel wǔkǐ tyí-á kah tah.

⁶ Nte Liyel-á ñ vyǎh tǒkǒ pé nǎh tǎn tyí nê tyí sǒkǒ, péwǒ gbǒ sǎhnó-á me ké yǒ, képah yĩn-á péle tukey sǒkǒ núkúnúkú yò.

⁷ Té pépi yǐkǐnì gbǒninó gbǒ sǎhnó-á me ké yǒ ne, kǎh kı n pı n dal n mǒ n pi, té me gbah tǔ à Liyelle n gbilki ké lékâh, ké gbǐntǔ. Képah yǒ gbǒ sǎhnó yĩn-á Nsyifunǒ tǒkǒ péwǒ kǒ yò, yòtǔ dí Akripa.

⁸ Nte kwâh nê se pi, té ké fěnsyino tǒ kah tah pé no Nsyifuno tyí ne, Liyel-á lékyîle n yilki n mo ni?

⁹ Péwo ntê to-á sǒ me n sǒ ne, páh yĩne pé tyi pól pi, pé Nasareti kwil Yesu yĩn yǒ sěńó yah kǒ.

¹⁰ Sárká syínwìlkĩpu yǒtām-á ké wěkìle pé kǒ te gbí nêne, páh Yesu yǒ sěpú náhnáh tě dah mo wòkònpèkè soko. Té pàh sǒ sǒ péle n ko n mo fyéle, péwo kè fě n syi. Képah-á pé pi Yerusalemi kwil.

¹¹ Páh sǒ me n de n kǒ pépi Nsyifuno Liyel ní-ńtân vì soko, à Yesu yǒ sěpúle n tě n fǒh, té me ké tyí ne pé pè kyĩ mo, pé Yesu yǒ sěńó yal mo. Té pé foko vyáhnkàhnmono tě tyí péle, páh ńkěne pé nyáh sǒ ò kyi péle n fǒh kwíókáhkino to soko.

¹² Sě-á sǒ yóle, sárká syínwìlkĩpu yǒtām me tēnweno ànê wěkìle pé kǒ, pé yuku à n yuku Damasi kwil.

¹³ Nkě, yǒtě dí Akripa, páh sǒ me wěkì yǒ gbìntǒ pǒle, té me kyòo yó we kè wil yĩnyǒ, nê-á piki kal gbĩne, à po kwe péwo ànê pé wěkì kómú yǒ perr, à pé mo gbĩ.

¹⁴ Képah tēne, pé pól syukuli sétáh té péwo me yĩnpǒ yó noh kè me n yo pé tyí Yebre wey soko ne ńkě: «Sole, Sole, kwâh nê pi té á ńne n fǒh sě? Ngbǒ gbò nê-à yahle náh vĩńóle, képah ye n kwǒ dé!»

¹⁵ Káh pi sě, pé me piki yah ne, nê se ñmole ni, Tě ñgbě? A me yo pé tyí ne: «Yesu ye ñmole, nê-á á n fǒh.

16 Nte yuku n yĩn á gbyêh yõ. Máh ní gblöyne ñ wêkɪ tir nê yĩnne, képah we yò: Mé ne á pi ní tònpule. Sõ-á á we ñne yò, á kɪ kéle n yah n yo n kõ, à tahlɪ tyi nónó tɔ-á mé kɪ pɔ ñ wêkɪ n pi náhle.

17 Mé kɪ ñ pwah mɔ wilki Nsyifunɔ ànê kwlókáhkínɔ névye gbõ, pépi nónó tyí-á mé n tekɪ n mɔ ále.

18 Mé ále n tekɪ n mɔ pé tyí ne, á kyɪ pé yí yɪkɪ, pè kõ pè wil fěntú sɔkɔ pè pɔ kyòo yah. Pè mó wil sétàn yòtě yõri sɔkɔ pè pɔ Liyel tyí, pé tyípêl kõ sè yõ mɔ pè kõ, pè mó kyɪ tẽ-nsah we Liyel wěnpì wró, nónó-á me Liyel tyí yõ ñmɔ yõ sěno yĩnne.»

19 Pole-á Tě ñgbě Yesu welɔ nópi yo te, à ñ syɪ yo Akripa tyí ne ñkě, yòtě dí, páh tyi nónó noh, té tyi nónó we wěkínó mē sɔkɔ nê-á n wil Liyel tyí, pé náh yahle sé pínóle.

20 Té Damasɪ tãn ñgbò tyí-á pé yo séle. Képah náh, pé me sè yo Yerusalemɪ tãn tyí, ànê Nsyude gběnyah tãn pólle, à tahlɪ kwlo kwlo téló tyí. Páh kè yo pé pól tyí ne, pè pé nno vi mɔ, pè mó Liyel wêkì tẽ. Nkě, pè tyípeplɔle n pi, nónó-á n wêkɪ ne gbɪ yõ, pé nno-á vi mɔ.

21 Té képah yõ sɔkɔ-á Nsyifunɔ tẽ péle, gbí nê-á sò pé me Liyel ní-nsah gbô sɔkɔ. Páh sò me n yah n kõ pé kònmɔ-nsahle.

22 Nte Liyel yòhnìnmonɔ gbõ yõ, páh me min sɔkɔ à pɔ syɪ kwey tyí. Té páh tã ásò sɔkɔ yò, gblo yo yĩnne tahlɪ ànê yãm tãn tyí. Liyel tẽntò

syínyopu ànê Moyisi-á tyi nónó tyí yo ne, sãh kɪ pɔ n pɪ n pi, pé nãh tir yó ntě yo kah mɔ sépi yõ, sépi nónó-á yo ne nkě:

²³ Liyel ney yáhntokɔnɔ-á kɪ yèvyãhrɪ pɪ kɪ ku. Té ñmɔ-á kɪ n pɪ n pi négbenne, kɪ yilki mɔ lékyî sɔkɔ. Wãh kɪ pɔ pwáhnɔnɔ tyí yo wah kyoo pépi Nsyifunɔ tyí ànê nénye tɛ́lɔ́ tyí.

²⁴ Té Pole-á me ñ tyi yah yónó sɔkɔ sě me ñ vyãhle n kõli, Fesitusi wekɪ páhpáh ñ yõ ne nkě, ñ yõgbèkè nãh me, ñ kãrn pínó kèpékè-á ñ yõgbèkè yuku.

²⁵ Nte Pole me yo ñ tyí ne nkě, yõtě pèpɛy, pé yõgbèkè nãh yuku dé! Gblɔ ànê yèsrey welɔ ó kókó-á pé n wekɪ.

²⁶ Nkě, tyi nópi sɔkɔ yó ntě nãh pɪ sèfɪn sò sɔkɔ, pé sɛ́nó-á me ké yõ ne, yõtě dí Akripa ntě pínó-á me sé sɔkɔ dò. Kèpah-á, pé kõ pé kéle n yo n dal n mɔ ñ yah sɔkɔ nìsãhle.

²⁷ Nte yõtě dí Akripa, à kó sě Liyel tɛ́ntò syínyopu welɔ yõ nɪ? Péwɔ tẽ-á pĩ ne wãh sě sé yõ.

²⁸ Kèpah sɔkɔ, Akripa me yo Pole tyí ne, kãh nãh kɪ ne pé mo kwéy, wãh nãhkɪ núkú péwɔ vi mɔ pɪ Yesu yõ sě-òle.*

²⁹ Pole me yo ñ tyí ne, kãh kɪ se pɪ núkúnúkú ò, kãh kɪ se mo ò, péwɔ tẽ-á me Liyelle n ni ne, kè káh yĩn ñmɔ ntě ó tyí, nkě nónó pól tɔ-á me pé welɔle n nohnɪ kweyne yò, pé pól pɪ péwɔ

* **26:28** 26.28 - Wró mè sɔkɔ, nénye sɔnɔ me sé tyí tyíle. Túkù sɔnɔ sɔkɔ, kó ye Akripa Polele n ko. Túkù sɔnɔ sɔkɔ mó, Pole wey ñ nɪ tẽ.

tyí kôle, Yesu yô sěpúle, té kârn wô káh mō pépi tyí.

³⁰ Képah nâh, yôťě dí Akripa yuku, ànê gběnyah yah tě-ò dí Fesitusile, ànê Berenisile, à tahl nónó pól-á sò me kōntěńóle péle.

³¹ Nte pãh wil, pè tyah n yo wě tyí ne, dí mē nâh tir yó ntě pi, nê-á yĩne ñ kōnmōnole, képah nâh pi, ñ dáhnmōnole wòkōnpèkè soko.

³² Képah soko, Akripa me yo Fesitusi tyí ne, dí mē à sò me ñ tukey tyí dáhbí-ńkēne Wrome kwiltām yôťě Sesar gbò soko, wãh yĩne fĩnmōnole.

27

Fesitusi ne pè soko Polele Wrome kwil

¹ Képah soko, kãh pō sah núkú yô ne, áyáh kú yuku n pi Wrome kwiltām yôťě ñgbě Sesar tyí Yitalı gběnyah soko, pè me Pole ànê wòkōnpèkè soko névye yısyó dahbı sràsyıbí yôťě yó gbò, ne à soko ále. Dí mē yĩn ye sò Nsyulyusile. Nmō ye sò Wrome tãn sràsyıbí tĩnkı yó yôťěne nê-á pè n ye Wokustile.

² Képah tēne, á de Adramiti kwil krótókè ñgbě yó soko, à soko. Krótókè mē kú sò n syō n pi Asi gběnyah krótónè yĩn-ńtãn soko. Arisitarkı sò me ále, nê-á n wil Masedonı gběnyah kwil yó soko pè n ye Tesalonikile.

³ Ké dındalle, á kyı de Sidō kwil. Nte Nsyulyusi sò me Pole tēńó ple. Kãh pi sě, à

wě̀kìlè Pole kǒ nɛ, à kyɪ yah n kódíbí tyí, pè kǒ pè à wɛ n yohɪ n mɔ.

⁴ Képah náh, áyáh yal nénpó, yáhkí sǒ mɛ ále n fwo. Kǎh pɪ sě, á syǒ gběnyah yó gbòpɔ pè n ye Syiprile, pne yɔ nɪyó. Képah sǒ mɛ yáhkí yah kǒ sah á tyí kwéy.

⁵ Té yǒ sɔkɔ pne yɔ sɔkɔ, à syǒ Silisi gběnyah ànê Pánfili gběnyah gbòpɔ, à kyɪ tiki Mira kwil, Lisi gběnyah sɔkɔ.

⁶ Áyáh mɛ nénpó, Wrome tǎn sràsyíbí yǒtě mɛ Alekisādri kwil krótókè ñgbě yó wɛ, nê-á kɪ sǒ n yuku n pi Yitalı* gběnyah sɔkɔ. A mɛ á dah mɔ képah sɔkɔ.

⁷ Á sèp̃n náhnáh pɪ, té á náh sǒ mɛ fě n to súú. Á yèvyǎhrɪ kah pɪ, té pyě yīni tě Knidi kwil dé-ńsahle yúkey. Nte yáhkí-á sǒ mɛ ále n fwo nénpó t̃n yúkúnóle sě, gběnyah nê-á pè n ye Kretile pne yɔ nɪyó, á syǒ képah dónmɔ-ńsah yó gbòpɔ pè n ye Salmonenɛ. Nénpó sǒ mɛ yáhkí yah kǒ sah á tyí kwéy.

⁸ Á yèvyǎhrɪ pɪ nénpó sókó-ńsah sɔkɔ, à kyɪ yīni tě Kretɪ fí yó sɔkɔ pè n ye Krótónè yín-ńsah pèpɛyɛ. Lasɪ kwil mɛ nénpó tnô.

⁹ Légbíne, wró náhnáh sǒ mɛ sɔkɔ tɛ. Té Nsyifuno filsǎhkí sǒ níkí tě gbí-á sǒ mɛ sɔkɔ tɛ sě, yáhkí sǒ mɛ kǒ. Kǎh pɪ sě, krótókè tónó sǒ mɛ pɪ dlolɛ. Képah ye, Pole mɛ ké gbáhdyáh di pé tyí nɛ,

* 27:6 27.6 - Yitalı gběnyah sɔkɔ ye Wrome kwille.

10 pé kódíbí, péwɔ-á kè wɛ tɛ nɛ, krótókè tónó náh tǒ fě n yǒ n sɔkɔ n pi, né dlo náh wɛ ké sɔkɔ. Té kè náh n yǐn n pi krótókè ànê ké sɔkɔ vyó yíkínó kápékè ó tyí dé, pépi tɔ min-á kɪ n syah n wũ ké sɔkɔ.

11 Nte sràsyíbi yǒtě dí sǒ me sě krótókè tó-ò dí ànê ké yǒtě wɛy yǒ sɔkɔ, à kal Pole tyíle.

12 Té Kretɪ gběnyah krótónè yǐn-ńsah mè náh sǒ me ple kwòvurɪ gbíne. Képah ye, névyè kan sǒ me ké tyí nɛ, kàh kɪ fě n pɪ n pi, pé yǐni tě ké krótónè yǐn-ńsah yó sɔkɔ pè n ye Fenikisile, pé kyɪ kwòvurɪ gbí pɪ nénpó. Nénpó sǒ me Kretɪ gbìyiki ònnɛ.

Yáhpékè yó kǒnólɛ pne yɔ sɔkɔ

13 Képah sɔkɔ, yáhkí yó tyah n kǒ n wil fálfál yɔ nyó ònnɛ. Képah těne, pè sǒ me n sǒ nɛ páh nê yah tɔkɔ, kàh kɪ fě pɪ, té me krótókè yǐn mɔ mɔ vyóngbílki dɔkɔ mɔ, krótókè kǒ kè tyah n sɔkɔ, à kyɪ tɔrɪ sɔkɔ Kretɪ gběnyah gbòpɔle.

14 Dǒ kwéy, yáhpékè yó kǒ wil ymɔ yǒ à tiki pɔ mɪ á sɔkɔ. Yáhkí mè yǐn ye sǒ Yerakilõne.

15 Kè pɔ á krótókè tɔkɔ n yuku gběntěnáhle, á náh tě wɛ ké yah kǒ. Á me á gblǒy fin mɔ kè kǒ.

16 Kè kyɪ sɔkɔ ále gběnyahpír yó tnô pè n ye Kodale, pne yɔ nyó. Kéne gběnyah sǒ me yáhkí yah kǒ sah á tyí kwéy. Kàh pɪ sě, krótópír nê-á sǒ me tóhnmònsàhnólɛ krótókè ògbě tyí, á gbah tě, à kápah wɛ yɔrɪ dah mɔ ké sɔkɔ yèvyáhrule.

17 Ké dahnmontenò náh, á m̀nole krótókè ñgbě pukubi kore vi ne kè káh kwokì. Té tíkí-á sò me á tẽ ne á káh kyì n nir Libi gběnyah sèmìyáhrí sòkò sě, képah ye á krótókè yõtah flo kũ, sépi nónó gbò yõ-á ñkěne yáhkí kéle n tu n m̀o súú, té me á gblõy fin m̀o yáhkí kò kè n yuku ále.

18 Dĩndalle, yáhkí sò me yõ sòkò ále n kah fwo sě, káh pi sě, pè krótókè tókóbí wilki min dah m̀o pne yo sòkò.

19 Sèpìn t̃-ò sòle, krótókè tópú t̃o me ké t̃onpìnyó tókù wilki ké sòkò, à min dah m̀o pne yo sòkò pé gblõy.

20 Kè sò me pi sèpìn náhnáhle, té á náh gbĩ we yah yĩne, képah náh pi, ñwõ kèpyele. Yáhkí sò me peke tẽ sě, fókó á náh t̃o me p̃o n s̃o ne, áyáh kí pwah.

21 Káh pi sě, á sò me sèpìn náhnáh pi yõke yó-ñkěne. Képah sòkò, Pole me yuku yĩn no pól niyó, té ne ñkě, pé kódíbí, páh sò yĩne pè sah péwò yóre yõ, pé mó wũ Kretì gběnyah. Képah-à sò me pi, páh dlo nónó gbal, ànê yíkínó nónó-á pi pé tyí yò, sè náh náhkí pé yĩni n tẽ n pi dò!

22 Nte núkúnúkú, páh kéle n yah n kò pé tyí ne, pè pé ni syáh, ñkě ñnî yó ntê yõ náh yĩ n pi à wil krótókè tyí sòkò.

23 Nkě, Liyel nê tyí yõ-á péwòle pé t̃òle n pi ñ tyí, ñm̀o yĩnyõ t̃onpi yó-á wil pé yah lékâh m̀e

sokɔ,

²⁴ té yo pé tyí nɛ: «Káh tíkí pɪ, Pole! Á kɪ n yĩn n pi Wrome kwiltãm yòtẽ Sesar yah sokɔ, kɪ á yótyí yo ò tyí. Té névye nónó pól-á me n yuku ále krótókè sokɔ, áwɔ gbò yõ, pé sokɔ yó rítẽ yõ náh n yĩ n pi.»

²⁵ Képah-á, péwɔ Pole sɛnó-á me Liyel yõ nɛ, káh kɪ n pɪ n pi sɔ-á ò yĩnyõ tònpi yo kéle pé tyí. Képah-á, pé pé nɪ syáh pé kódíbí.

²⁶ Nte krótókè tẽ wɔ-á kɪ kyɪ n yɪkɪ n pi pé tyí yo niyó kwil yó sokɔ dé!

²⁷ Légbíne, yáhkí sò me yõ sokɔ ále n fwo n yuku sɛ pne yo yõ, nê-á pé n ye Mediteranɛ, fók à pɔ syɪ ké sèpìn gbõnyáh-ò sò lékáh tyí. Té léni mónó wró sokɔ, krótókè tópú sò kè sò nɛ, áyáh me de n te kènkwañ yõle,

²⁸ té yónfí sãh sãh kwãh min dah mɔ yo sokɔ, té kè we ké súkúlínó me métérnó yõgbãm pó kwãrninɔle. Ayáh yuku yahle kwéy, pé tã kè min dah mɔ, té kè we ké súkúlínó me métérnó túkúrí pó kwãrtõnɔle.

²⁹ Pè sò me tíkile n pɪ nɛ, krótókè káh pɔ kyɪ syɪ dyêh yísyó tyí, kè yɪkɪ. Képah ye, pé krótókè yĩn mɔ mɔ vyóngbìl òyêh dah mɔ krótókè náh tĩnne, té me tyah dálno óle n deki.

³⁰ Nte krótókè tópú sò me n yah n kã tó-nsahle. Káh pɪ sɛ, pé krótópír tiki mɔ yo yõ, té nɛ páh nɛ pé krótókè yĩn mɔ mɔ vyóngbìl dah mɔ krótókè yah tĩnne.

31 Képah sɔkɔ, Pole me yo sràsyíbí ànê pé yòt̃ ðí tyí ne níkě, díbí nópi-à kí wú-níkěne krótókè sɔkɔ, pépi náh t̃e we n pwah n pi dé!

32 Képah sɔkɔ, mɔ nónó-á sò t̃e sah krótópírle, sràsyíbí núkú sépi kòlì mɔ kè kò kè sɔkɔ.

33 Képah náh, tyah-á pópó n dal, Pole kè yah kò no pól tyí ne níkě, pé yòke yò. A ne níkě, ké sèpìn gbõnyáh-ò-á kweyne yò, pé yáh-ńsah me tye t̃e pópó, pé náh me f̃e yòkele n yò.

34 Nte yòke vyáh-á mó t̃e me pé min pwáhnó tyí sɔkɔ. Képah-á, páh kéle n yah n kò pé tyí ne, pé yòke yò. Nkě, pé sɔkɔ ney yó ní t̃e yòyén pò núkú fyé náh n mɔ n pu n pi.

35 Képah yóntenɔ náh, Pole búrn tɔkɔ, té wekì Liyel tyí no pól yí yah, té kè kwɔ à tyah n tah.

36 Képah sɔkɔ, no pól ni sū, pé tɔ me yòke yò.

37 Névyè nónó-á sò me krótókè mè sɔkɔ, á pól sò me népì lègbām tikit̃nì pò gbām pò kénúkòle (276).

38 Á pól-á yò t̃e gbí nêne, á sèmukɔ wilki min dah mɔ yo sɔkɔ krótókè kò kè pí fáhfáh.

Krótókè tyí yíkínóle pne yo sɔkɔ

39 Képah t̃ene, tyah-á pɔ dal krótókè tópú náh sò me kènkwhàn yò yah p̃. Páh pɔ yo kéngbárkì yó kyɔmì we, nénpó me wényín-ńsahle, pé ne páh kí yuku yah nénpó krótókèle, kàh kí f̃e n pi n pi.

40 Képah sɔkɔ, pé krótókè yìn mɔ mɔ vyóngbìl de mɔ sè kò sè w̃ pne yo sɔkɔ. Té núkú yò sɔkɔ

krótókè yah tẽ tẽ yî to wah mɔ, ké yah tẽ yînnɛ.
Té me fwɔ toh yînyõ, krótókè yah tînnɛ, yáhkí
kõ kè kéle n tu n mɔ, té pé yah mɔ à yɔ
kén gbárkì mènɛ n yîki.

⁴¹ Nte pé kyɪ yîni tẽ yóntáh sèm yáhrí fî yó
tyí, à nir ké sɔkɔ. Krótókè yah tînn sò me kyɪ di
sèm yáhrí sɔkɔ, fóó kè náh me fẽ n yike, té
níkwíl me ké náh tînnɛ n mɪ n kwɔki n pɔ.

⁴² Képah sɔkɔ, sràsyíbí sò me n yah n kõ
wòkònpèkè sɔkɔ névyɛ kòn mɔ-ńsahle. Tíkí sò
me pé tẽ nɛ, pé káh pɔ n yõ n wil n to n pwah.

⁴³ Nte sràsyíbí yòtẽ dí-á sò me ké tyí nɛ, pé
Pole pwah mɔ sɛ, à pé yîni mɔ képah pínóle. Té
nɛ, yɔ yõnpnèpu ñgbò yɔkɔ de yɔ sɔkɔ, pé
kènkwhàh yõle n yîki.

⁴⁴ Té me nɛ, no téló sésárnɔ tɔkɔ, képah náh
pɪ, krótókè kwókínóle, pé dɔkɔ sépi yõ, pé nɛ n
yõ n yuku. Sɛ ye kè pɪ, té no pól yîni tẽ
kènkwhàh yõ sɔkɔ krómkróm pé vyele.

28

*Pole-á nê pɪ gběnyah yó sɔkɔ pé n ye Maltile,
pne yɔ niyó*

¹ Képah sɔkɔ, áyáh pwah sɛ, á kè noh nɛ pne
yɔ niyó gběnyah mè yîn-á Maltile.

² Kéne kwil tãn me á tõ sah tẽ yîi palle. Té
pù-á sò me n pɪ, té vɪrɪ me n pɪ sɛ, pé me nyàh
mɔ tíí á pól kõ á me tuke mɔ tẽ n wne.

³ Képah soko, Pole-á kyɪ lésópì kwel ne pé po mo nyàh soko, nyàh swò-á kyɪ sé tyí, wáhnpo yó wil sé soko à Pole kò, fóó à toh mo ò gbò tyí.

⁴ Kwil mè tân-á wahy we tóhnmònɔle ò gbò tyí sɛ, pè tyah n yo wɛ tyí ne, tòtò nàh me ké soko pólle, dí mè-á nékókè mo yah. Wáh sénsò pwah pne yo gbò soko ó, òte pépi sétò nê-á gbɛle n wah, képah tɛ wo nàh à sah n pi min soko dé!

⁵ Képah soko, Pole wahy mè mir dah mo nyàh soko. Té syéhéh kwéy nɛ nàh kyɪ Pole wil tyí.

⁶ Té kwil tân sò me syíkíntɛnóle n pi ne, dó páh kɪ à we à kɪ me tyah n sɛ, képah nàh pi, kɪ syɪkɪ n ku n pi nɛnpó swo. Nte páh képah syɪkɪ tɛ wrétété, pè po pɛ ne, pèkè yó nɛ nàh à no n pi. Káh pi sɛ, pè pé vyɛy vi à tyah n yo ne, tò yó-á òne.

⁷ Té nyāh soko-á sò ále, fí yó sò me nɛnpó tnô, nê-á pne yo nɪyó gbɛnyah mè yòtɛ dí tyíle. Kéne dí yīn ye sò Publiyusile. Nmò me á tɔ sah tɛ palle ò kódíbí sɔ, té á kɔ á twah ò tyí à sèpìn tɔnì pi.

⁸ Té kéne dí sú sò me yam pèkì yó. N wil sò me vyāh, té ò foko to me kye. Képah tɛne, Pole me kyɪ yah ò tyí, té ò gbàn sah ò yó à Liyel ni ò tyí, à à de mo.

⁹ Képah nàh, kéne kwil yámpú téló to me po Pole tyí, té po dénmono we.

¹⁰ Káh pi sɛ, á yó yó nɛnpó soko kègbɛle. Té áyáh po n tyah sókónóle, yí nónó yétò-á sò me á

tě, pè sé pólle á kō.

Pole yínîntēnole Wrome kwil

¹¹ Képah náh, n'wóló tónó sókónteno sókó, á me de sókó Alekisādri kwil krótókè ngbē yó sókó, nê yīn-á kènìnìne. Képah sò me kwòvuri gbí tyénó syukú tě Maltı gběnyah sókó.

¹² Áyáh kyı yīni tě Sirakusi kwil, á tě nénpó à sèpìn tōnì pı.

¹³ Áyáh yal nénpó, à tyah n tōrı n yuku krótókèle yo vyāh tyí, pópó à kyı de Wregbyo kwil. Ké dīndalle, yáhkí kō wil á náh tinnē à pō. Kāh pı sē, sèpìn nínì wró, á yīni tě Pusolı kwil, té wil krótókè sókó.

¹⁴ Áyáh kyı nénpó, á kyı Yesu yō sēpú yısyó we. Pépi me á ni, á kō á wū à sèpìn kwārnino pı pé tyí. Képah náh, á sókó Wrome kwil.

¹⁵ Té Wrome kwil Yesu yō sēpú-á fyò á pìnó noh, pé tókù pō á yohnı, fóó Apyusi yòhntàhkì sókó; pé tókù mó pō á yohnı fı yó sókó pè n ye Népan twáh-ńtān tōnìne. Pole-á fyò pè we sē, à wekı Liyel tyí, ànê ñ nı sū.

¹⁶ Képah těne, áyáh yīni tě Wrome kwil, pè ké wēkìle Pole kō à kyı tě ñ tyí wòkò sókó, té sràsyí yó kō à ñne n kyòmı.

Pole Liyel wey yónóle Wrome kwil

¹⁷ Képah sókó, sèpìn tōnì-á sókó, Pole Nsyifunó yah tām ye ñ tinnē. Pāh pō tuke mō, à yo pé tyí ne, pé no, pé náh sénsō tir yó nítē pı de pé no Nsyifunó tyí, pé náh pé náh tān wāl dēl

pi, òtè pé pé tẽ Yerusalemı soko, té pé dahbi Wrome tân gbò soko.

18 Nte Wrome tân-á pé piki yah te gbí nêne, pé náh pé tyípínì yó òtẽ we, nê yĩn-á pé yĩne pé ko mo. Kãh pi sã, pé me ne páh péle n fin n mo.

19 Té Nsyifunò me képah yahle. Képah-á, pé gbò yíí náh, pé me pé gblõy tyí dahbi Wrome kwiltãm yòtẽ Sesar gbò. Nkẽ, tókónkõno tẽ wo náh pé ne pé toko pé no Nsyifunò kò dé!

20 Képah yĩn-á pé kò pé kè yah kò ne, pé pé we, pé mó yáhkì yãh péle. Yisrayel tân gbò sàhnó-á me pwáhnmo-ò nê yõ, òmo yĩn-á kárn nópile mónóle péwo gbãn soko yò.

21 Képah soko, pé me yo Pole tyí ne, sébéy yó òtẽ náh wil Nsyude gběnyah, à pò pépi tyí òmo Pole tyí soko. Pé no Nsyifunò soko yó òtẽ náh mó tã wil énpó, à pò tir yó yo pé tyí ò tyí soko, képah náh pi, à ò yípo yo pépi tyí.

22 Nte pépi-á pĩ ne, wěkì nê soko-á òne, páh me kéle n fwo ywõ ywõ pól soko. Képah-á, òmo sòno-á nêne, páh me ké tyí ne pé kè noh ò vyãh soko.

23 Képah tẽne, pé me wě wénó yòh mo wě tyí Polele.

Lésõ-á pò no, wãn tã mo pé wílnó yõ, à pò Pole tyí ò twáhntẽ-òsah soko. A me tyah à Liyel tórí tyíle n yo n wah pé tyí, à toko séngbõ tyí, pópó à pò no òví tyí. A sò me de Moyisi tyi kònsàhnó ànê Liyel tẽntò syínyopu welo soko, à Yesu tyíle n yo pé tyí ne, pé kè fẽ syi.

24 Képah sɔkɔ, tókù ò tyi yónó fě syi, òtè tókù mó sè yahle.

25 Ntɛ pǎh tẽ wɛkɪ sah kwɔ núkú yõ, té n karkɪ gbí nêne, Pole tõ tyínúkú yó yo pé tyí ne, gbɪ-á Liyel Mirki wey mènɛ, nê-á lésõ Liyel tẽntõ syinyo-ò Yesayi yo pé náh tǎn tyí ne nkẽ:

26-27 «Kùkùtǎhkì me de no nópi nno sɔkɔ.

Pè me pé níkíló tah tũ,

té pé yí vike sah;

ne nkẽ pé yí káh kwâh yó ntẽ we,

pé níkíló káh tir yó ntẽ noh,

pé nno kõ sè pɔ n ye kùkùtǎhkì pínóle,

pé mó vi mɔ nímɔ Liyel wěkì tẽ,

í kõ mé pè we pwah mɔ.

Képah ye, kyɪ n yo pé tyí ne,

pǎh kɪ n nohn tẽ wɔle, té pè náh ké tyí yah we
n pi.

Pǎh kɪ n yah dyěh sě yò, té pè náh kwâh yó ntẽ
we n pi.»*

28 Képah yóntɛnɔ náh, Pole tõ yõ sɔkɔ yo pé tyí ne: «Yé pĩ ne, Liyel-á pwáhnmmɔnɔ wey tekɪ mɔ névyɛ tɔ tyí, nóno náh pɪ Nsyifunɔle. Pépi tẽ wɔ kɪ kè noh n pi.» [

29 Wǎh képah yo sě, Nsyifunɔ yuku sɔkɔ, té me yékâble n pɪ n yuku kápékèyô pé wě wró.]

30 Képah náh, Pole ye nínó tũ ò wòkò sɔkɔ, wǎh sò nê tɔkɔ de tẽ. Nóno pól-á sò n wil n pɔ ò tyí, à sò me pé pólle n tẽ palle.

* 28:26-27 28.26-27 - Yah n te Yesayi 6.9-10.

³¹ A sò me Liyel tǒrí tyíle n yo névye tyí, té me Tě ñgbě Yesu Krista tyile nole n kwo ñisãh soko. Nnî yó ñtě náh sò me ñ yahle n kǒ ké pínóle.

Toussian, Southern
The New Testament in the Southern Toussian
language of Burkina Faso: toussian du sud: wĩn
nìvìnì tirlɛ New Testament
Nouveau Testament en toussian

copyright © 2013 Wycliffe Bible Translators, Inc. in cooperation with
ANTBA

Language: Southern Toussian (Toussian, Southern)

Contributor: Wycliffe Bible Translators, Inc.

All rights reserved.

2025-07-09

PDF generated using Haiola and XeLaTeX on 11 Mar 2026 from source
files dated 9 Jul 2025

aaf2875e-90b5-5c14-b910-61579d3da2c7